



Grad Sarajevo  
City of Sarajevo

Bosna i Hercegovina  
Federacija Bosne i Hercegovine  
Kanton Sarajevo  
Grad Sarajevo  
**GRADSKO VIJEĆE**

Broj:  
Sarajevo, \_\_.\_\_.2020. godine

Na osnovu člana 26. stav 1. tačka 2. i člana 74. stav 1. Statuta Grada Sarajeva („Službene novine Kantona Sarajevo”, broj 34/08 – prečišćeni tekst), Gradsko vijeće Grada Sarajeva, na 36. sjednici održanoj \_\_\_\_\_godine, usvojilo je

Izveštaj o aktivnostima Grada Sarajeva u oblasti međunarodne saradnje u 2019. godini

## **PREDSJEDAVAJUĆI GRADSKOG VIJEĆA**

**Igor dr. Gavrić**

---

**Adresa:** Hamdije Kreševljakovića 3  
71000 Sarajevo, BiH  
**Tel:** +387 33 216 659  
**Fax:** +387 33 205 874  
**Email:** gsgv@sarajevo.ba  
**Web:** gradskovijece.sarajevo.ba





Grad Sarajevo  
City of Sarajevo

Bosna i Hercegovina  
Federacija Bosne i Hercegovine  
Kanton Sarajevo  
Grad Sarajevo

**GRADONAČELNIK**

*Izvještaj o aktivnostima Grada Sarajeva  
u oblasti međunarodne saradnje u 2019. godini*

*Predlagač: Gradonačelnik  
Obrađivač: Stručna služba  
gradonačelnika Grada Sarajeva*

*Sarajevo, februar 2020. godine*

Adresa: Hamdije Kreševljakovića 3  
71000 Sarajevo, BiH  
Tel: +387 33 407 443  
Fax: +387 33 208 341  
Email: [grad@sarajevo.ba](mailto:grad@sarajevo.ba)  
Web: [www.sarajevo.ba](http://www.sarajevo.ba)



## SADRŽAJ

- I. Uvod*
- II. Međunarodna saradnja na nivou gradova*
- III. Međunarodni skupovi*
- IV. Saradnja s diplomatsko-konzularnim predstavništvima*
- V. Ostale aktivnosti na planu međunarodne saradnje*
- VI. Aktivnosti Grada Sarajeva u okviru međunarodnih asocijacija*
- VII. Ocjena stanja*
- VIII. Programska orijentacija*
- IX. Zaključna razmatranja*

## I. UVOD

Programom rada Gradskog vijeća Grada Sarajeva za 2020. godinu, broj: 01-GV-02-1378/19 od 17.12.2019. godine, oblast Saradnja i udruživanje, Programom gradonačelnika Grada Sarajeva za 2020. godinu i Programom međunarodne saradnje Grada Sarajeva za 2020. godinu, predviđen je Izvještaj o aktivnostima Grada Sarajeva u oblasti međunarodne saradnje u 2019. godini.

U realizaciji aktivnosti na planu međunarodne saradnje posebna pažnja bila je posvećena ciljevima sadržanim u Programu međunarodne saradnje Grada Sarajeva za 2019. godinu. Aktivnosti su se odvijale na bilateralnom nivou u formi saradnje s pobratimskim, partnerskim i drugim gradovima i institucijama u svijetu, na multilateralnom nivou kroz organizaciju i učestvovanje u međunarodnim skupovima, te kroz saradnju s diplomatsko - konzularnim predstavništvima u BiH i izvan nje.

Analizom saradnje sa gradovima regiona, Evrope i svijeta, nameće se zaključak o širokom spektru te saradnje koja se odvijala prilikom susreta zvaničnih delegacija, učešćem u radu međunarodnih asocijacija, međunarodnih konferencija i drugim događajima, a sve sa ciljem što bolje međunarodne prezentacije i pozicioniranja Sarajeva kao glavnog grada BiH.

Aktuelna gradska administracija je od početka mandata postavila kao prioritet razvijanje pametnog grada i primjenu novih tehnologija. Grad Sarajevo postaje mjesto inovativnih ideja i rješenja, te moderan, otvoren, evropski grad, predvodnik u uvođenju evropskih standarda.

Sa pobratimskim, partnerskim i ostalim gradovima i institucijama razmjenjivani su, ili je inicirana razmjena primjera najboljih praksi, znanja (know how) i iskustava iz oblasti Smart City inicijative, te ostalih područja djelovanja u okviru nadležnosti gradskih uprava, kao što su: urbano planiranje, digitalizacija, e-uprava, energetska efikasnost, javna rasvjeta, zaštita okoliša, kultura, turizam, zaštita i očuvanje kulturno-historijskog naslijeđa, učešće u projektima prekogranične saradnje i privlačenja sredstava iz predpristupnih i drugih međunarodnih fondova itd.

U izvještajnom periodu predstavnici Grada Sarajeva učinili su protokolarne/radne posjete mnogobrojnim pobratimskim, prijateljskim i drugim gradovima/institucijama, te prisustvovali međunarodnim skupovima od značaja za Grad Sarajevo.

Bilateralna saradnja: Iz oblasti bilateralne saradnje izdvajamo posjete sljedećim gradovima: Bakuu, Beču, Budimpešti, Bursi, Dohi, Isfahanu, Istanbulu, Kuala Lumpuru, Kuchingu, Nur Sultanu, Podgorici, Pratu, Rabatu, Ravenni, Skoplju, Šangaju, Teheranu, Tokyju, Washingtonu, Vukovaru.

Grad Sarajevo posjetile su mnogobrojne delegacije od kojih izdvajamo posjetu prijestolonasljednice Kraljevine Švedske, princeze Victorije, te delegacije Beča, Cottbusa, Coventryja, Dubrovnika, Erzuruma, Friedrichshafena, Kuala Lumpura, Novog Pazara, Oświęcima, Pekinga, Podgorice, Pule, Zagreba, Volgograda, Tianjina i malezijske države Sarawak.

Od inostranih gradonačelnika koji su posjetili Grad Sarajevo izdvajamo gradonačelnike finskog grada Voukattija, Dubrovnika, Erzuruma, Kuala Lumpura, Podgorice, Skoplja, Slovenj Gradeca, Prilepa, Oświęcima, Morphoua, Lefkonika, Plonska, Kumanova, Kotor, Berana, te zamjenike gradonačelnika Volgograda, Toruńa, Kyrenie, Zagreba.

*Pisma namjere* o uspostavljanju saradnje upućena su gradovima: Canberra, Nur Sultan, Isfahan i Tokyo. Među gradovima sa kojima je inicirano uspostavljanje saradnje su: Bratislava, Monako,

Oslo, Pariz, Ravenna, Oświęcim, Stockholmom, dok su Budimpešta, Dubrovnik, Tirana, Peking, Tianjin, Skoplje i Coventry među gradovima sa kojima je razmatrano intenziviranje postojeće saradnje.

Multilateralna saradnja: Grad Sarajevo je organizirao ili sudjelovao u mnogobrojnim međunarodnim skupovima od kojih hronološki izdvajamo: Konferenciju Connected Smart Cities, Brisel; 7. Global Baku Forum, Baku; Prvi Međunarodni sastanak tour operatera „Meet Up Sarajevo“, Sarajevo; Prvi Samit gradonačelnika glavnih gradova država jugoistočne Evrope, Sarajevo; Konferenciju „Dan gradova“, Ženeva; 6. Evropsku konferenciju o planovima održive urbane mobilnosti, Groningen; Panel diskusiju „Mreža kreativnih gradova“, Sarajevo; Međunarodni mirovni susret „Mir bez granica. Religije i kulture u dijalogu“, Madrid; Huawei Conect Summit, Šangaj; Regionalni forum inovacija, tehnologije i poduzetništva „Sarajevo Unlimited 2019“, Sarajevo; 4. Samit gradonačelnika glavnih gradova Srednje i Istočne Evrope i NR Kine 17+1, Tirana; 48. Generalnu skupštinu Evropskog olimpijskog komiteta (EOC), Varšava.

Saradnja s diplomatsko konzularnim predstavništvima: Grad Sarajevo posjetili su ambasadori i predstavnici diplomatsko-konzularnih predstavništava: Republike Austrije, Republike Azerbejdžan, Crne Gore, Delegacije EU u BiH, Republike Francuske, Republike Grčke, Republike Hrvatske, Indije, IR Iran, Republike Italije, Japana, NR Kine, Mađarske, Republike Sjeverne Makedonije, SR Njemačke, IR Pakistan, Palestine, Kraljevine Saudijske Arabije, Sjedinjenih Američkih Država, Republike Slovačke, Republike Slovenije, Kraljevine Švedske, Velike Britanije.

Učešće u okviru međunarodnih asocijacija čiji je Grad Sarajevo član: Grad Sarajevo je sudjelovao u radu Godišnjeg sastanka Svjetske unije olimpijskih gradova (UMVO), Generalne skupštine Mreže evropskih gradova „Eurocities“, te organizirao 30. Generalnu skupštinu Međunarode asocijacije „Gradovi glasnici mira“ (IAPMC), na kojoj je imenovan za predsjedavajućeg IAPMC u 2020.

Od mnogobrojnih aktivnosti izdvajamo:

- Uspješnu organizaciju Evropskog olimpijskog festivala za mlade (EYOF) 2019, za koji su gradovi Sarajevo i Istočno Sarajevo, dobili priznanje Ujedinjenih nacija i nagradu „Diplomatska aktivnost godine“ za doprinos saradnji, miru i dijalogu.
- *Memorandum o razumijevanju* između Grada Sarajeva i američke organizacije „Marshall Legacy Institute“ (MLI) kojim će se omogućiti potpuno deminiranje glavnog grada BiH do 2020., potpisan je u Washingtonu 24.10.2018.
- Povodom 31. oktobra - Svjetskog dana gradova, koji se obilježava u Parizu, Grad Sarajevo je dobio status grada filma UNESCO-a.
- *Sporazum o saradnji* između Grada Sarajeva i Konrad Adenauer Fondacije – Ured u BiH, u implementaciji Projekta „*Kreiranje, izrada i postavka izložbe - predstavljanje rada i doprinosa Međunarodnog krivičnog suda za bivšu Jugoslaviju (MKSJ)*“ potpisan u Vijećnici 30.12.2019.
- Na 4. *Samitu gradonačelnika glavnih gradova Srednje i Istočne Evrope i NR Kine 17+1*, održanom u Tirani, Grad Sarajevo je proglašen za domaćina 5. Samita koji će se održati 2020. godine.
- Saradnja Grada Sarajeva i UNDP-a BiH u okviru „Smart Sarajevo“ inicijative krunisana je 18.11.2019. potpisivanjem ugovora sa timovima koji će realizovati svoje projekte u sklopu ove inicijative.
- U okviru 38 godina dugih pobratimskih odnosa između kineskog grada Tianjina i Sarajeva, Grad Tianjin je Gradu Sarajevu poklonio Paviljon prijateljstva.

## **II. MEĐUNARODNA SARADNJA NA NIVOU GRADOVA**

### ***Prijem direktora za zdravlje i fitness Grada Houstona (SAD), Sarajevo, 07.01.2019.***

Zamjenik gradonačelnika Ivica Šarić primio je Samira Bečića, direktora za zdravlje i fitness najvećeg grada američke savezne države Teksas, grada Houstona. Prestižnu titulu Fitness Cara grada Houstona dodijelio mu je gradonačelnik Sylvester Turner za dugogodišnji trud za dobrobit, zdravlje i fizičku spremnost zajednice.

Povod posjete Gradu Sarajevu bio je povezanost s BiH, želja da svoju zemlju promovira u najboljem svjetlu, te uspostavljanje saradnje i moguće bratimljenje između Sarajeva i Houstona. Razgovarano je o potencijalnim infrastrukturnim projektima u bh. prijestolnici u koje bi Grad Houston mogao ulagati, kao i o nadležnostima Grada Sarajeva i Kantona Sarajevo.

Prijemu je u ime Ministarstva vanjskih poslova BiH prisustvovala i bivša ambasadorica BiH u Japanu Anesa Kundurović.

### ***Radna posjeta rukovoditelja skijališta Sljeme iz Zagreba, Sarajevo, 16.-18.01.2019.***

Na poziv gradonačelnika Sarajeva, rukovoditelj zagrebačkog skijališta Sljeme Igor Žiljak sa saradnicima, boravio je u radnoj posjeti u Sarajevu od 16. do 18.01.2019. Delegacija je u pratnji predstavnika Grada Sarajeva obišla planinu Trebević i postojeću infrastrukturu Sarajevske žičare, izvidjela mogućnost skijaške staze i izgradnje infrastrukture za zasnježenje i rasvjetu buduće ski staze i žičare uz stazu.

### ***Ceremonija preuzimanja Plamena mira za EYOF 2019, Rim (Republika Italija), 30.01.-02.02.2019.***

Povodom održavanja Evropskog omladinskog olimpijskog festivala EYOF 2019, delegacija Grada Sarajeva, Grada Istočno Sarajevo, OK BiH i EYOF-a 2019, boravila je u Rimu kako bi na svečanoj ceremoniji preuzela *Plamen mira* za EYOF 2019. od Evropskih olimpijskih komiteta (EOC) sa sjedištem u Rimu.

Svečana ceremonija „Flame of Peace Ceremony” održana je na Olimpijskom stadionu u Rimu, u organizaciji EOC-a. Plamen mira preuzeli su gradonačelnici Sarajeva i Istočnog Sarajeva, Abdulah Skaka i Nenad Vuković. Na taj način *Plamen mira* započeo je svoj put ka Sarajevu gdje je upaljen na Svečanoj ceremoniji otvaranja EYOF-a na Olimpijskom stadionu „Asim Ferhatović Hase“ 10.02.2019.

Pored gradonačelnika, delegaciju Grada Sarajeva činili su Maja Hadžihalilović, rukovodilac Stručne službe gradonačelnika, Ensar Eminović, šef Odjeljenja za kabinetske i protokolarne poslove i Denis Kovačević, Viši referent za protokol.

### ***Dan Grada Dubrovnika, Dubrovnik (Republika Hrvatska), 01.-03.02.2019.***

Delegacija Grada Sarajeva koju su činili zamjenik gradonačelnika Ivica Šarić, zamjenica predsjedavajućeg Gradskog vijeća Edina Gabela, te gradski vijećnici Lana Velić, Nihad Uk i Toni Vukadin, prisustvovala je obilježavanju Dana grada Dubrovnika od 01. do 03.02.2019.

Dubrovački gradonačelnik Mato Franković sa saradnicima susreli su se sa predstavnicima Sarajeva, Vukovara, Ohrida, Mostara, općine Kotor, francuskog grada Rueila Malmaisona i grčkog grada Ioannina.

Gradonačelnik Franković je iskazao želju za daljnjom zajedničkom saradnjom na svim poljima, naročito u obrazovanju, kulturi i turizmu. Također je istaknuo važnost 2019. godine s obzirom na dvije velike obljetnice, 40 godina od upisa povijesne jezgre Dubrovnika na Popis svjetske baštine i 10 godina od upisa Feste svetoga Vlaha na Reprezentativni popis nematerijalne kulturne baštine čovječanstva.

Predstavnici gradova su se zahvalili na gostoprimstvu te izrazili želju za budućom saradnjom na zajedničkim projektima.

#### ***Prijem delegacije EYOF-a 2021. Voukatti (Finska), Sarajevo, 15.02.2019.***

Gradonačelnik Sarajeva Abdulah Skaka primio je delegaciju EYOF-a 2021 iz finskog grada Voukattija, na čelu s gradonačelnikom Mikom Kilpeläinenom. Razgovarano je o organizaciji EYOF-a 2019, a gradonačelnik Skaka je izrazio spremnost Grada Sarajeva da pruži podršku Voukattiju tokom priprema za EYOF 2021. u slučaju da postoji potreba za tim.

#### ***Pripremni sastanak - Samit gradonačelnika glavnih gradova Jugoistočne Evrope, Sarajevo, 06.03.2019.***

Pripremni sastanak na kojem se razgovaralo o organizacionim i tehničkim detaljima Samita gradonačelnika glavnih gradova Jugoistočne Evrope, održan je u Sarajevu 06.03.2019. Pored predstavnika Grada Sarajeva sastanku su prisustvovali stručna savjetnica u Službi za međunarodnu saradnju Grada Zagreba Lucija Močibob, šef Kabineta gradonačelnika Skoplja Nikola Naumoski, te savjetnik gradonačelnika Atine Panagiotis Exarchos (on line).

#### ***Službena posjeta Gradu Beču (Republika Austrija), 07.03.2019.***

U okviru tradicionalne i prijateljske saradnje, gradonačelnik Abdulah Skaka sastao se s gradonačelnikom i guvernerom Beča Michaelom Ludwigom, u glavnom gradu Republike Austrije 07.03.2019., a prijemu je prisustvovao i ambasador BiH u Republici Austriji Kemal Kozarić.

Tokom sastanka dva gradonačelnika su se složila da će gradovi Sarajevo i Beč osnažiti saradnju i provoditi zajedničke projekte u različitim oblastima kao što su kultura, turizam, urbani razvoj, te naročito na području implementacije pametnih tehnologija.

Također, razgovarano je o organizovanju „Dana Sarajeva u Beču“ i „Dana Beča u Sarajevu“ u cilju promocije kulture, turizma i približavanja umjetnika i građana dvaju gradova.

#### ***Otvorenje izložbe Mersada Berbera u Muzeju Katara Cultural Village, Doha (Država Katar), 28.03.2019.***

U Muzeju Katara Cultural Village u Dohi, 28.03.2019. otvorena je retrospektivna izložba slika Mersada Berbera uz prisustvo delegacija iz BiH i države Katar. Izložbi su pored predstavnika Fondacije Mersad Berber i porodice Berber prisustvovali i Dr. Hamad Bin Abdulaziz Al-Kawari, državni ministar Katara, gradonačelnik Sarajeva Abdulah Skaka, predsjedavajući Gradskog vijeća Igor Gavrić, i šef Odjeljenja za kabinetske i protokolarne poslove Ensar Eminović.

***Sastanak sa autorom knjige “Stoljetnim stopama Velikog rata”, Sarajevo, 04.04.2019.***

Gradonačelnik Sarajeva Abdulah Skaka i zamjenik gradonačelnika Ivica Šarić sastali su se s Attilom Szalay-Berzeviczyem, autorom knjige “Stoljetnim stopama Velikog rata” iz Budimpešte, u čijoj pratnji su bili izdavač Tamás Novák (Lábnyom Publishing House) i ambasador Mađarske Krisztián Pósa sa saradnicama.

Szalay-Berzeviczy je predstavio projekat obilježavanja 100. godišnjice potpisivanja Versajskog sporazuma kojim je završen Prvi svjetski rat, i 105. godišnjice sarajevskog atentata. (Dogadaž je održan u Vijećnici 28.06.2019. i sastojao se od otvaranja izložbe fotografija sadržanih u knjizi „Stoljetnim stopama Velikoga rata od Sarajeva do Versaja” i okruglog stola o temi „Šta je naslijede Prvog svjetskog rata i Mirovne konferencije u Parizu“).

***Svečano obilježavanje 6. aprila – Dana grada Sarajeva 2019.***

Obilježavanju 6. aprila – Dana grada Sarajeva, prisustvovala su delegacije bratskih i prijateljskih gradova: Dubrovnika Pule, Novog Pazara, Podgorice, Zagreba i Kuala Lumpura. Delegaciju Dubrovnika predvodio je gradonačelnik Mato Franković; Kuala Lumpura, gradonačelnik Dato' Nor Hisham Dahlan; Podgorice, zamjenica gradonačelnika Slađana Vujačić; Pule, zamjenik gradonačelnika Robert Cvek; Zagreba, posebni viši savjetnik gradonačelnika za investicije i strana ulaganja Harun Omerbašić; Novog Pazara, pomoćnik gradonačelnika Nihat Hasanović.

„Počasni građani Grada Sarajeva“ u 2019. postali su: Mirjana Karanović, glumica, veliki borac za ljudsku pravdu i prava, posebno vezana za Sarajevo; Chris Smith, američki kongresmen, zagovornik ljudskih prava, koji je tražio zaustavljanje agresije i genocida i skretao pažnju na situaciju u BiH; maestro Michelangelo Pistoletto, jedan od najvećih živućih protagonista svjetske suvremene umjetnosti i podržavalac projekta ARS AEFI; Krunoslav Cigoj (posthumno), operni umjetnik, koji je u vrijeme opsade Sarajeva, učestvovao na koncertima za Sarajevo.

***Primopredaja Zvona mira, Sarajevo, 12.04.2019.***

Zamjenik gradonačelnika Milan Trivić preuzeo je *Zvono mira* od Seiko Takase, direktorice japanske Asocijacije za očuvanje UN zvona mira, na svečanoj ceremoniji upriličenoj u Vijećnici 12.04.2019. Time su grad Sarajevo i BiH postali dio porodice od 141 grada/države širom svijeta koji su primili zvono mira.

Japansko zvono mira je simbol mira Organizacije ujedinjenih nacija (OUN). Radi se o zvaničnom poklonu koji je japanski narod uručio OUN 1954. Čin uručenja “Zvona mira” je veoma značajan u daljem građenju izuzetno dobrih odnosa između naših dviju zemalja, njihovih naroda i kultura.

Svečanosti je prisustvovao predsjedavajući Gradskog vijeća Grada Sarajeva Igor Gavrić i ambasador Japana u BiH Nj.E. Hideyuki Sakamoto.

***Prvi festival japanske trešnje „Sakura Matsuri“, Sarajevo, 13.04.2019.***

U duhu prijateljstva i dugogodišnje uspješne saradnje između BiH i Japana, u organizaciji Grada Sarajeva, japanske nevladine organizacije Ipil-Ipil no Kai i Ambasade Japana u BiH, održan je Prvi festival japanske trešnje „Sakura Matsuri“ u parku Hastahana 13.04.2019.



Festival je posvećen japanskoj trešnji, nacionalnom simbolu Japana, čije sadnice ova zemlja godinama donira Sarajevu u znak mira i prijateljstva. U zemlji izlazećeg sunca, svakog aprila, već hiljadama godina živi tradicija promatranja cvjetanja trešanja (*hanami*) u gradskim parkovima uz porodične zabave.

Dana 13. aprila i bh. prijestolnica je s gradovima Evrope i svijeta, u koje su iz Japana stigle trešnje, obilježila ovaj jedinstveni događaj s ciljem razmjene bh. i japanske kulture i tradicije. Zamjenik gradonačelnika Milan Trivić, ambasador Japana u BiH Hideyuki Sakamoto i predsjednica asocijacije Ipil-IPil no Kai Toshiko Ito, uputili su poruke mira naglasivši potrebu njegovanja bosanskohercegovačko - japanskog prijateljstva.

Festival je ponudio niz zanimljivih sadržaja za građane i turiste, a taj dan pamtit će i osnovci iz Sarajeva, Mostara i Banja Luke čiji su likovni radovi na temu festivala proglašeni najboljim i bit će izloženi u Japanu.

#### ***Svečano obilježavanje 20. aprila - Dana grada Novog Pazara (Republika Srbija), 20.04.2019.***

Svečanom obilježavanju 20. aprila - Dana grada Novog Pazara prisustvovala je zamjenica predsjedavajućeg Gradskog vijeća Grada Sarajeva Edina Gabela.

#### ***Svečano obilježavanje Dana grada Vukovara (Republika Hrvatska), 03.05.2019.***

Svečanom obilježavanju 3. maja - Dana grada Vukovara prisustvovao je gradski vijećnik Toni Vukadin.

#### ***Svečano obilježavanje Dana grada Pule (Republika Hrvatska), 05.05.2019.***

Svečanom obilježavanju 5. maja - Dana grada Pule prisustvovao je gradski vijećnik Toni Vukadin.

#### ***Koncert Mađarskog nacionalnog filharmonijskog orkestra, Sarajevo, 09.05.2019.***

U organizaciji Grada Sarajeva i Ambasade Mađarske, Mađarski nacionalni filharmonijski orkestar održao je koncert u Vijećnici 9. maja 2019., povodom obilježavanja godišnjice otvorenja obnovljenog simbola grada, Dana Evrope i Dana pobjede nad fašizmom.

U pozdravnom obraćanju, zamjenik gradonačelnika Ivica Šarić istaknuo je da je Gradu Sarajevu čast da nakon renomiranih bečkih, zagrebačkih, moskovskih i sarajevskih umjetnika, ugosti i Mađarski nacionalni filharmonijski orkestar.

Ambasador Mađarske Krisztián Pósa kazao je da je ovaj koncert posvećen uzvišenoj muzičkoj umjetnosti i jačanju prijateljskih i partnerskih veza između Mađarske i Bosne i Hercegovine.

Koncertom je ujedno svečano zatvoren programski serijal pod nazivom „Sedmice Mađarske kulture u BiH“ koji je organizovala Ambasada Mađarske u Sarajevu pod pokroviteljstvom Ministarstva vanjske trgovine i vanjskih poslova Mađarske.

#### ***Službena posjeta Gradu Budimpešti (Mađarska), 12.-14.05.2019.***

Delegacija Grada Sarajeva koju su činili gradonačelnik Abdulah Skaka, zamjenik gradonačelnika Milan Trivić i pomoćnica gradonačelnika za lokalnu samoupravu i razvoj grada Dragana Solaković, boravila je u službenoj posjeti pobratimskom Gradu Budimpešti.

Gradovi Budimpešta i Sarajevo dijele bogatu zajedničku historiju, ali su upućeni i da jačaju odnose i mogućnosti za konkretnu saradnju na aktuelnim i budućim projektima u korist građana.

Gradonačelnik Skaka upoznao je svog kolegu Istvána Tarlósa s napretkom koji ostvaruje grad Sarajevo, ali i s brojnim izazovima s kojima se suočava. Grad Budimpešta ponudio je svoja iskustva u pogledu korištenja fondova EU za razvojne projekte, što je jedan od prioriteta ove gradske administracije.

Razmatrane su opcije za saradnju u pogledu uređenja korita rijeke Miljacke koja je dio Dunavskog sliva, te projekata iluminacije kulturno-historijskih objekata, posebno iz austro-ugarskog perioda u Sarajevu.

Potvrda odličnih odnosa dva grada je vrlo zapaženo gostovanje mađarskog filharmonijskog orkestra u Vijećnici povodom 9. maja, koje je dogovoreno u ranijim susretima gradonačelnika.

### ***Službena posjeta Gradu Oslu (Kraljevina Norveška), 23.05.2019.***

Gradonačelnik Sarajeva Abdulah Skaka i ambasador BiH u Norveškoj Nedim Makarević, susreli su se 23.05.2019. u Oslu s gradonačelnicom glavnog grada Kraljevine Norveške Marianne Borgen, sa kojom su razgovarali o mogućnostima višestruke saradnje glavnih gradova dvije zemlje.

Tokom razgovora ukazano je na visok nivo bilateralnih odnosa između dvije zemlje, te na odličnu integraciju bh. iseljenika u Norveškoj.

Gradonačelnik Skaka je istakao da glavni grad BiH, u skladu s planovima, intenzivno radi na podizanju nivoa međunarodne saradnje i to, posebno, s glavnim gradovima prijateljskih država. Naglasio je da postoji mnogo oblasti u kojima uža saradnja između Sarajeva i Osla može značajno doprinijeti i osnažiti tradicionalno prijateljstvo između naše dvije države. Uspostavljanje partnerskih odnosa bi stvorilo okvir za konkretnu saradnju u područjima kulture, sporta, obrazovanja, turizma, te posebno u oblasti zaštite i očuvanja okoliša.

Nakon susreta s gradonačelnicom jednog od najuređenijih gradova u svijetu, delegacija je posjetila Ambasadu BiH u Norveškoj gdje je održan radni sastanak s predstavnicima bh. iseljenika s kojima je razgovarano o ideji za realizaciju projekata kako bi Sarajevo postalo zelena prijestolnica Europe, što je titula koju Oslo već posjeduje,

U delegaciji Grada Sarajeva bila je i šefica Kabineta gradonačelnika Erna Čolić.

### ***Prijem delegacije Gruzije, Sarajevo, 23.05.2019.***

Zamjenik gradonačelnika Milan Trivić primio je predstavnike četiri gruzijska općine (Kutaisi, Gori, Rustavi, Sighnaghi) koji su boravili u Sarajevu u organizaciji Udruženja „Partnerstvo za javno zdravlje“ iz Sarajeva i Populacijskog fonda Ujedinjenih nacija (UNFPA) iz Gruzije.

Cilj posjete delegacije, koju je predvodila predstavnica ureda UNFPA Gruzija Lela Bakradži, bilo je upoznavanje s radom centara za zdravo starenje, odnosno s uspješnim modelom brige o starima kojeg žele prenijeti u gradove Gruzije. Tokom boravka gosti su posjetili četiri centra za zdravo starenje u Sarajevu.

Delegacija je izrazila spremnost za nastavak saradnje s Gradom Sarajevom u oblasti unapređenja kvaliteta života i zdravlja osoba u trećoj dobi.

Prijemu je prisustvovala i Sejdefa Bašić Čatić, izvršna direktorica Udruženja "Partnerstvo za javno zdravlje" koja je istakla da u BiH trenutno postoji 16 centara za zdravo starenje, te da 2020. godine namjeravaju organizovati Regionalne susrete osoba treće životne dobe.

***Sastanak u vezi projekta ugradnje lifta u Domu zdravlja Omer Maslić, Sarajevo, 28.05.2019.***

U skladu sa namjerom njemačkog pobratimskog Grada Friedrichshafena da finansira projekat ugradnje lifta za invalidna lica i majke s djecom u Domu zdravlja „Omer Maslić“, gradonačelnik Sarajeva Abdulah Skaka sa saradnicima, održao je sastanak s predstavnicima Općine Novo Sarajevo, JU Dom zdravlja KS, Doma zdravlja Omer Maslić i Zavoda za izgradnju KS.

Nakon sastanka, Općina Novo Sarajevo dostavila je Gradu Sarajevu 31.05.2019. projektnu dokumentaciju, građevinsku dozvolu i predmjer i predračun radova. Dokumentacija je prosljeđena Gradu Friedrichshafenu, koji je dopisom od 18.07.2019. potvrdio da će ovaj građevinski projekat podržati sa iznosom od 40.000,00 eura, koji su prikupljeni kroz donacije građana Grada Friedrichshafen od završetka rata u BiH. Suma će biti uplaćena po završetku ugradnje lifta, kada se dostavi konačni račun odnosno "dokaz" da je lift ugrađen.

*Sporazum o zajedničkom finansiranju izgradnje lifta u OJ Dom zdravlja Novo Sarajevo*, potpisan je od strane Grada Sarajeva, Grada Friedrichshafena i JU Dom zdravlja KS. Ovim dokumentom, sporazumne strane su saglasne da će finansijska sredstva za izgradnju, odnosno radove investicionog zahvata na centralnom objektu OJ Dom zdravlja Novo Sarajevo, koji se odnosi na izgradnju lifta u iznosu od 48.068,26 €, (u protuvrijednosti 94.013,35 KM), po Glavnom projektu koji je izradila firma „BUSIC CO“ d.o.o., osigurati kako slijedi: Grad Friedrichshafen u iznosu od 78.233,20 KM (u protuvrijednosti 40.000,00 €), a Grad Sarajevo u iznosu do 15.780,15 KM (u protuvrijednosti 8.068,26 €).

***Sastanak u vezi Projekta „Sarajevo bez mina“, Sarajevo, 06.06.2019.***

Gradonačelnik Sarajeva Abdulah Skaka razgovarao je u Vijećnici 06.06.2019. s direktorom Marshall Legacy Institute iz Washingtona Perry Baltimorom i direktorom ITF-a ambasadorom Tomažem Lovrenčičem o provođenju projekta „Sarajevo bez mina 2020“.

Projekt je promoviran 04.04.2019. u Vijećnici, na Međunarodni dan borbe protiv mina, a finansira ga Vlada SAD, odnosno State department. Sastanku je prisustvovao i Nermin Hadžimujagić, direktor Udruženja Centar za obuku pasa za otkrivanje mina u BiH (MDDC).

Partneri su izrazili zadovoljstvo dosadašnjim napretkom projekta ukazujući na njegov dalekosežni značaj. Gradonačelnik Skaka izrazio je zahvalnost Vladi SAD kao donatoru projekta kojim će se osloboditi preko 8 miliona kvadratnih metara površine od mina i neeksplozivnih ubojitih sredstava, te omogućiti siguran život za sve stanovnike i posjetiocima grada Sarajeva i šire regije.

Gradonačelnik je istakao da će projekat, čiji se završetak očekuje u septembru 2020., poslati snažnu i pozitivnu poruku iz Sarajeva i BiH, te da će donijeti dobrobit i podstaći ekonomski razvoj. Zahvalio je narodu i vladi SAD što su prepoznali važnost projekta i uspostavili čvrst partnerski odnos s glavnim gradom BiH.

Projektom „Sarajevo bez mina 2020“, koji je najveći pojedinačan projekt deminiranja finansiran od strane SAD u posljednjih 10 godina u BiH, obuhvaćeno je pet općina u sarajevskoj regiji u kojima je preostalo minski sumnjivo područje, a to su Stari Grad, Istočni Stari Grad, Vogošća, Istočna Ilidža i Novi Grad.

### ***Treći Austrijski bal u Vijećnici, Sarajevo, 08.06.2019.***

Treći Austrijski bal održan je u sarajevskoj Vijećnici 08.06.2019. Austrijska ambasada u Sarajevu, Grad Sarajevo i Grad Beč, sa svojim partnerima i sponzorima okupili su veliki broj gostiju iz političkog, kulturnog i javnog života u BiH.

Treći Austrijski bal potvrdio je da ova manifestacija postaje jedan od zaštitnih znakova odlične saradnje između BiH i Austrije. Tim povodom gradonačelnik Sarajeva uručio je zahvalnicu Grada Sarajeva bivšem ambasadoru Austrije u BiH Martinu Pammeru za nesebičan doprinos uspostavi jedne ovakve manifestacije.

### ***Posjeta guvernera malezijske države Sarawak, Sarajevo, 09.-12.06.2019.***

Visoka delegacija iz Malezije, koju je predvodio guverner savezne države Sarawak Nj. E. Tun Pehin Sri Haji Abdul Taib Mahmud, sastala se s gradonačelnikom Sarajeva Abdulahom Skakom u Vijećnici.

Na sastanku su istaknuti veoma dobri odnosi između dvije zemlje, te je guverner naglasio otvorenost za saradnju sa Sarajevom. Gradonačelnik je poručio da će aktuelna gradska administracija nastaviti dobru saradnju započetu posjetom Kuchingu, glavnom gradu malezijske države Sarawak, kada su sarajevskoj delegaciji domaćini bili upravo Nj. E. Tun Pehin Sri Abdul Taib Mahmud i gradonačelnik Kuchinga Datuk Haji Abang Abdul Wahap. Posjeta je bila od velikog značaja, a tada su predstavnici vlasti Sarawaka izrazili spremnost za uzvratnu posjetu BiH.

Razgovarano je o bilateralnim odnosima BiH i Malezije, koje njeguju zajedničke vrijednosti multikulturalizma, te mogućnostima uspostavljanja saradnje Grada Sarajeva s malezijskim gradovima, investicijama i privrednoj saradnji, pri čemu je istaknut značaj uloge Ambasade Malezije u BiH.

Ističući bogate prirodne i turističke potencijale grada Sarajeva i BiH, zaključeno je da postoje dobre pretpostavke za povećanje broja turista iz Malezije, te da je potrebno raditi na obostranoj promociji turizma. Naglašena je važnost jačanja saradnje i u oblasti edukacije, te razmjena posjeta predstavnika iz te oblasti.

### ***Izložba fotografija “Edo Murtić - Gdje su riječi nedostatne”, Sarajevo, 13.06.2019.***

Izložba fotografija “Edo Murtić-Gdje su riječi nedostatne” Almina Zrne, koje prate ideju, nastanak i realizaciju jednog od najznačajnijih kulturno-umjetničkih događaja u poslijeratnom Sarajevu, otvorena je u Vijećnici 13.06.2019.

Izložbu je otvorio Almin Zrno, a prisutnima su se, između ostalih, obratili zamjenik gradonačelnika Sarajeva Milan Trivić i posebni viši savjetnik gradonačelnika Zagreba Harun Omerbašić.

Glavni pokrovitelj izložbe bila je Turistička zajednica Kantona Sarajeva, a partneri u projektu: Ministarstvu kulture i sporta Kantona Sarajevo, Grada Sarajevo i Općina Centar.

Nakon smrti Ede Murtića 2005. godine, njegova obitelj je posmrtno, u njegovom ateljeu pronašla obiman opus crteža na temu rata s motivom kadavera. U Vijećnici je cjelokupni materijal premijerno predstavljen, te je izborom tematski referentnih crtačkih i grafičkih djela, uz reprezentativne slike iz ciklusa Novih apstrakcija, kontekstualiziran unutar Murtićevog opusa.

***Prijem delegacije Republike Azerbejdžan i Asocijacije „Mostovi prijateljstva BiH“, Vijećnica, 19.06.2019.***

Zamjenica predsjedavajućeg Gradskog vijeća Grada Sarajeva Edina Gabela primila je delegaciju Republike Azerbejdžan, predvođenu Asifom M. Asgarlijem, predsjednikom ADSAYO (Azerbaijan Democratic Student & Youth Organization) i potpredsjednikom nacionalnog NGO foruma Republike Azerbejdžan.

Visoka delegacija je u periodu od 19. do 23.06.2019. bila gost Asocijacije „Mostovi prijateljstva BiH“ iz Zenice, a u Sarajevu je boravila kako bi dodatno učvrstila veze između vladinih i nevladinih institucija, te kako bi zajedno s Pravim fakultetom Univerziteta Zenica organizirala konferenciju „Armenija-Azerbejdžan-Nagorno-Karabakh sukobi i realnosti sa stanovništva balkanske javnosti“, u Sarajevu u zgradi Parlamenta BiH 21.06.2019.

Tokom susreta potvrđene su tradicionalne prijateljske veze dvije države, a posebno glavnih gradova Bakuja i Sarajeva, koji njeguju pobratimske odnose od 1972. godine.

Edina Gabela je istaknula da su Grad Sarajevo i gradonačelnik Skaka u više navrata izrazili spremnost za jačanjem saradnje u obostranom interesu i to u različitim oblastima, posebno u kulturi i turizmu.

Predloženo je da gradonačelnici dva grada pokrenu inicijativu za uspostavljanjem saradnje na općinskom nivou u konkretnim projektima.

***Izložba „Stoljetnim stopama Velikoga rata od Sarajeva do Versaja“, Sarajevo, 28.06.2019.***

Na dan potpisivanja Versajskog sporazuma i na godišnjicu sarajevskog atentata 28. juna, Grad Sarajevo je bio dio zvaničnog međunarodnog programa obilježavanja stoljeća od Prvog svjetskog rata.

Tim povodom, Grad Sarajevo i Ambasada Mađarske u BiH upriličili su u Vijećnici 28.06.2019. izložbu fotografija sadržanih u knjizi mađarskog autora Attila Szalay-Berzeviczyja „Stoljetnim stopama Velikoga rata od Sarajeva do Versaja“. Izložba koja je bila otvorena do 12. jula, rezultat je dugogodišnjeg autorovog rada. Szalay-Berzeviczy je projekt započeo 2014. obišavši svako važno mjesto gdje se odvijao rat: od Latinskog mosta u Sarajevu, preko bojišta Europe, Afrike, Bliskog istoka i Pacifika, sve do Versaillesa, pokrivajući ukupno 59 zemalja.

Nakon otvaranja izložbe, u Svečanom salonu Vijećnice, održan je Okrugli sto o temi „Šta je naslijede Prvog svjetskog rata i Mirovne konferencije u Parizu“. Učesnici panela bili su reporter BBC-a Nick Thorpe, autor Szalay-Berzeviczy, historičar i profesor sa Filozofskog fakulteta Zijad Šehić, i Georg von Habsburg, unuk Karla IV, posljednjeg vladara Austro-ugarske monarhije, i sin Otta von Habsburga, koji je 2006. proglašen Počasnim građaninom Grada Sarajeva za iskazano prijateljstvo građanima Sarajeva u najtežim danima agresije i nesebično zalaganje za istinu i mir.

***Koncert Gorana Bregovića „Tri pisma iz Sarajeva“, Ravenna (Republika Italija), 02.07.2019.***

Na poziv umjetnika Gorana Bregovića, delegacija Grada Sarajeva koju su činili gradonačelnik Abdulah Skaka, rukovoditelj Stručne službe gradonačelnika Maja Hadžihalilović, i gradska vijećnica Sanela Holjan, prisustvovala je spektakularnom koncertu “Tri pisma iz Sarajeva” održanom u palači Mauro de Andre u italijanskoj Ravenni 02.07.2019.

Gradonačelnik Skaka sastao se s gradonačelnikom Ravenne Michele de Pascalom s kojim je razgovarao o kulturi dva grada, te o mogućnostima saradnje, s naglaskom na multikulturalnosti koju baštini Sarajevo.

***Svečano otvorenje 67. Ljubljana Festivala, Ljubljana (Republika Slovenija) 01.-04.07.2019.***

Na poziv Danka Brleka, direktora i umjetničkog vođe Festivala Ljubljana, zamjenik gradonačelnika Ivica Šarić prisustvovao je svečanom otvorenju 67. Ljubljana Festivala, održanom od 01. do 04.07.2019.

***Svečano otvorenje 70. Dubrovačkih ljetnih igara, Dubrovnik (Republika Hrvatska), 10.07.2019.***

Na poziv gradonačelnika Dubrovnika, gradonačelnik Sarajeva Abdulah Skaka, zamjenik gradonačelnika Ivica Šarić, te gradski vijećnici Srđan Simonović i Vedad Deljković, prisustvovali su svečanom otvorenju 70. Dubrovačkih ljetnih igara 10.07.2019.

U okviru programa, gradonačelnik Dubrovnika bio je domaćin večere priređene za prijateljske gradove među kojima su Rueil Malmaison, Graz i Sarajevo. Delegacija je prisustvovala svečanom otvaranju Ulice Đele Jusića, kao i svečanoj večeri s Predsjednicom Republike Hrvatske i domaćinom gradonačelnikom Dubrovnika Matom Frankovićem.

***Svečano otvaranje 65. Splitskog ljeta, Split (Republika Hrvatska) 14.07.2019.***

Na poziv Hrvatskog narodnog kazališta Split, zamjenik gradonačelnika Ivica Šarić prisustvovao je svečanom otvaranju 65. Splitskog ljeta koje je održano 14.07.2019.

***Uručenje priznanja „Ključ Grada Sarajeva“ Robertu Džozefu „Bob“ Dolu, bivšem američkom senatoru, Washington (SAD), 19.-23.07.2019.***

Na poziv Savjetodavnog Vijeća za BiH, delegacija Grada Sarajeva koju su činili gradonačelnik Abdulah Skaka, predsjedavajući Gradskog vijeća Igor Gavrić, i savjetnik gradonačelnika za međunarodnu saradnju Ensar Eminović, boravila je u Washingtonu (SAD) u periodu od 19. do 23.07.2019.

Gradonačelnik Skaka i predsjedavajući Gradskog vijeća Gavrić uručili su *Ključ Grada Sarajeva* bivšem kandidatu za predsjednika SAD i dugogodišnjem republikanskom lideru u Senatu Bob Dolu na svečanosti u njegovoj rezidenciji.

Gradsko vijeće Grada Sarajeva je na prijedlog gradonačelnika, na sjednici održanoj 17.07.2019. donijelo Odluku da se američkom senatoru Dolu uruči priznanje *Ključ grada Sarajeva*. Dol jedan je od najvažnijih ličnosti u izgradnji čvrstih prijateljskih odnosa BiH, posebno Sarajeva kao glavnog grada sa SAD.

Priznanje je uručeno na svečanosti povodom 96. rođendana Boba Dola, koji je izrazio želju da ponovo posjeti Sarajevo i BiH. Tokom razgovora, legendarni američki senator poručio je kako SAD

ostaju predane napretku i razvoju BiH. Dol je vrlo jasno i precizno javno okarakterizirao događaje u BiH kao agresiju i genocid. Njegov doprinos kao predsjednika Međunarodne komisije za nestale bio je nemjerljiv u prvim godinama intenzivne potrage i identifikacije žrtava ratnih zločina.

#### ***Sastanak s gradonačelnikom Podgorice Ivanom Vukovićem, Sarajevo, 18.08.2019.***

Gradonačelnik Sarajeva Abdulah Skaka sastao se s gradonačelnikom Podgorice Ivanom Vukovićem u Vijećnici 18.08.2019.

Na sastanku je konstatirano da su Sarajevo i Podgorica, kao glavni gradovi dvije susjedne države, upućeni na jačanje saradnje i bližu povezanost. Sagovornici su se složili da je potrebno unaprijediti odnose i pojačati institucionalni okvir, te uložiti dodatne napore da se ostvari bolja saobraćajna povezanost. Razgovaramo je i o uspostavi avio linije u saradnji sa Skopljem, te dat zamah inicijativi koja je potekla iz Sarajeva za nastavak komunikacije i susreta gradonačelnika glavnih gradova regije.

Vuković je boravio u Sarajevu kao gost Grada Sarajeva i prisustvovao je otvorenju 25. Sarajevo Film Festivala.

#### ***Saradnja s Bad Ischlom, Evropskim gradom kulture za 2024. godinu, 21.08.2019.***

Bad Ischl i region Salzkammergut (Gornja Austrija) takmiče se za titulu Evropska prijestolnica kulture 2024. Cilj programa je bavljenje imperijalnom prošlošću Bad Ischla, grada u kojem je Franz Joseph proveo 86 ljeta i gdje je potpisao deklaraciju o početku Prvog svjetskog rata.

U projektu „Razgovori sa imperatorom“, tokom kojeg je planiran niz razgovora, debata, skupa s umjetničkim izvedbama, Bad Ischl želi istražiti različite aspekte habsburške baštine. Svakog mjeseca u 2024. godini organizovat će po jedan Razgovor, počevši s istraživanjem razloga zbog kojeg je Imperatorova porodica došla u Salzkammergut, veza s Evropom itd.

S ciljem razmjene iskustava vezanih za ovu temu, na jedan takav razgovor pozvali bi nekoga iz Sarajeva, a u ovoj fazi takmičenja za Evropsku prijestolnicu kulture, izrazili su želju da imenuju Grad Sarajevo kao partnera za saradnju, što je Grad Sarajevo i prihvatio.

Detaljno planiranje projekta, ukoliko osvoje naslov u novembru 2019. započet će 2020. godine.

#### ***Ljetovanje djece iz Zavoda „Mjedenica“ u Novom Vinodolskom, 18.-26.08.2019.***

Grad Sarajevo u saradnji s Gradom Zagrebom omogućio je ljetovanje sarajevske djece u hrvatskom primorskom gradu Novi Vinodolski u periodu od 18. do 26.08.2019.

Odlazak 20-ro djece Zavoda „Mjedenica“ na ljetovanje nastavak je zajedničkog projekta dvaju partnerskih gradova koji se uspješno realizira već šestu godinu za redom i jedna je u nizu aktivnosti saradnje između Sarajeva i Zagreba.

Sarajevski mališani su zajedno sa svojim drugarima iz Vukovara boravili u Vili Rustici u Novom Vinodolskom, u odmaralištu Crvenog križa Grada Zagreba. Za djecu su osmišljene mnogobrojne zanimljive aktivnosti u okviru kojih su imali mogućnost da se druže, sklope nova poznanstva i ponesu lijepe uspomene.

#### ***75. godišnjica oslobođenja Prata, Prato (Republika Italija), 06.-09.09.2019.***

Svečanom obilježavanju 75. godišnjice oslobođenja Prata od nacista i godišnjoj historijskoj paradi „Corteggio storico“ prisustvovala je delegacija Grada Sarajeva i Općine Novo Sarajevo u sljedećem sastavu: zamjenica predsjedavajućeg Gradskog vijeća Grada Sarajeva Edina Gabela, gradski

vijećnici Velija Katica i Srđan Srdić, načelnik Općine Novo Sarajevo Nedžad Koldžo, sekretar Općine Novo Sarajevo Vildana Smajović, i pomoćnica načelnika Nermina Krupalija.

#### ***Prijem delegacije Gradskog vijeća Grada Barcelone, Sarajevo, 19.09.2019.***

Predsjedavajući Gradskog vijeća Igor Gavrić primio je 19.09.2019. predstavnike Gradskog vijeća Grada Barcelone, Davida Llistar Boscha, direktora za globalnu pravdu i međunarodnu saradnju, Bárbaru Roig, direktora Gender Programa, Jordi Cortésa, te Jasminu Mujezinović, izvršnu direktoricu Fondacije lokalne demokratije.

Predsjedavajući Gavrić je izrazio zahvalnost predstavnicima Grada Barcelone koji su svojim prisustvom uveličali otvaranje “Centra za žene Fondacije lokalne demokratije”, te dali podršku realizaciji ovog značajnog projekta.

Na sastanku su razmijenjena mišljenja o dosadašnjoj dugogodišnjoj, uspješnoj saradnji. Razgovarano je o problemima sa kojima se suočavaju dva grada u oblasti turizma, zaštite okoliša, saobraćaja i slično. Raspravljalo se i o gender akcionim planovima. Izražene su obostrane želje za nastavkom daljnje saradnje između grada Sarajeva i pobratimskog grada Barcelone.

Predsjedavajući je, potom, podsjetio na obljetnicu bratimljenja dva grada, te pozvao predstavnike Grada Barcelone da budu gosti prilikom obilježavanja 6. aprila - Dana Grada Sarajeva.

#### ***Prijem ministra unutarnje trgovine i potrošačkih poslova iz Malezije, Sarajevo, 27.09.2019.***

Gradonačelnik Sarajeva Abdulah Skaka primio je delegaciju Malezije koju je predvodio ministar unutarnje trgovine i potrošačkih poslova Datuk Seri Saifuddin Nasution Ismail. Gradonačelnik se zahvalio prijateljskoj Maleziji za sve što je činila i što čini za BiH i njene građane, te istakao visok nivo saradnje sa Ambasadom Malezije u BiH, kao i važnost doprinosa Malezije na Halal forumu.

Razgovarano je o potencijalu BiH u Halal industriji, te je istaknuto da bi za BiH bio veliki uspjeh ako bi uspjeli privući potencijalne ulagače da se proširi halal proizvodnju, te da se BiH i Sarajevo razvijaju u halal turizmu.

#### ***Prijem predsjednika Općine Kotor (Crna Gora), Sarajevo, 28.09.2019.***

Gradonačelnik Sarajeva Abdulah Skaka upriličio je prijem za predsjednika crnogorske Općine Kotor Željka Aprcovića, koji je bio je jedan od učesnika 30. Generalne skupštine Međunarodne asocijacije “Gradovi glasnici mira” IAPMC, održane u Sarajevu 26. do 28.09.2019.

Prvi čovjek Kotora upoznao je gradonačelnika Sarajeva sa jedinstvenim spojem različitih kulturnih uticaja i nasljeđa univerzalnih vrijednosti, zbog kojih je Kotor upisan u Listu svjetske prirodne i kulturno-istorijske baštine pod zaštitom UNESCO-a.

Sagovornici su se složili da gradovi trebaju komunicirati i sarađivati u različitim oblastima poput turizma i kulture, te unaprijediti saradnju zajedničkim apliciranjem prema fondovima EU u okviru prekogranične saradnje. Aprcović je pozvao gradonačelnika Sarajeva da posjeti Kotor.



***Prijem zamjenika gradonačelnika Volgograda (Ruska Federacija), Sarajevo, 28.09.2019.***

Gradonačelnik Sarajeva Abdulah Skaka upriličio je prijem za zamjenika gradonačelnika Volgograda Andreyu Lyakha, koji je bio je jedan od učesnika 30. Generalne skupštine Međunarodne asocijacije "Gradovi glasnici mira" IAPMC, održane u Sarajevu 26. do 28.09.2019.

Gradonačelnik Skaka je zahvalio na podršci Volgograda da Grad Sarajevo bude domaćin ovogodišnje Generalne skupštine IAPMC, te je čestitao tom gradu na organizaciji 29. Generalne skupštine održane 2018. godine.

Sagovornici su se složili da je osnovni cilj ovogodišnje Generalne skupštine IAPMC da se iz Sarajeva i BiH pošalje poruka mira, te istakli značaj zajedničkog rada na promociji kulture mira.

U skladu sa iskazanim interesovanjem, gradonačelnik Skaka je upoznao Andreyu Lyakha sa administrativno-pravnim položajem Sarajeva kao glavnim gradom BiH, načinom na koji funkcionira Grad Sarajevo, te nadležnostima i njegovoj teritorijalnoj organizaciji.

***Prijem gradonačelnika Oswiecima (Republika Poljska), Sarajevo, 28.09.2019.***

Gradonačelnik Sarajeva Abdulah Skaka upriličio je prijem za gradonačelnika poljskog grada Oswiecima Janusza Chwieruta, koji je bio je jedan od učesnika 30. Generalne skupštine Međunarodne asocijacije "Gradovi glasnici mira" IAPMC, održane u Sarajevu 26. do 28.09.2019.

Tokom susreta u Vijećnici razmatrani su i dogovoreni konkretni modeli saradnje. Gradonačelnik Oswiecima čestitao je svom domaćinu na uspješnoj organizaciji kao i na izboru Grada Sarajeva za predsjedavajućeg Asocijacije „Gradovi glasnici mira“ tokom narednih godinu dana. Chwierut je istakao da je Grad Sarajevo sa svojom burnom prošlošću i iskustvom koje opominje zaslužio da vodi upravo jednu takvu organizaciju koja okuplja gradove iz cijele Evrope i svijeta s ciljem promocije mira, zbližavanja ljudi i zagovaranja svakodnevnog prakticanja nenasilja, na čemu svi moraju raditi svakodnevno.

Također, Chwierut je uputio zvanični poziv prvom čovjeku Grada Sarajeva da posjeti Oswiecim u maju 2020. kako bi u okviru Mirovnog projekta "The Alley of Memory Trees" zasadio drvo u aleji koja se sastoji od drveća iz gradova koji su iskusili rat.

***Prijem delegacije Gradskog vijeća Coventryja (Velika Britanija), Sarajevo, 28.09.2019.***

Gradonačelnik Sarajeva Abdulah Skaka upriličio je prijem za predstavnike Gradskog vijeća Grada Coventryja, Abdul Salam Khana, zamjenika predsjedavajućeg Gradskog vijeća i Perveza Akhtara, gradskog vijećnika, koji su sudjelovali u radu 30. Generalne skupštine Međunarodne asocijacije "Gradovi glasnici mira" IAPMC, održane u Sarajevu 26. do 28.09.2019. Na sastanku je razgovarano o jačanju saradnje Sarajeva i Coventryja čiji pobratimski odnosi datiraju od 1957. Grad Coventry je Evropski grad sporta 2019. i Evropski grad kulture 2021.

***Prijem gradonačelnika Općine Prilep (Republika Sjeverna Makedonija), Sarajevo, 28.09.2019.***

Gradonačelnik Sarajeva Abdulah Skaka, predsjedavajući Gradskog vijeća Grada Sarajeva Igor Gavrić i zamjenica predsjedavajućeg Gradskog vijeća Edina Gabela, upriličili su prijem za delegaciju Općine Prilep, predvođenu gradonačelnikom Ilijom Jovanoskim, koja je učestvovala u

radu 30. Generalne skupštine Međunarodne asocijacije “Gradovi glasnici mira” IAPMC, održane u Sarajevu 26. do 28.09.2019.

Razgovarano je o značaju ulaska Makedonije u EU i pristupanja NATO-u, o uspostavljanju boljih putnih komunikacija i unapređenju zračnog prometa između dviju zemalja, o potrebi jačanja dugogodišnjeg prijateljstva i tradicionalnih veza dva grada u predstojećem periodu naročito u oblasti kulture.

Gradonačelnik Prilepa izrazio je želju za bratimljenjem sa nekom sarajevskom općinom, te će s tim u vezi uputiti inicijativu Gradu Sarajevu.

***Prijem gradonačelnika Općine Kumanovo (Republika Sjeverna Makedonija), Sarajevo, 28.09.2019.***

Gradonačelnik Sarajeva Abdulah Skaka, predsjedavajući Gradskog vijeća Grada Sarajeva Igor Gavrić i zamjenica predsjedavajućeg Gradskog vijeća Edina Gabela, upriličili su prijem za gradonačelnika makedonske Općine Kumanovo Maksima Dimitrievskog i predstavnika Odjeljenja za EU integracije i međunarodnu saradnju Aleksandra Krstevskog, koji su bili učesnici 30. Generalne skupštine Međunarodne asocijacije “Gradovi glasnici mira” IAPMC, održane u Sarajevu 26. do 28.09.2019.

Razgovarano je o značaju pristupanja Makedonije NATO-u, o uspostavljanju boljih putnih komunikacija i unapređenju zračnog prometa između dviju zemalja, o potrebi jačanja dugogodišnjeg prijateljstva i tradicionalnih veza dva grada u predstojećem periodu.

Općina Kumanovo ima pobratimske veze sa Bijeljinom i Banja Lukom, a razmišlja i o bratimljenju sa Tuzlom, posredstvom Ambasade Makedonije u BiH.

***Prijem gradonačelnika Cottbusa (SR Njemačka), Sarajevo, 02.10.2019***

Gradonačelnik Sarajeva Abdulah Skaka primio je 02.10.2019. u Vijećnici Holgera Kelcha, gradonačelnika njemačkog grada Cottbusa s kojim je dogovorio jačanje saradnje u različitim oblastima, posebno u primjeni najnovijih tehnologija.

Prvi čovjek Grada Sarajeva zahvalio je Vladi i narodu Njemačke za svu pomoć i podršku koju su tokom agresije i u poslijeratnom periodu pružili BiH i našem glavnom gradu. Izrazio je želju da se nastave unapređivati dobri odnosi BiH sa Njemačkom kao i sa gradovima s kojima Sarajevo ima partnerske veze. Naglasio je da Sarajevo i Cottbus imaju mnogo prostora za povezivanje preko projekata u oblasti primjene pametnih tehnologija, zaštite okoliša i razvoja turizma.

Skaka je svog kolegu upoznao sa kapitalnim razvojnim projektima koje je realizirala odnosno vodi aktuelna gradska administracija s ciljem što bolje kvalitete života naših građana.

Sudionici današnjeg susreta složili su se da je mjesto BiH u EU i NATO-u, što bi doprinijelo sigurnosti, političkoj stabilnosti i većem investiranju i ekonomskom razvoju.

U pratnji gradonačelnika Cottbusa bio je i direktor Fondacije Konrad Adenauer u BiH Sven Petke.

### ***Posjeta delegacije njemačkog grada Friedrichshafena, 01. i 03.10.2019.***

Višečlana delegacija njemačkog grada Friedrichshafena na čelu sa zamjenikom gradonačelnika Stefanom Kohlerom, predsjednikom Udruženja „Pro Sarajevo“ Berndom Fuchsom, i gradskim vijećnicima Silviom Petrovitz i Brunom Kramerom, boravila je u Sarajevu u okviru redovne studijske posjete od 30.09. do 04.10.2019.

Veze dva grada koja su u pobratimskim odnosima od 1972., i dalje su vrlo intenzivne zahvaljujući obostranoj predanosti i iskrenoj volji građana oba grada.

Gosti iz Friedrichshafena u pratnji pomoćnice gradonačelnika Sarajeva Dragane Solaković posjetili su 01.10.2019. Dom zdravlja „Omer Maslić“, u čiju obnovu i opremanje su Uprava i građani ovog partnerskog grada izdvojili značajna finansijska sredstva. Ovom prilikom su uručili donaciju za Pedijatriju DZ „Omer Maslić“.

Delegacija Friedrichshafena je potom obišla Dom za djecu bez roditeljskog staranja na Bjelavama, kojem je Bernd Fuchs uručio donaciju Udruženja građana „Pro Sarajevo“. V.d. direktorica Dječijeg doma Samira Puzo upoznala je goste sa planovima ove ustanove vezane za integraciju i socijalizaciju djece, zahvalila za dugogodišnju podršku te uručila zahvalnicu i radove koju su izradili šticienci.

Pomoćnica gradonačelnika Sarajeva Dragana Solaković poželjela je dobrodošlicu delegaciji Friedrichshafena i u Vijećnici 03.10.2019.

### ***Radna posjeta Christopha Luchsingera, profesora sa Tehnološkog univerziteta u Beču, Sarajevo, 15.-17.10.2019.***

Slijedom dogovora sa gradonačelnikom Beča u martu 2019., na poziv gradonačelnika Abdulaha Skake, univerzitetski prof. dipl. arh. Christoph Luchsinger sa Tehnološkog univerziteta u Beču (Wiener Hochhauskonzept), posjetio je Sarajevo od 15. do 17.10.2019.

Sa predstavnicima Grada Sarajeva, Općine Centar, Zavoda za planiranje razvoja KS i Ureda Grada Beča u Sarajevu, održao je sastanak i obišao lokalitet koji je u obuhvatu RP Kvadrant B-Marijin Dvor.

Velika zagađenost zraka u Sarajevu u zimskim mjesecima, te uticaj visoke gradnje na istu je osnovna tema koja je inicirala poziv profesoru kao vrhunskom stručnjaku za visoku gradnju kod urbanističkog planiranja i glavnom arhitekti važećeg Bečkog koncepta nebodera iz 2014. godine u kojem su razmotreni brojni aspekti visoke gradnje. Grad Sarajevo se kao nosilac, odnosno subjekt u planiranju, želio upoznati sa stajalištima svjetskih stručnjaka po pitanju uticaja visoke gradnje na provjetrenost, zagađenost zraka i sl.

Fokus je bio na RP Kvadrant B, koji je u fazi izrade Osnovne koncepcije. S toga je profesor sa predstavnicima iz Sarajeva obišao predmetni lokalitet 16.10. Predstavnicama Zavoda za planiranje razvoja KS i odgovorni planer Mirsada Džihović je prezentirala Osnovni koncept. Profesor je također upoznat i sa procedurom donošenja planova, nadležnostima pojedinih nivoa vlasti.

U prostorijama Grada Sarajeva održan je sastanak kojem je prisustvovao gradonačelnik, pomoćnik gradonačelnika za urbano planiranje, investicije, stambene i komunalne poslove, šef Odsjeka za urbano planiranje, te predstavnici Općine Centar, Zavoda i Ureda Grada Beča. Profesor je prisutne

upoznao sa procedurama u planiranju u Gradu Beču, te iznio pozitivan stav na ono što mu je prezentovano.

***Otvorenje Kulturnog centra Udruženja za kulturu i solidarnost "Bosna Sandžak", Istanbul (Republika Turska), 27.10.2019.***

Delegacija Grada Sarajeva koju su činili gradonačelnik Abdulah Skaka, stručna saradnica Azra Šišman i predstavnik Odjeljenja za odnose s javnošću Tarik Lazović, prisustvovala je ceremoniji otvaranja Kulturnog centra Udruženja za kulturu i solidarnost "Bosna Sandžak" koje okuplja Bošnjake porijeklom iz BiH i Sandžaka, te obilježavanju 30. godišnjice postojanja Udruženja, koje je održano u Istanbulu 27.10.2019.

Gradonačelnik Skaka se tokom ceremonije obratio prisutnima, a događaju su prisustvovali ministar unutrašnjih poslova Republike Turske Suleyman Soylu, načelnik Općine Bayrampasa Atilla Aydiner kao i brojni poslanici u državnom parlamentu Republike Turske.

Tokom svečanosti predstavljene su aktivnosti Udruženja, prije svega na polju humanitarnih akcija za pomoć BiH tokom rata 1992-1995. godine i poplava 2014. godine.

***Prijem visoke delegacije Grada Pekinga (NR Kina), Sarajevo, 28.10.2019.***

Zamjenici gradonačelnika Sarajeva Ivica Šarić i Milan Trivić primili su u Vijećnici 28.10.2019. visoku delegaciju Grada Pekinga, na čelu sa Qi Jing, članicom Ujedinjenog fronta Odsjeka za rad u općinskom odboru Pekinga. Prijemu je prisustvovao i ambasador NR Kine u BiH, Nj.E. Ji Ping.

Tokom sastanka razgovarano je o unapređenju saradnje i uspostavljanju jačih veza naših glavnih gradova, pogotovo u oblasti privrede, kulture, turizma. Sarajevo i Peking su historijski gradovi, domaćini olimpijada, te sve atraktivnije turističke destinacije.

Domaćini su iskazali zadovoljstvo izborom Grada Sarajeva za domaćina 5. *Foruma gradonačelnika glavnih gradova država Centralne i Istočne Evrope i NR Kine inicijative „17+1“* koji će se održati 2020., i koji će predstavljati dodatni impuls ekonomskom i društvenom razvoju BiH i Sarajeva.

Qi Jing je naglasila interes za saradnju u oblasti tehnologije, zaštite okoliša i turizma istakavši kako bi Sarajevo i Peking mogli potpisati sporazum o turizmu. Predložila je da se Grad Sarajevo pridruži Svjetskoj federaciji turističkih gradova (WTCF), čije je osnivanje inicirao Grad Peking.

Nakon prijema ispred SCC-a je upriličena svečanost na kojoj je prikazana prva od 52 epizode serijala reportaža o glavnom gradu NR Kine, pod nazivom „Taj prelijepi Peking“, kojeg će bh. javnost moći pogledati na državnom javnom servisu BHRT-u. Serijal će približiti našim građanima život, tradiciju, običaje, turističke atrakcije i historijske znamenitosti Pekinga. Ovaj projekt zajedno realizuju BHRT i TV Peking zahvaljujući posredovanju Udruženja „Bosansko-kinesko prijateljstvo“, kao podršci Grada Sarajeva i Ambasade NR Kine u BiH.

Na svečanosti je prikazan i promotivni film o Zimskim olimpijskim igrama kojima će Peking biti domaćin 2022.

***Službena posjeta Gradu Nur Sultan (Republika Kazahstan), 28.-30.10.2019.***

Gradonačelnik Sarajeva Abdulah Skaka sa delegacijom koju su činili šefica Odjeljenja za kabinetske poslove i informisanje Erna Čolić, i savjetnik gradonačelnika za međunarodnu saradnju i

direktor JP Sarajevo d.o.o. Ensar Eminović, boravio je u službenoj posjeti Gradu Nur-Sultanu (Republika Kazahstan) u periodu od 28. do 30.10.2019. godine.

Posjeta je realizirana u okviru Prvog samita zemalja Zapadnog Balkana i Kazahstana (BNS), koji se održavao u organizaciji Asocijacije „Berkut“ BiH i AIFC Kazahstan. Privrednu delegaciju činili su predstavnici: Energoinvest Sarajevo, AS Group Jelah, ASA Prevent, Bosnalijek, Pobjeda Rudet, Verlab, VT komora, MS wood, Standard, Asocijacija Berkut i počasni član Asocijacije Stjepan Mesić i predstavnici medija klix.ba.

Gradonačelnik Skaka obratio se privrednicima iz BiH i Kazahstana na ceremoniji otvaranja Prvog samita (BNS), koji je održan 28.10.2019. u prostorijama AFIC-a.

Gradonačelnik Skaka se sastao sa novoizabranim gradonačelnikom Nur Sultana Altayjem Kulginovim, koji ga je upoznao sa novim razvojnim idejama glavnog grada Kazahstana koji se posljednju deceniju i po razvija nevjerovatnom brzinom. Čelnici dva grada razgovarali su o saradnji u razvojnim projektima, a činjenica da se Kazahstan ubrzano razvija koristeći ne samo velike prirodne resurse, pruža ozbiljnu šansu za saradnju na obostranu korist. Dva gradonačelnika iskazala su interes za saradnju u oblasti turizma i promocije, obrazovanja i kulturne razmjene.

Gradonačelnik Skaka informisao je Kulginovog o mogućnostima promocije kulture Republike Kazahstana i grada Nur Sultana u Sarajevu organiziranjem Dana Kazahstana i drugim sličnim sadržajima. Gradonačelnik Skaka pozvao je gradonačelnika Kulginova da posjeti BiH i Sarajevo.

U sklopu posjete Nur Sultanu delegacija Grada Sarajeva sastala se sa predstavnicima AIFC-a (Astana International Financial Centre). Također organizirana je posjeta značajnim institucijama u oblasti kulture, umjetnosti.

### ***Službena posjeta Gradu Isfahanu i Gradu Teheranu (IR Iran), 30.10.-04.11.2019.***

Delegacija Grada Sarajeva koju su činili gradonačelnik Abdulah Skaka, gradski vijećnici Hazim Bahtanović i Reuf Hafizović, i stručna saradnica Azra Šišman, boravila je u službenoj posjeti Islamskoj Republici Iran od 30.10. do 04.11.2019.

Dana 31.11.2019. održan je sastanak sa gradonačelnikom Isfahana Ghodratollah Norouzijem. Razgovarano je o mogućnostima unapređenja saradnje između dva grada na svim poljima od obostranog interesa s posebnim akcentom na kulturno-historijsko naslijeđe, turizam, zaštitu okoliša, ekonomiju, privredu i kulturu.

Gradonačelnik Skaka je predao *pismo namjere* Isfahanskom kolegi kako bi se u cilju realizacije saradnje u narednom periodu potpisao *memorandum o razumijevanju*.

Imajući u vidu da Grad Isfahan ima dosta iskustva u saradnji sa UNESCO-om, a obzirom da je Sarajevo nedavno uvršteno na UNESCO-u listu kreativnih gradova, predložena je saradnja i na tom polju kao i razmjena iskustava. Gradonačelnik Sarajeva je pozvao gradonačelnika Isfahana, kao i isfahanske filmske umjetnike da sudjeluju na Sarajevo Film Festivalu.

Norouzi je poručio je da će se Isfahan 2020. predstaviti kao turistička prijestolnica svijeta te da nakon Francuske i Švicarske žele održati Sedmicu kulture Isfahana u BiH.

Na poziv gradonačelnika Teherana, delegacija je prisustvovala konferenciji i dodjeli nagrade „Tehran Golden Adobe Global Award” koja je u organizaciji Grada Teherana održana 02.11.2019. u Teheranu, u okviru obilježavanja Svjetskog dana gradova.

Gradonačelnik Sarajeva je imao izlaganje na panelu pod nazivom „Otporni i ugodni gradovi za život“, a pored njega izlaganje su imali gradonačelnik Teherana, predsjednik organizacije UCLG-MEWA Mehmet Duman kao i brojni načelnici iz Irana.

Gradonačelnik Skaka je imao sastanak sa gradonačelnikom Teherana Pirouz Hanachijem, s kojima je prije tri godine pobratimske odnose uspostavio raniji gradonačelnik Sarajeva Ivo Komšić. Ocijenjeno je kako je kreiran institucionalni okvir za intenzivnu i konkretnu saradnju u svim sferama života. Posebno je istaknuta saradnja na polju urbanizma i zaštite okoliša.

Gradonačelnik se sastao i sa načelnikom okruga 22 Ali Nouzarpourom s kojim je razgovarao na temu urbanizma, javnog prijevoza i razvijanja turističke ponude.

Dana 03.11.2019. delegacija je obišla gradsku deponiju u Teheranu, susrela se sa direktorom javnog preduzeća koje vodi deponiju, te je prikupila informaciju o raznim programima reciklaže i proizvodnje čiste energije na deponiji.

#### ***Posjeta prijestolonasljednice Kraljevine Švedske, princeze Victorije, Sarajevo, 06.-07.11.2019.***

Njihova Kraljevska Visočanstva princeza Victoria prestolonasljednica i princ Daniel od Švedske, kao i zamjenica premijera Vlade i ministrica za okoliš i klimu Isabella Lövin, posjetili su BiH od 06. do 07.11.2019. Ova posjeta predstavlja jednu od dvije posjete koje princeza prestolonasljednica i princ obavljaju svake godine.

Svrha ove posjete je da se ojačaju već dobri odnosi između dvije zemlje, naglase snažne veze i potencijal za nastavak saradnje. Cilj je da se istakne veliki potencijal zemlje, a glavne teme posjete bile su klima i okoliš, inovacije i poduzetništvo te učešće mladih.

Gradonačelnik Sarajeva Abdulah Skaka sa suprugom Majdom poželio je 06.11.2019. dobrodošlicu u gradsku Vijećnicu princezi Victoriji i njenom suprugu princu Danielu Westlingu.

Zahvalivši se na srdačnom prijemu, princeza Victorija se upisala u knjigu utisaka. Po završetku posjete Vijećnici, visoki gosti iz Švedske su u pratnji gradonačelnika i njegove supruge prošetali starim dijelom grada, te obišli Staru pravoslavnu crkvu, Begovu džamiju, Sinagogu i Katedralu.

Gradonačelnici Sarajeva i Istočnog Sarajeva, Abdulah Skaka i Nenad Vuković, bili su u pratnji delegacije prilikom posjete Trebeviću 07.11.2019. Švedska delegacija prisustvovala je radionici koju je organizovao Centar za promociju civilnog društva sa srednjoškolcima iz Sarajeva i Istočnog Sarajeva. U čast švedske delegacije održana je i prezentacija Grupe za uklanjanje mina i švedanina Jonasa Zakrisona koji rukovodi projektom obuke pasa specijalizovanih za otkrivanje mina. Delegacija je obišla sarajevsku žičaru, Vidikovac i bob-stazu, napravljenu za potrebe Olimpijade održane u Sarajevu 1984. godine, koja već dugo nije u funkciji a o čijoj obnovi se razmišlja.

Princeza Victoria i princ Daniel zajedno sa ministrom vanjske trgovine i ekonomskih odnosa BiH, ministricom okoliša i turizma FBiH, ministricom za prostorno planiranje, građevinarstvo i ekologiju Republike Srpske i načelnikom Brčko distrikta, sudjelovali su u sadnji stabla u parku Koševo kako bi obilježili početak izrade *Okolišne strategije za Bosnu i Hercegovinu za razdoblje 2030.*

***Službena posjeta Kumanovu, Skoplju, Prilepu i Ohridu (Republika Sjeverna Makedonija), 10.-17.11.2019.***

Delegacija Gradskog vijeća Grada Sarajeva koju su činili: Igor Gavrić, predsjedavajući Gradskog vijeća i vođa delegacije; Edina Gabela, zamjenica predsjedavajućeg Gradskog vijeća, gradski vijećnici Nuko Grebović, Miro Lazović, Sanela Holjan, Velija Katica, boravila je u Kumanovu, Skoplju, Prilepu i Ohridu (Republika Sjeverna Makedonija) u periodu od 10. do 17.11.2019.

Službena posjeta Opštini Kumanovo: Na poziv gradonačelnika Kumanova, delegacija je boravila u službenoj posjeti Kumanovu, povodom obilježavanja 11. novembra - Dana opštine Kumanovo i 500. godišnjice Kumanova.

Gradonačelnik Kumanova Maksim Dimitrievski upriličio je prijem za delegaciju Grada Sarajeva. Tom prilikom se zahvalio delegaciji što je svojim prisustvom uveličala obilježavanje godišnjice Opštine Kumanovo, te izrazio želju da se, ubuduće, intenzivira saradnja Grada Sarajeva sa ovom opštinom.

U okviru zvaničnog programa posjete, delegacija Grada Sarajeva položila je cvijeće na spomen obilježje i odala počast oslobodiocima grada. Potom je prisustvovala Svečanoj sjednici u Nacionalnom kulturnom centru „Trajko Prokopiev“, na kojoj su uručene zahvalnice i plakete zaslužnim građanima koji su doprinijeli razvoju Opštine u različitim sferama društvenog života.

U sklopu svečanosti, delegacija je prisustvovala i otvaranju likovne izložbe “Kumanovski likovni umjetnici 2019” koja sadrži slike nastale u različitim likovnim tehnikama, instalacijama i video umjetničkim projekcijama.

Ovogodišnje svečanosti u Kumanovu bile su u znaku 500. godišnjice od osnivanja grada i 75. godišnjice od oslobođenja u Drugom svjetskom ratu.

Službena posjeta Opštini Prilep: Gradonačelnik Opštine Prilep Ilija Jovanoski je upriličio prijem za delegaciju Grada Sarajeva. Na sastanku kojem je prisustvovao i predsjednik Opštinskog vijeća Prilep Mile Talevski je, između ostalog, razgovarano o bratimljenju Opštine Prilep sa Općinom Novo Sarajevo. S tim u vezi, dogovoreno je da Opštinsko vijeće Prilep uputi pismo namjere za bratimljenje dvije općine, u cilju jačanja ekonomske, kulturne i druge saradnje. Tokom boravka u Prilepu, delegacija Grada Sarajeva je obišla i znamenitosti jedne od najstarijih opština u Republici Sjevernoj Makedoniji.

Službena posjeta Gradu Skoplju: Na poziv gradonačelnika Skoplja Petra Shilegova, delegacija Grada Sarajeva prisustvovala je obilježavanju 13. novembra – Dana oslobođenja Skoplja. Gradonačelnik Skoplja Shilegov i predsjedavajuća Gradskog vijeća Ljubica Jancheva, upriličili su bilateralni sastanak sa delegacijom Grada Sarajeva tokom kojeg su, između ostalog, razmjenjena iskustva vezana za status i funkciju lokalne samouprave, a posebno u glavnim gradovima. Ovoj ozbiljnoj i zahtjevnoj temi je opredjeljen najveći dio bilateralnog skupa, a s ciljem traženja optimalnih rješenja u organizaciji i nadležnostima glavnih gradova u regiji, s usmjerenjem na Sarajevo, odnosno Skoplje.

Delegacije su se međusobno upoznale sa problematikom provođenja projekata vezanih za sprječavanje klimatskih promjena, organizaciju komunalnih djelatnosti, a kroz međusobno upoznavanje sa projektima koji se razvijaju u okviru inicijative *Smart City*, te kroz inoviranje sistema javnog gradskog prijevoza, a s ciljem, između ostalog, i prevencije zagađenja zraka. Na

sastanku su razmatrane mogućnosti, te su inicirani projekti razmjene srednjoškolaca, te projekti suradnje univerziteta.

Razgovarano je i o ranije iniciranom uspostavljanju avio linije Sarajevo – Skoplje, te je ponovljena potreba za ovom vrstom komunikacije.

Delegacija je zatim prisustvovala protokolarnim aktivnostima iz programa obilježavanja Dana oslobođenja Skoplja, položivši cvijeće ispred Spomenika oslobodiocima Skoplja te prisustvom svečanom uručanju nagrada „13. novembar“ zaslužnim građanima koji su doprinijeli razvoju i napretku Grada.

U sklopu svečanosti, delegacija je prisustvovala i otvaranju izložbe “Predsjednici DLUM-a”, Udruženja likovnih umjetnika – DLUM, u Gradskom tržnom centru, te obišla druge mnogobrojne projekte koje je započela ova administracija.

#### ***Svečano otvaranje 9. Coca-Cola Holiday Marketa, Sarajevo, 04.12.2019.***

9. Coca-Cola Sarajevo Holiday Market otvoren je u Parku Hastahana u Sarajevu 04.12.2019. U ime gradonačelnika Zagreba događaju je prisustvovao Armin Hodžić, predsjednik Vijeća bošnjačke nacionalne manjine Grada Zagreba.

#### ***Koncert Sarajevske filharmonije u Dohi (Država Katar), 10.12.2019.***

Na poziv Ambasade BiH, u organizaciji Fondacije za kulturu Katara i pod pokroviteljstvom premijera F BiH, Sarajevska filharmonija je održala koncert u Opera house Katara u Dohi (Država Katar) 10.12.2019.

Sarajevsku filharmoniju koja je izvela poznata djela bh. kompozitora sa ciljem promocije bh kulture i umjetnika, predvodila je maestra Samra Gulamović, sopranistica Adema Pljevljak-Krehić i bas Ivica Šarić.

Pored gradonačelnika Sarajeva Abdulaha Skake, koncertu su prisustvovali brojni ambasadori i predstavnici diplomatskog kora.

#### ***Prezentacija 6. Dubrovačkog zimskog festivala, Sarajevo, 11.12.2019.***

Promocija Dubrovačkog zimskog festivala, koji je održana šestu godinu zaredom, upriličena je 11.12.2019. u Domu mladih Skenderija u prisustvu zvaničnika gradova Sarajeva i Dubrovnika, turističkih radnika, medija i sugrađana.

Posjetioци su bili u prilici upoznati se sa raznovrsnim kulturnim, zabavnim, muzičkim i gastronomskim sadržajima koje će ponuditi 6. Dubrovački zimski festival, te uživati u nastupu poznatog folklornog ansambla Lindo.

Prisutnima su se obratili zamjenica gradonačelnika Dubrovnika Jelka Tepšić, zamjenik gradonačelnika Sarajeva Milan Trivić, te Marko Miljanić, pročelnik za turizam, more i gospodarstvo Grada Dubrovnika.



### *Sastanak sa gradonačelnikom Monaka, Monako (Kneževina Monako), 12.12.2019.*

Tokom boravka u Monaku, na poziv Fondacije „Peace and Sport“ povodom dodjele priznanja za „Diplomatsku akciju godine u svijetu“, gradonačelnik Sarajeva Abdulah Skaka sastao se sa gradonačelnikom tog grada Georges Marsanom 12.12.2019.

Tokom razgovora izražena je zajednička želja Sarajeva i Monaka da osnaže saradnju te se povežu u obostranom interesu. Gradonačelnik Marsan je istakao kako cijeni Sarajevo te napredak koji je postignut. Prihvatio je poziv da posjeti glavni grad tokom Sarajevo film festivala, posebno nakon što je Sarajevo dobilo status grada filma UNESCO-a.

Razgovoralo se i o organizaciji velikih sportskih događaja gdje oba grada imaju značajno iskustvo. Usaglašeno je da će se saradnja nastaviti i konkretizirati u narednom periodu.

### *Svečano obilježavanje 19. decembra - Dana Glavnog grada Podgorica, 18.-20.12.2019.*

Na poziv gradonačelnika Podgorice Ivana Vukovića, obilježavanju 19. decembra - Dana Glavnog grada Podgorica, u periodu od 18. do 20.12.2019., prisustvovala je delegacija Grada Sarajeva i Gradskog vijeća Grada Sarajeva, koju su činili: gradonačelnik Abdulah Skaka, zamjenik gradonačelnika Ivica Šarić, predsjedavajući Gradskog vijeća Grada Sarajeva Igor Gavrić, zamjenica predsjedavajućeg Gradskog vijeća Edina Gabela, gradski vijećnici Nuko Grebović, Miro Lazović, Sanela Holjan, šefica Odjeljenja za kabinetske poslove i informisanje Erna Čolić.

Delegacija bh. prijestolnice prisustvovala je Svečanoj sjednici povodom obilježavanja Dana glavnog grada Crne Gore. Svečana sjednica održana je uz prisustvo velikog broja zvanica, a delegacije gradova pored Sarajeva predvodili su još Petre Shilegov, gradonačelnik Skoplja, Shpend Ahmeti, gradonačelnik Prištine, Nikola Nikodijević, predsjednik Skupštine Beograda.

Delegacije Podgorice i Sarajeva, u prisustvu ambasadora BiH u Crnoj Gori Branimira Jukića, održale su bilateralni sastanak u zgradi gradske uprave 19.12.2019. Tokom sastanka razmatrali su opcije za saradnju u pogledu bolje infrastrukturne povezanosti, a razmijenjene su ideje i iskustva gradova koja se odnose na primjenu inovativnih i pametnih rješenja u oblasti green city i smart inicijative. Prihvaćena je inicijativa gradonačelnika Skake da se Samit gradova jugoistočne Evrope održi u Podgorici 2020., a sve u cilju uvezivanja glavnih gradova kao generatora ekonomskih i političkih procesa.

Gradonačelnik Skaka je također predložio da grad Sarajevo u cilju zbližavanja i jačanja saradnje, glavnim gradovima u regionu donira određen broj sadnica, kako bi širili ideju zelenih gradova.

Poseban akcenat stavljen je i na mogućnost osnaživanja partnerskih veza preko tima za zajedničke nastupe u korištenju predpristupnih fondova EU na obostranu korist, te su u tom cilju razmijenjeni kontakti odjeljenja zaduženih za međunarodnu saradnju.

Kada je riječ o kulturi, razmatrala se mogućnost nastupa Podgoričkog simfonijskog orkestra u povodu 9. maja u Vijećnici, odnosno gostovanja sarajevskog Kamernog teatra 55 u Podgorici u martu naredne godine.

Na margini događaja gradonačelnik Skaka i zamjenik Šarić susreli su se sa Željkom Šofrancom, generalnim direktorom Crnogorskog simfonijskog orkestra i Mirkom Šćepanović, umjetničkom direktoricom Muzičkog centra Podgorice sa kojima su razgovarali o mogućnostima nastupa

simfonijskog orkestra Podgorice u Sarajevu u povodu 09. maja, koncerta koji se tradicionalno održava u Vijećnici.

### ***Svečano otvoren kineski Paviljon prijateljstva – poklon Grada Tianjina, Sarajevo, 20.12.2019.***

U cilju jačanja tradicionalnog prijateljstva između BiH i NR Kine, te pobratimskih gradova Sarajeva i Tianjina, dogovorena je razmjena poklona - simbola dva grada, i to: replike baščaršijskog sebilja Tianjinu i Paviljona prijateljstva Sarajevu.

Početak novembra 2019. okončani su radovi na Kineskom paviljonu koji je dodatno oplemenio i upotpunio atraktivne sadržaje Centra za edukaciju, sport i rekreaciju "Safet Zajko" u općini Novi Grad. Svečano otvorenje Paviljona prijateljstva održano je 20.12.2019. u prisustvu predstavnika Grada Sarajeva, Općine Novi Grad i delegacije Grada Tianjina.

Na ceremoniji otvorenja prisutnima su se obratili pomoćnica gradonačelnika Dragana Solaković, član Stalnog komiteta Tianjinskog opštinskog komiteta Komunističke partije Kine i šef Odjela za ujedinjenu frontu rada Tianjina Ji Guoqiang i pomoćnica načelnika Općine Novi Grad za kulturu i obrazovanje Adisa Šuman.

Solaković je uručila Pismo zahvale gradonačelnika Sarajeva Abdulaha Skake i glavni projekat sarajevskog sebilja Ji Guoqiang, vođi delegacije Grada Tianjina.

Svečanosti u parku "Safet Zajko" prethodio je susret predstavnika gradskih uprava Sarajeva i Tianjina u Vijećnici. Istaknuto je kako postoje ogromni potencijali da se intenzivira i konkretizira saradnja dva grada pobratima punih 38 godina, u mnogim oblastima poput kulture, obrazovanja, sporta, turizma, primjene novih tehnologija te doprinese kreiranju novih investicijskih mogućnosti.

Bh. prijestolnica će zauzvrat Gradu Tianjinu, kulturnom i ekonomskom centru sjevera Kine i jednoj od najvećih svjetskih luka, pokloniti repliku sebilja. Planirano je da sebilj bude postavljen u jedan od najposjećenijih parkova u Tianjinu kojeg godišnje posjeti više od četiri miliona ljudi. Kao dio sporazuma o saradnji sa kineskim gradom pobratimom, raspisan je Javni poziv za nabavku izrade replike Sebilja, a gradovi s kojima Sarajevo ostvaruje saradnju nerijetko izražavaju interes za replikom ovog arhitektonskog blaga.

### ***Prijem delegacije Grada Erzuruma, Sarajevo, 20.12.2019.***

Delegaciju turskog Grada Erzuruma, koju je predvodio gradonačelnik Mehmet Sekmen, primili su pomoćnica gradonačelnika za obrazovanje, kulturu, sport i mlade Amina Deljković, direktor JP Sarajevo d.o.o. Ensar Eminović i gradski vijećnik Hazim Bahtanović u Vijećnici 20.12.2019.

Domaćini su kazali da Sarajevo i Erzurum, kao historijski i olimpijski gradovi, imaju komplementarne prednosti i ogroman potencijal za saradnju na obostranu korist njihovih građana.

Istaknuto je da gradske administracije Sarajeva i Erzuruma mogu brže i bolje surađivati i povezati se preko projekata u oblasti turizma, pogotovo zdravstvenog i banjskog, obrazovanja, zimskih sportova, kao i kroz razmjenu iskustava i dobrih praksi kad je riječ o zaštiti starih zanata i kulturno-historijskog naslijeđa.

Predstavnici Grada Sarajeva su i ovom prilikom izrazili zahvalnost gostima iz Erzuruma koji su u dva navrata iskazali prijateljski odnos kada je riječ o EYOF-u.

Gradonačelnik Erzuruma Sekmen je čestitao na izvrsnoj organizaciji EYOF-a 2019, te pozvao gradonačelnika Abdulaha Skaku da sa privrednom delegacijom uskoro posjeti ovaj grad, koji je u zadnjih nekoliko godina postao jedan od najznačajnijih zimskih turističkih odredišta u Turskoj i šire.

### **III. MEĐUNARODNI SKUPOVI**

#### ***FIS "Snow Queen Trophy" 2019 Zagreb, (Republika Hrvatska), 05.-06.01.2019.***

Na poziv gradonačelnika Zagreba Milana Bandića, gradonačelnik Sarajeva Abdulah Skaka prisustvovao je tradicionalnoj utrci Svjetskog skijaškog kupa FIS "Snow Queen Trophy" 2019 Zagreb/Sljeme, održanoj 05. i 06.01.2019. godine.

Zagreb je jedini glavni grad koji je domaćin utrke Svjetskog kupa, a utrke se uspješno održavaju još od 2005. godine.

#### ***Internacionalni seminar za muzičke i baletne pedagoge i umjetnike 2019, Dubrovnik (Republika Hrvatska), 14.-19.01.2019.***

Pomoćnica gradonačelnika za obrazovanje, kulturu, sport i mlade Amina Deljković prisustvovala je Internacionalnom seminaru za muzičke i baletne pedagoge i umjetnike 2019., održanom u Dubrovniku, 14.-19.01.2019.

#### ***Konferencija Connected Smart Cities, Brisel (Kraljevina Belgija), 17.01.2019.***

Generalnoj Skupštini mreže gradova Open and Agile Smart Cities i Connected Smart Cities koji su održani u Briselu 16. i 17.01.2019. prisustvovao je Šef službe za ekonomsko-finansijske i IT poslove u JP Sarajevo d.o.o. Tarik Hamzić.

Konferencija je iskorištena za ostvarivanje kontakata, razmjenu iskustava s ostalim akterima, predstavljanje aktivnosti Grada i JP Sarajevo, te pozicioniranje Grada Sarajeva kao poželjnog partnera za projekte iz ove oblasti.

#### ***Konferencija „Komunalna infrastruktura u novoj finansijskoj perspektivi 2021.-2027., Luksemburg, Njemačka, Belgija, 28.-30.01.2019.***

Peta konferencija o komunalnoj infrastrukturi s ciljem informiranja predstavnika lokalnih zajednica o novostima na području zakonodavstva, sektorskih politika i ulaganja u vodnom gospodarstvu, gospodarenju otpadom te smart city rješenjima u EU, održana je u Briselu, Luksemburgu, Kelnu i Frankfurtu od 28. do 30.01.2019.

Skupu je prisustvovalo 50 predstavnika gradova, komunalnih poduzeća i drugih subjekata iz BiH i Republike Hrvatske, a u ime gradonačelnika Sarajeva, konferenciji su prisustvovali Mirjana Đanović Stanić, šef Odsjeka za komunalne poslove i Amela Pašić, stručni savjetnik u Odsjeku za urbanizam Gradske službe za urbano planiranje, investicije, stambene i komunlane poslove.

Delegati su obišli komunalna postrojenja i lokacije, te infrastrukturne objekte s ciljem upoznavanja s njihovim funkcijom, upravljanjem, finansiranjem, pa i turističkom valorizacijom (spomen groblja), koji već funkcioniraju u skladu s najnovijim propisima EU vezanim za ovu oblast.

U procesu pristupanja EU, obaveza je i BiH primjena niza novih zakonodavnih rješenja koje je Brisel donio protekle godine, a koja se odražavaju i na planiranje, te upravljanje komunalnom infrastrukturuom, što zahtjeva kontinuirano ulaganje i dopunjavanje znanja u spomenutim područjima.

Delegacije su obišle lokalitete s komunalim pogonima u Luksemburgu, Briselu, Kelnu, a u Kongresnom centru na aerodromu u Frankfurtu nastavljen je konferencija s predstavnicima okolinskih udruženja i gradskih vlasti Frankfurta vezano za izazove upravljanja okolišem u

Njemačkoj, rješenjima vezanim za inicijativu pametni grad, mogućnost za međunarodnu saradnju i saradnju na projektima EU.

***Ceremonija otvorenja Evropskog olimpijskog festivala mladih (EYOF) 2019., Sarajevo, 10.02.2019.***

Na poziv Grada Sarajeva, svečanoj ceremoniji otvorenja Evropskog olimpijskog festivala mladih (EYOF) 2019, koji je održan na Olimpijskom stadionu „Asim Ferhatović - Hase“ 10.02.2019. godine, prisustvovali su: ambasador Irske za BiH sa sjedištem u Republici Sloveniji Myles Geiran, posebni Viši savjetnik gradonačelnika Zagreba Harun Omerbašić, samostalni savjetnik za sport u Sekretarijatu za kulturu i sport Grada Podgorice Nela Tatar, predstavnik Svjetske unije turskih općina (TDBB) Jahja Muhasilović, te višečlana delegacija Vlade Brčko distrikta BiH.

Povodom održavanja EYOF-a 2019, u Sarajevu je boravio i Matjaž Kranjc iz Skijaškog saveza Slovenije, kome je u periodu od 14. do 16.02. domaćin bio Nedžad Fazlija, Viši stručni saradnik u Službi za obrazovanje, kulturu, sport i mlade.

***7. Global Baku Forum, Baku (Republika Azerbejdžan), 14.-16.03.2019.***

Gradonačelnik Sarajeva Abdulah Skaka, šef Odjeljenja za kabinetske poslove i protokolarne poslove Ensar Eminović i predsjednik Savjeta gradonačelnika za Informativni centar i raniji gradonačelnik Ivo Komšić, prisustvovali su 7. Globalnom forumu u Bakuu koji je pod nazivom “Nova vanjska politika”, u organizaciji međunarodnog centra “Nizami Ganjavi”, održan u Bakuu (Azerbejdžan) od 14. do 16.03.2019.

Na marginama ovog događaja, delegacija se 15.03.2019. sastala sa gradonačelnikom pobratimskog grada Bakua Eldarom Azizovim, a susretu je prisustvovao i ambasador BiH Bakir Sadović.

Čelnici dva grada dogovorili su unapređenje saradnje i snažnije povezivanje ne samo administracija nego i građana. Tokom sastanka predloženo je da se, budući da u Sarajevu postoji ulica Grada Bakua i Park prijateljstva, u Bakuu napravi Park Sarajeva, te izgradi sarajevski sebilj kao simbol trajnog prijateljstva.

***Svečano otvorenje izložbe umjetnika Mersada Berbera, Doha (Država Katar), 26. - 29.03.2019.***

Gradonačelnik Sarajeva Abdulah Skaka, predsjedavajući Gradskog vijeća Igor Gavrić, raniji gradonačelnik i predsjednik Savjeta gradonačelnika za Informativni centar o MKSJ Sarajevo Ivo Komšić i šef Odjeljenja za kabinetske i protokolarne poslove Ensar Eminović, prisustvovali su svečanom otvorenju monumentalne izložbe umjetnika Mersada Berbera, koja je održana u Muzeju Katara Cultural Village, u Dohi (Država Katar) 28.03.2019.

***Prvi Međunarodni sastanak tour operatera „Meet Up Sarajevo“, Sarajevo, 28.03.2019.***

Grad Sarajevo je od 28.03. do 01.04.2019. bio domaćin 1. Međunarodnog sastanka tour operatera „Meet Up Sarajevo“, kojem su prisustvovale mnogobrojne agencije i tour operatori iz Europe, Sjeverne Amerike, Azije, sjeverne Afrike i regije.

Tim povodom, gradonačelnik Abdulah Skaka je upriličio gala prijem za učesnike i goste u Vijećnici 29.03.2019. Među njima je bio i legendarni fudbaler Luis Figo koji je, na poziv gradonačelnika Skake, stigao na ovaj jedinstveni događaj da podrži promociju Sarajeva kao turističke destinacije.

Sarajevska Vijećnica bila je mjesto prezentacija i povezivanja međunarodnih i regionalnih turističkih operatera, putničkih agencija i hotelijera s bh. turističkim radnicima kako bi uspostavili kontakte, razmijenili iskustva i otvorili put ka novim poslovnim aranžmanima, a sve s ciljem da Sarajevo bude što atraktivnija turistička destinacija.

Tokom boravka, tour operatori i gosti su obišli neke od najatraktivnijih turističkih lokacija, a potom se susreli s turističkim agencijama, vlasnicima agencija i tour operatorima iz BiH, kako bi uspostavili kontakte i direktnu poslovnu komunikaciju. Riječ je o pionirskom projektu koji bi trebao doprinijeti ukupnom turističkom rastu.

### ***Prvi Samit gradonačelnika glavnih gradova država Jugoistočne Evrope, Sarajevo, 05.04.2019.***

Gradonačelnik Sarajeva Abdulah Skaka bio je domaćin *Prvog Samita gradonačelnika glavnih gradova država Jugoistočne Evrope*, koji je održan u zgradi Parlamentarne Skupštine BiH 05.04.2019.

Samitu su prisustvovali Zoran Janković, gradonačelnik Ljubljane, Petre Shilegov, gradonačelnik Skoplja, Erion Veliaj, gradonačelnik Tirane, Fadilj Eminović, član Gradskog vijeća Beograda, Slađana Vujačić, zamjenica gradonačelnika Podgorice, dok je gradonačelnik Zagreba Milan Bandić uputio Pismo podrške. Počasni gost Samita bio je gradonačelnik Kuala Lumpura Dato' Nor Hisham A Dahlan.

Jedan od zaključaka je da su se učesnici Samita u Sarajevu opredijelili za intenziviranje saradnje i kontinuirano povezivanje glavnih gradova regije te uspostavljanje formalnog okvira za saradnju pod motom "Gradovi bez granica". Također, obavezali su se da će ovakve susrete imati najmanje jednom godišnje, uz domaćinstvo jednog od gradova učesnika.

Zaključeno je da su glavni gradovi regije generatori su razvoja, lideri napretka i sidra stabilnosti cijele regije, stoga će gradonačelnici raditi na promociji zajedničkih vrijednosti i uspjeha, živjeći zajedno i poštujući sve različitosti s ciljem poboljšanja kvaliteta života naših građana. Dogovorena je intenzivna razmjena iskustava u različitim oblastima s fokusom na primjenu pametnih rješenja u razvoju glavnih gradova.

Gradonačelnici su stava da se izbor gradonačelnika treba vršiti na direktnim izborima i da to prati povećanje budžeta, prava i ovlasti gradonačelnika, a sve za dobrobit građana glavnih gradova.

Gradonačelnici su, također, ukazali na potrebu boljeg transportnog povezivanja, posebno uspostavljanje redovnih avionskih veza između glavnih gradova te podržali inicijativu za ukidanje troškova roaminga u regiji. Pozvali su vlade da pozitivno rade i djeluju, da se podržavaju i pomažu s ciljem uključivanja svih država regije u EU s čime bi se postiglo poboljšanje života građana i trajni mir i stabilnost u regiji.

### ***Konferencija „Dan gradova“, Ženeva (Švicarska), 07.-09.04.2019.***

Gradonačelnik Sarajeva Abdulah Skaka i šefica Kabineta gradonačelnika Erna Čolić, sudjelovali su na Konferenciji „Dan gradova“ koja je u organizaciji Ekonomske komisije za Europu Ujedinjenih naroda (UNECE) održana u sjedištu Ujedinjenih nacija u Ženevi 08. i 09.04.2019.

Gradonačelnici više od 50 gradova razgovarali su o primjeni novih tehnologija i formiranju efikasnijih javnih uprava fokusiranih na dobrobit građana.

Tokom razgovora na temu "Pogled u budućnost i razvoj politika kojima se poboljšava efikasnost gradskih službi", ukazao je na činjenicu da nije dovoljno samo imati strategije razvoja pametnih gradova nego ih pretočiti u konkretna djela.

***Gala večera Savjetodavnog vijeća za BiH (ACBiH), Washington (SAD), 13.04.2019.***

Na poziv Savjetodavnog vijeća za BiH (ACBiH) gradonačelnik Sarajeva Abdulah Skaka prisustvovao je gala večeri u Whitemore House u Washingtonu, DC, na kojoj je bilo blizu 170 gostiju iz cijelog svijeta, uključujući visoke dužnosnike i diplomate iz SAD i BiH. Uz Ambasadu BiH, prisutni su bili i predstavnici ambasada Saudijske Arabije i Turske. Također su bili prisutni i dužnosnici State Departmenta, Matthew Palmer, zamjenik državnog tajnika u Uredu za evropska i evroazijska pitanja zadužen za Zapadni Balkan i Egejsko more, te Senad Sofić, guverner Centralne banke.

Obrativši se zvanicama gradonačelnik Abdulah Skaka istakao je da BiH i Sarajevo prepoznaju i cijene nemjerljivu ulogu SAD u odbrani i izgradnji države. Ukazao je na zajedničku promociju ujedinjene, multietničke i demokratske BiH, te podsjetio na projekat kojim će Sarajevo biti očišćeno od mina do septembra 2020. godine.

Priznanja za sve što su učinili za BiH, posebno na njezinom putu ka stabilnoj državi koja stremi EU i NATO članstvu ove ugledne organizacije dobili su senator John McCain (posthumno), ambasadorice Swanee Hunt i Maureen Cormack, general major Linda L. Singh, kapetanica Maida Kalic Zheng i dr. Mahira Tanović.

***Konferencija "Podrška kulturi u globalnom svijetu: uloga privrednih i državnih aktera, Sarajevo, 09.05.2019.***

Na poziv Ambasade Mađarske, zamjenik gradonačelnika Ivica Šarić učestvovao je u panel diskusiji u okviru Konferencije "Podrška kulturi u globalnom svijetu: uloga privrednih i državnih aktera, održane u Radon Plaza Hotelu u Sarajevu 09.05.2019.

***58. Bijenale savremene umjetnosti, Venecija (Republika Italija), 09.05.2019.***

Izložba velikog umjetničkog ciklusa "Zagrljaji" maestra Safeta Zeca otvorena je u Veneciji u prostorijama crkve "Santa Maria della Pieta" 09.05.2019., na samom početku 58. Venecijanskog bijenala savremene umjetnosti pod nazivom „Da živite u zanimljivom vremenu“.

Delegacija Grada Sarajeva na čelu sa gradonačelnikom Abdulahom Skakom prisustvovala je ovom značajnom kulturnom događaju koji je na svjetskoj umjetničkoj sceni prvi put prikazao i djelo inspirirano i posvećeno tragičnoj smrti Admir Ismić i Boška Brkića, sarajevskih Romea i Julije.

Gradonačelnik Skaka je zahvalio administraciji Grada Venecije koja je bila prisutna na otvaranju sa željom da *Zagrljaj* svoje konačno utočište pronađe u Sarajevu, kao svjedok vremenu i umjetniku koji duboko u sebi živi svakodnevno, njegujući osjećaj koji naš grad svrstava u red velikih gradova, u kojima se isprepliću različitosti i temelje primjeri života, posebno važnih u vremenu današnjice za cijeli svijet.

Delegaciju Grada Sarajeva činili su zamjenica predsjedavajućeg Gradskog vijeća Mira Jurić, gradski vijećnici Nuko Grebović, Sanela Holjan, Velija Katica, Miro Lazović, Bajro Biber, Srđan

Srdić, rukovodilac Stručne službe gradonačelnika Maja Hadžihalilović, pravobranilac Grada Sarajeva Sanjin Smajlović, press Grada Tarik Lazović, viši referent za protokol Denis Kovačević.

### ***Peti Međunarodni dan joge IDY, Sarajevo, 15.06.2019.***

Peti Međunarodni dan joge u BiH organizirala je Ambasada Indije sa sjedištem u Mađarskoj, uz podršku Grada Sarajeva, u Domu mladih Skenderija, 15.06.2019.

Govoreći o dobrobiti za um, tijelo i duh koje prakticiranje joge donosi, ambasador Republike Indije za BiH Rahul Chhabra, podsjetio je da su UN 2014. odlučile o proglašenju 21. juna kao Međunarodnog dana joge, s podrškom 177 država. Od 2015. Ambasada Indije svake godine organizira u Sarajevu obilježavanje Međunarodnog dana joge.

Ambasador je naglasio da je ovogodišnji događaj posvećen jačanju prijateljskih veza i partnerskih odnosa Indije i BiH. Zamjenik gradonačelnika Milan Trivić istaknuo je da Grad Sarajevo podržava ovu manifestaciju koja, između ostalog, doprinosi saradnji naše dvije države.

Nakon Sarajeva, manifestacija je nastavljena u Mostaru i Banja Luci.

### ***6. Evropska konferencija o planovima održive urbane mobilnosti - SUMP, Groningen (Kraljevina Nizozemska), 17.-18.06.2019.***

U organizaciji Otvorenog regionalnog fonda za Jugoistočnu Evropu - Energetska efikasnost (ORF SEE-EE), zamjenik gradonačelnika Milan Trivić sudjelovao je na 6. Evropskoj konferenciji o planovima održive urbane mobilnosti – SUMP, koja je održana u nizozemskom gradu Groningenu 17. do 19.06.2019. godine.

Konferencija je bila posvećena održivim i aktivnim gradovima. Radi se o vodećem godišnjem događaju u Evropi koji je namijenjen svim subjektima koji su uključeni u uspostavljanje koncepta održive urbane mobilnosti u praksi. Konferencija predstavlja forum za umrežavanje kreatora politika, stručnjaka i istraživača kako bi vodili debate o ključnim pitanjima i razmijenili ideje o dostupnim rješenjima.

### ***Konferencija na temu digitalizacije, Beč, 18.-19.06.2019.***

Konferencija europskih gradova o digitalizaciji, u organizaciji Grada Beča, održana je u Beču 18. i 19.06.2019. U okviru teme razmatrane su sljedeće tačke: digitalni humanizam/digitalna prava, e-uprava, upotreba umjetne inteligencije na komunalnom/gradskom nivou.

U radu konferencije učešće su uzeli predstavnici Beča, Budimpešte, Krakova, Bratislave, Praga, Ljubljane, Zagreba, Beograda, Sofije, a u ime Grada Sarajeva šef Odsjeka za informatičku podršku Ammar Makić.

### ***25. Sarajevo Film Festival - Panel diskusija "Mreža kreativnih gradova", Sarajevo, 17.08.2019.***

Jubilarni 25. Sarajevo Film Festival (SFF) održan je od 16. do 23.08.2019., a ceremoniji otvaranja 17.08. prisustvovali su gradonačelnici Zagreba, Podgorice i Raba, te predstavnice Grada Pule.

U okviru festivalskog programa CineLink Talks, osnivač Sarajevo Film Festivala Udruženje građana Obala Art Centar u saradnji s Gradom Sarajevom, organizirao je panel diskusiju na temu "Kreativni gradovi", u hotelu Europe 17.08.2019.



Na panelu, na kojem je naglašena važnost kreativne industrije koja je pokretač urbanog razvoja gradova, učešće su uzeli Mirsad Purivatra, direktor SFF, David Wilson, direktor Bradford grad filma UNESCO, te Larisa Halilović, direktorica British Councila.

Panelu su pored gradonačelnika Sarajeva prisustvovali gradonačelnici Podgorice i Raba, Ivan Vuković i Nikola Grgurić, pročelnica Upravnog odjela za kulturu Grada Pule Jasmina Nina Kamber i Viša savjetnica za kulturu i civilno društvo Lena Radunić.

Inače, saradnja Grada Sarajeva i SFF-a odvija se kroz projekte u različitim oblastima, od kojih izdvajamo aplikaciju za kandidaturu za titulu *UNESCO kreativni grad filma*.

#### ***Godišnji susret partnerskih organizacija Fondacije Konrad Adenauer, Zenica, 29.-30.08.2019.***

Fondacija Konrad Adenauer - Ured u Sarajevu (KAS), organizirala je godišnji susret partnerskih organizacija Fondacije, koji je održan u Zenici 29.-30.08.2019.

Obzirom da Gradska služba službi za europske integracije i EU fondove saraduje sa KAS-om na implementaciji Projekta Informativnog centra o MKSJ Sarajevo, događaju je prisustvovala pomoćnica gradonačelnika za europske integracije i EU fondove Mila Eminović – Rizvanović, a drugi učesnik je bila pomoćnica gradonačelnika za finansije Amela Kolovrat, koja se upoznala sa procedurama finansiranja projekata od strane Fondacije.

Prisustvo ovom susretu je bilo od koristi jer je to bila jedinstvena prilika za informisanje o projektima KAS-a i što uspješnijem implementiranju postojećih projekata sa KAS-om, te upoznavanje sa širokom mrežom partnera KAS-a (vladin i nevladin sektoru BiH).

#### ***Sastanak bratskih gradova Burse, Bursa (Republika Turska), 09. -14.09.2019.***

U cilju razvoja zajedničkih kulturoloških i ekonomskih odnosa između Sarajeva i Burse, delegacija Grada Sarajeva koju su činile šefica Kabineta gradonačelnika Erna Čolić, pomoćnica gradonačelnika za obrazovanje, kulturu, sport i mlade Amina Deljković, i gradska vijećnica Sanela Holjan, prisustvovala su sastanku bratskih gradova Burse koji je održan u Bursi od 09. do 14.09.2019.

#### ***Međunarodni mirovni susret "Mir bez granica. Religije i kulture u dijalogu", Madrid (Kraljevina Španija), 15.-17.09.2019.***

Međunarodni mirovni susret pod nazivom "Mir bez granica. Religije i kulture u dijalogu", u organizaciji Zajednice „Sant' Egidio“, održan je u Madridu u periodu od 15. do 19.09.2019.

Ova konferencija okupila je eminentne političke i vjerske predstavnike brojnih država, a ispred Grada Sarajeva konferenciji su prisustvovali zamjenik gradonačelnika Milan Trivić i stručna saradnica Azra Šišman.

Zamjenik gradonačelnika Trivić je imao izlaganje na panelu "Živjeti zajedno u gradu", a na panelima su obraćanja imali i gradonačelnik Madrida José Luis Martínez-Almeida i ministar vanjskih poslova Španije Josep Borrell.

Tokom ceremonije zatvaranja, Trivić se susreo sa novoimenovanim gradonačelnikom Madrida kojeg je pozvao da bude gost Grada Sarajeva.

### ***Svečanost otvaranja festivala „Ja BiH... 5 dana Sarajeva u Zagrebu 2019“, 07.10.2019.***

U organizaciji Udruženja za promicanje kulture i umjetnosti “Ja BiH”, Hrvatskog kulturnog društva Napredak i Napretkovog kulturnog centra iz Zagreba, pod pokroviteljstvom Grada Zagreba, održano je svečano otvorenje 8. Festivala „Ja BiH...Pet dana Sarajeva u Zagrebu 2019“, u zagrebačkom Muzeju Mimara 07.10.2019.

Na poziv predsjednika Udruženja kulture i umjetnosti “Ja BiH” Ismeta Efendića, događaju je prisustvovao zamjenik gradonačelnika Ivica Šarić.

### ***Sarajevo Innovation Summit, Sarajevo, 10.10.2019.***

Najznačajniji regionalni događaj o inovacijama “Sarajevo Innovation Summit 2019” održan je 10.10.2019. u Vijećnici, u organizaciji Ekonomskog fakulteta Univerziteta u Sarajevu. Na Samitu su se okupili najznačajniji europski stručnjaci interaktivnih platformi koji mogu donijeti pravu revoluciju u ovoj sferi, te omogućiti prenos najboljih praksi i promociju inovativnog kapaciteta cijele akademske zajednice.

Grad Sarajevo podržava i osnažuje mlade koji će doprinijeti promjenama u BiH i regionu, te unaprijediti okruženje koje će biti stimulatивно za inovacije i poduzetničku aktivnost.

Podršku Sarajevo Innovation Summit-u pružili su Grad Sarajevo, Ambasada Kraljevine Švedske, Švedski institut, Federalno ministarstvo obrazovanja i nauke, Institut za razvoj mladih KULT, kao i Privredna komora KS, Bosna Bank International d.d., UNDP BiH, Međunarodni aerodrom Sarajevo, Švedska trgovinska komora i SBF Start – up Challenge.

### ***Manifestacija obilježavanja 830. godišnjice Povelje Kulina Bana, 11.-12.10.2019.***

Na poziv organizacije Bosanskog akademskog društva u Austriji, gradonačelnik Sarajeva Abdulah Skaka učestvovao je na manifestaciji povodom obilježavanja 830. godišnjice Povelje Kulina bana. U programu su učestvovali Željko Komšić, predsjedavajući Predsjedništva BiH, Kemal Kozarić, ambasador BiH u Austriji, Michael Ludwig, gradonačelnik Beča, Christoph Hatschek, zamjenik direktora Austrijskog vojnog muzeja i Dževad Karahasan, univerzitetski profesor i pisac.

U svom obraćanju, gradonačelnik Skaka je, između ostalog, istakao kako ovaj skup svjedoči i šalje snažnu poruku o više od hiljadu godina historije, političkog, pravnog i kulturnog kontinuiteta BiH.

### ***“Sarajevo Unlimited 2019“, Sarajevo, 22.-24.10.2019.***

Četvrto izdanje regionalnog foruma inovacija, tehnologije i poduzetništva Sarajevo Unlimited, sa fokusom na razvoj pametnih gradova, održao se od 22. do 24.10.2019.

Grad Sarajevo je prihvatio i već tradicionalno daje veliku podršku ovom projektu kao generatoru inovacija i razvoja startup scene, a gradska administracija aktivno radi na tome da Sarajevo postane jedan od takvih “pametnih” gradova.

Pored glavne teme, posebna pažnja bila je posvećena i temama Internet of Things (IoT), digitalizacija turističke ponude, e-government, cybersecurity, razvoj poduzetništva, Fintech, zaštita podataka i njihova sigurnost u skladu sa standardima u svijetu.

#### ***4. Samit gradonačelnika glavnih gradova Srednje i Istočne Evrope i NR Kine 17+1, Tirana (Republika Albanija), 23.-25.10.2019.***

4. Samitu gradonačelnika glavnih gradova Srednje i Istočne Evrope i NR Kine 17+1, održanom u Tirani 23. do 25.10.2019. prisustvovala je delegacija Grada Sarajeva koju su činili Milan Trivić, zamjenik gradonačelnika, Aida Koristović, stručna savjetnica za pripremu projekata iz oblasti kulture i Denis Kovačević, viši referent za međunarodne odnose i protokol.

Tema Samita bila je „Održivi urbani razvoj“. Inicijativa NR Kine 17+1 pokrenuta je 2012. i ima za cilj povećanje i proširenje saradnje sa zemljama centralne i istočne Evrope na području ulaganja, transporta, finansija, nauke, obrazovanja i kulture.

Učesnici Samita razmijenili su mišljenja o izazovima sa kojima se suočavaju njihovi gradovi, podijelili iskustva o upravljanju gradom i zaštiti okoliša, te razgovarali o projektima „zelenih gradova“, urbanizma i otpornosti urbanih gradova.

Samit je okončan zaključcima i usvajanjem zajedničke deklaracije koje je prezentirao gradonačelnik Tirane Erion Veliaj. Usvajanjem Deklaracije gradovi su se složili promovirati ekološko upravljanje gradom, a Kineski-CEEC samit gradonačelnika će biti platforma za razmjenu iskustava u pogledu urbanog upravljanja, poboljšanje kapaciteta i učinkovitosti upravljanja. Deklaraciju su potpisali prisutni gradonačelnici odnosno zamjenici gradonačelnika Tirane, Pekinga, Sarajeva, Skoplja, Beograda i Podgorice.

Grad Sarajevo je proglašen domaćinom 5. Samita gradonačelnika glavnih gradova Srednje i Istočne Evrope i NR Kine 17+1, koji će se održati u Sarajevu 2020.

Zamjenik gradonačelnika Trivić imao je izlaganje u okviru plenarne sjednice na temu Green City, kao i obraćanje nakon usvajanja Deklaracije i tom je prilikom pozvao predstavnike gradova i privrednike na 5. Samit koji će se održati u glavnom gradu BiH.

Tokom prijema koji je gradonačelnik Tirane upriličio 25.10.2019. za zvaničnike i delegacije glavnih gradova, razgovarano je o aktuelnoj političkoj situaciji, problemima lokalnih vlasti, razvojnim projektima te mogućnostima i benefitima saradnje Tirane sa Pekingom i Kinom. Nakon prijema, gradonačelnici i zamjenici gradonačelnika glavnih gradova zajedno sa gradonačelnikom Tirane i zamjenikom gradonačelnika Pekinga, zasadili su po drvo na Trgu Skenderbega.

Delegaciju Grada Sarajeva ugostio je počasni konzul BiH u Albaniji Fiqiri Killari, sa kojim je razgovarano o saradnji između Bošnjačke/BH zajednice i institucija BiH.

Zamjenik gradonačelnika Trivić sastao se sa gradonačelnikom Podgorice Ivanom Vukovićem, koji je pozvao zvaničnike Grada Sarajeva da budu gosti na obilježavanju 19. decembra - Dana grada Podgorice i da učestvuju na Prvom podgoričkom investicionom forumu.

Prilikom susreta delegacije Grada Sarajeva sa predstavnicima Privredne komore KS, između ostalog, razgovarano je o mogućnostima i modelu saradnje s ciljem uspješne organizacije narednog 5. Samita.

Zamjenici gradonačelnika Sarajeva i Pekinga, Milan Trivić i Lu Yan, razgovarali su o organizaciji 5. Samita i predstojećim aktivnostima.

Delegacija Grada Pekinga i CEEC posjetit će Grad Sarajevo, oko dva mjeseca prije održavanja, kao bi utvrdili lokacije i druge aspekte organizacije 5. Samita.

**48. Generalna skupština Evropskog olimpijskog komiteta (EOC), Varšava (Republika Poljska), 25.-26.10.2019.**

48. Generalna skupština Evropskog olimpijskog komiteta (EOC) u sklopu koje je podnešen finalni izvještaj za EYOF 2019., održana je u Varšavi 25. i 26.10.2019.

Na poziv Predsjednika i Generalnog sekretara Evropskog olimpijskog komiteta, događaju je prisustvovala delegacija Grada Sarajeva koju su činili gradonačelnik Abdulah Skaka, rukovodilac Stručne službe gradonačelnika Maja Hažihalilović, pomoćnica gradonačelnika za finansije Amela Kolovrat, i predstavnik EYOF-a d.o.o. Željka Trnčić.

Podnošenjem Izvještaja o EYOF-u 2019., okončana je posljednja obaveza prema EOC-u. Izvještaj je prihvatilo 50 zemalja. Organizacijom EYOF-a, gradovi Sarajevo i Istočno Sarajevo stekli su ugled i otvorili vrata za naredne događaje.

Na Generalnoj skupštini obratili su se i predsjednik EOC-a Janez Kocijančič, te predsjednik Koordinacijske komisije EYOF-a Jozef Liba, koji su naglasili da je EYOF 2019 uz odličnu organizaciju, poslao snažnu poruku sa ovih prostora.

Prema riječima Kocijančiča, to je jedan od najznačajnijih bh. projekata koji nije samo najveće sportsko takmičenje od Zimskih olimpijskih igara 1984., već i izvanredna platforma za zbližavanje ljudi i jačanje sportskog sistema naše zemlje.

**Međunarodna konferencija „Poređenje multietničkih društava u postkonfliktnim okruženjima“, Liban (Bejrut), 02.-03.12.2019.**

Fondacija Konrad Adenauer-Liban u saradnji sa Fondacijom Konrad Adenauer-BiH, koja je partner Grada Sarajeva na dva projekta Informativnog centra o MKSJ Sarajevo (opremanje biblioteke, izada i postavka izložbe „Prikaz rada MKSJ“) organizovala je međunarodnu konferenciju u Libanu (Bejrut) 02. i 03.12.2019. pod nazivom „Poređenje multietničkih društava u postkonfliktnim okruženjima.

Konferenciji je prisustvovala pomoćnica gradonačelnika za evropske integracije i EU fondove Mila Eminović-Rizvanović, koja je bila izlagač na dvije radionice sa temama: „Ratni tribunali: MKSJ“ i „Bosna i Hercegovina: očuvanje ratnih sjećanja: nacionalni praznici, muzeji i simboli“, u okviru koje je predstavila muzejsku komponentu mandata Informativnog centra o MKSJ Sarajevo.

Konferencija je bila od izuzetnog značaja radi osnaživanja partnerskih odnosa sa Fondacijom Konrad Adenauer-BiH, prilika za promociju države, Grada Sarajeva i rada Informativnog centra o MKSJ Sarajevo, te uspostavu značajnih kontakata sa ostalim učesnicima iz BiH, Libana i Iraka.

**19. Međunarodni ekonomski forum, Dubrovnik (Republika Hrvatska), 05.-06.12.2019.**

Konsultantska kuća Revicon d.o.o. Sarajevo, organizirala je 19. Međunarodni ekonomski forum na temu “Korporativno upravljanje”. Forum koji je bio namijenjen poslovnim liderima u privatnom i javnom sektoru, predstavnicima vlada, finansijskog sektora i akademske zajednice, održan je u Dubrovniku, 05.-06.12.2019.

Forumu su prisustvovali gradonačelnik Sarajeva Abdula Skaka, predsjedavajući Gradskog vijeća Igor Gavrić, zamjenica predsjedavajućeg Gradskog vijeća Edina Gabela, gradski vijećnici Nuko Grebović, Miro Lazović, Tea Mušić, pravobranilac Grada Sarajeva Sanjin Smajlović.

Događaju je, među ostalim zvanicama, prisustvovao i bivši predsjednik Republike Sjeverne Makedonije Branko Crvenkovski, kome je predsjedavajući Gradskog vijeća Igor Gavrić, u ime Grada Sarajeva, predložio da se kandiduje za dodjelu priznanja „Počasni građanin Grada Sarajeva“. Branko Crvenkovski je prihvatio prijedlog, te potpisao izjavu o prihvatanju kandidature za pomenuto priznanje koje se dodjeljuje građanima BiH i stranim državljanima koji su ostvarili naročit doprinos razvoju i afirmaciji Grada, te razvoju međunarodnih i međuljudskih odnosa na načelima solidarnosti, demokratičnosti, humanosti i tolerancije među ljudima.

### ***Diplomatski zimski bazar, Sarajevo, 07.12.2019.***

Diplomatski zimski bazar, čija je misija prikupljanje sredstava za humanitarne svrhe, uspješno je održan 07.12.2019. u Centru Skenderija u Sarajevu. Na Bazaru je učestvovalo više od 40 ambasada i međunarodnih organizacija, te više od 80 domaćih izlagača i nevladinih udruženja.

Diplomatski zimski bazar je manifestacija koja je prerasla u jedan od najvećih humanitarnih događaja čiji je cilj prikupljanje sredstava za podršku udruženjima i inicijativama koje se bave pitanjima socijalne zaštite i obrazovanja.

Sada već tradicionalno, na štandu Grada Sarajeva, prezentovane su, ali i prodane raznovrsne delicije, suveniri, literatura, razglednice i nakit. Osim gradskog, Bazar je ponudio brojne sadržaje za sve generacije na štandovima brojnih izlagača iz cijelog svijeta.

Podršku organizaciji Diplomatskog zimskog bazara i ove godine pružili su Kanton i Grad Sarajevo.

### ***12. Međunarodni forum sportske fondacije „Peace and Sport“, Monako (Kneževina Monako), 11.-13.12.2019.***

Gradonačelnik Sarajeva Abdulah Skaka i Olimpijski komitet BiH dobili su 12.12.2019. veliko svjetsko priznanje u Monaku za „diplomatsku akciju godine u svijetu“ a zbog uspješne organizacije Evropskog olimpijskog festivala za mlade – EYOF u februaru 2019. godine.

Nagradu je u ime ugledne svjetske sportske fondacije „Peace and Sport“ gradonačelniku Skaki uručio Princ Albert Drugi od Monaka. Ona se svake godine pod pokroviteljstvom princa Alberta Drugog dodjeljuje organizaciji, pojedincima ili instituciji koja je učinila „značajne korake naprijed u primjeni diplomatije kroz sport.

Značajno svjetsko priznanje, koje je prošle godine uručeno američkom State departmentu, u prisustvu velikog broja zvaničnika, bivših i sadašnjih sportista, predsjednika sportskih asocijacija, predstavnika vlada i država, za Grad Sarajevo i OK BiH ozvaničeno je na gala svečanosti u operi u Monte Karlu.

Dodjela nagrada je vrhunac trodnevnog Foruma na kojem se okupilo više od 600 ključnih donosioca odluka, uključujući šefove država, strateške vođe iz poslovnog i sportskog svijeta, dobitnike Nobelove nagrade za mir, predstavnike civilnog društva i međunarodnih organizacija i sjajne mlade talente.

„Peace and Sport“ je međunarodna i nezavisna organizacija sa sjedištem u Monaku, koja promiče mir koristeći snagu sporta. Osnovao ju je 2007. godine Joël Bouzou, osvajač olimpijske medalje u petoboju i bivši svjetski prvak, koji je na čelu Svjetske asocijacije olimpijaca koja okuplja više od 147.000 bivših i sadašnjih olimpijaca.

Nakon dodjele nagrade, gradonačelnik Skaka pozvao je princa Alberta II od Monaka da posjeti naš grad i BiH, te je princu uručio i poklon Grada Sarajeva.

Delegaciju Grada Sarajeva činili su i rukovodilac Stručne službe gradonačelnika Maja Hadžihalilović i stručni saradnik za kulturu Aida Koristović.

#### ***Prva regionalna Smart City konferencija, Ljubljana (Republika Slovenija), 19.-20.12.2019.***

Prvoj regionalnoj Smart City konferenciji, koja je održana u Ljubljani 20.12.2019., prisustvovali su pravobranilac Grada Sarajeva Sanjin Smajlović i šef Odsjeka za informatičke poslove Ammar Makić.

Ammar Makić je u sklopu panel prezentacija održao prezentaciju aktivnosti Grada Sarajeva iz proteklog perioda, koja je izazvala veliko interesovanje publike.

Na marginama Konferencije, predstavnici Grada Sarajeva imali su korisne razgovore sa ostalim učesnicima, tako da je direktor mreže Open & Agile Smart Cities, koje je Grad Sarajevo član od 2015., iskazao interesovanje za nastavak saradnje sa Gradom Sarajevom. Direktor IT Asocijacije ZITex - Ljubljana Ernest Žejn predložio je organizaciju „Demo dana“ na kojima bi Grad Sarajevo predstavio projekte, i na koje bi bila pozvana grupa investitora - potencijalnih investitora daljnjeg razvoja započetih projekata.

#### ***Otvorenje međunarodnog Sajma knjige u Bursi (Republika Turska), 20-21.12.2019.***

Tokom službene posjete Bursi, gradonačelnik Sarajeva Abdulah Skaka prisustvovao je 21.12.2019. otvorenju *Međunarodnog sajma knjige* na kojem je BiH bila počasni gost, a bh. književnici posebno predstavljeni.

Gradonačelnik Skaka je imao bilateralni susret sa gradonačelnikom Burse Alinurom Aktašem, tokom kojeg je zaključeno da dva grada pobratima imaju sadržajne i dobre odnose, ali da isti mogu biti dodatno unaprijeđeni. Gradonačelnik Burse je najavio svoju posjetu Sarajevu u februaru 2020. Jedan od prijedloga za saradnju je obuka Gorske službe spašavanja JP Sarajeva, te predstavljanje bh. umjetnika na posebno posvećenju izložbi u Bursi, kao i saradnja na inicijativi otvaranja Tehnološkog parka u Sarajevu.

S tim u vezi delegacija je zajedno sa ambasadorom BiH u Turskoj Bakirom Sadovićem obišla Tehnološki park u Bursi te razgovarala sa direktoricom centra o načinima saradnje.

U pratnji gradonačelnika bila je i Azra Šišman, stručna saradnica u Odjeljenju za međunarodnu saradnju i protokol i Sanjin Teparić

#### **IV. SARADNJA S DIPLOMATSKO-KONZULARNIM PREDSTAVNIŠTVIMA**

##### ***Prijem ambasadora Republike Slovačke Nj. E. Martina Kače, Sarajevo, 24.01.2019.***

Ambasador Republike Slovačke Martin Kačo zahvalio se gradonačelniku na prijemu i naveo da Slovačka, kao dio Višegradske četvorke (koju čine četiri zemlje: Slovačka, Češka, Poljska, Mađarska) dugoročno podržava napore BiH na njenom putu prema EU i NATO integracijama.

Istakao je da Višegradska četvorka zajedno s Ambasadom Japana implementira projekt energetske efikasnosti u OŠ „Saburina“ čime će se mjesečni troškovi grijanja smanjiti za 75% i doprinijeti smanjenju zagađenja, te pozvao gradonačelnika da prisustvuje otvaranju prve faze projekta 04.02.2019.

Gradonačelnik je prihvatio poziv i izrazio zadovoljstvo što je saradnja između Ambasade Slovačke i Grada Sarajeva na zavidnom nivou i uvjerenje da je ovo tek jedan od mnogih uspješnih projekata.

Gradonačelnik je pozvao ambasadora na otvaranje EYOF-a, na kojem će se takmičiti i delegacija sportista iz Slovačke.

Obje strane su izrazile želju za produbljivanjem saradnje između dva glavna grada, Sarajeva i Bratislave. S tim u vezi, ambasador Kačo je predložio da gradonačelnik dođe u službenu posjetu gradonačelniku Bratislave.

Gradonačelnik je pozvao ambasadora da prisustvuje koncertu Budimpeštanske filharmonije 9. maja, na godišnjicu obnove Vijećnice i Dan Evrope, te predložio da 2020. godine za Dan Evrope nastupi Slovačka filharmonija.

##### ***Prijem ambasadora Republike Francuske Nj. E. Guillaume Roussona, Sarajevo, 24.01.2019.***

Gradonačelnik Abdulah Skaka je poželio dobrodošlicu ambasadoru Republike Francuske Roussonu i upoznao ga s projektom osnivanja Informativnog Centra Međunarodnog krivičnog suda za bivšu Jugoslaviju. Zahvalio se Republici Francuskoj na njenom angažmanu i podršci u najtežim trenucima za Grad Sarajevo i BiH.

Ambasador Rousson je rekao da je Francuska privržena međunarodnoj krivičnoj pravdi i da će mu biti zadovoljstvo obići Informativni centar i vidjeti autentičnu sudnicu Međunarodnog krivičnog suda. Izrazio je zadovoljstvo vidljivim rezultatima u oblasti turizma i naveo da je postoje mnogi turistički potencijali u gradu Sarajevu i njegovoj okolini koji još uvijek nisu dovoljno iskorišteni, posebno u oblasti ljetnog turizma. Upoznao je gradonačelnika s nedavnom posjetom jedne francuske razvojne banke koja se bavi investicijama u oblasti turizma, vodosnabdijevanja i sl.

Gradonačelnik je upoznao ambasadora s projektom uređenja skijaške staze na Trebeviću, a ambasador je izrazio spremnost da upozna francuske investitore s tim projektom te istakao da su inženjeri iz Francuske zainteresirani za Trebević.

Bilo je riječi i o mogućnosti da 2020. Grad Sarajevo bude domaćin Pariške filharmonije za Dan Evrope, jer se te godine obilježava 25 godina od potpisivanja Pariškog sporazuma i kraja rata u BiH. Ambasador je rekao da će o tehničkim mogućnostima organizacije koncerta razgovarati sa savjetnikom za kulturu u Ambasadi Francuske.

Gradonačelnik je izrazio želju za jačanje saradnje između Sarajeva i Pariza, i s tim u vezi predložio da se organizira sastanak s gradonačelnicom Pariza Anne Hidalgo. Ambasador Rousson je podržao.

taj prijedlog i rekao da će vrlo rado pomoći u organizaciji tog sastanka i da vjeruje da će dobiti pozitivan odgovor.

Nakon prijema, ambasador je posjetio prostorije Informativnog centra MKSJ-a u pratnji predsjednika Savjeta gradonačelnika za Informativni centar MKSJ-a Ive Komšića, koji je također prisustvovao sastanku.

### ***Prijem ambasadora Velike Britanije Nj. E. Matthewa Fielda, Sarajevo, 04.02.2019.***

Gradonačelnik Sarajeva Abdulah Skaka primio je 04.02.2019. ambasadora Velike Britanije Matthewa Fielda, koji je čestitao gradonačelniku na rezultatima njegovog rada i vidljivim pozitivnim promjenama u gradu u protekle dvije godine.

Gradonačelnik je upoznao ambasadora s inicijativom za posthumnu dodjelu 6. aprilske nagrade princezi Diani koju je uputila udruga žena žrtava mina, te upitao ambasadora kakav bi bio službeni stav Velike Britanije u vezi s navedenom inicijativom. Ambasador je rekao dostaviti Gradu Sarajevu zvaničan odgovor Londona u vezi sa inicijativom.

Gradonačelnik je također upoznao ambasadora sa inicijativom "Sarajevo bez mina" za uklanjanje mina u sarajevskoj regiji do 2020., koju Grad Sarajevo implementira sa fondacijom Marshall Legacy Institute iz Washingtona, te naglasio da je to međuentitetski projekt koji uključuje gradske općine Novi Grad i Stari Grad, te općinu Vogošća, Istočni Stari Grad i Istočnu Ilidžu.

Ambasador Field je izrazio interes Velike Britanije za radom na zajedničkim projektima, posebno onim koji se tiču rekonstrukcije i modernizacije komunalnih poduzeća GRAS i ViK, te naglasio da je za implementaciju tih projekata potrebna koordinacija i saradnja između svih nivoa vlasti, a posebno Grada i Kantona Sarajevo. Naveo je da je budžet ambasade značajno uvećan, te predložio da Grad Sarajevo razmijeni informacije s Ambasodom Velike Britanije u vezi s mogućim oblastima saradnje.

Gradonačelnik je informirao ambasadora o aktualnim projektima Grada Sarajeva kao što su osnivanje muzeja Ars Aevi, radovi na obnovi Olimpijskog muzeja, planovi za izgradnju muzeja Mersada Berbera i muzeja Safeta Zeca, kreiranje turističke rute Zagreb-Beograd-Sarajevo. Bilo je riječi i o uvođenju direktne avionske linije Sarajevo-London.

### ***Nastupna posjeta ambasadora NR Kine Nj. E. Ji Pinga, Sarajevo, 27.02.2019.***

Gradonačelnik Sarajeva Abdulah Skaka primio je u nastupnu posjetu novoimenovanog ambasadora NR Kine u BiH Nj. E. Ji Pinga u Vijećnici 27.02.2019. i poželio mu dobrodošlicu i uspješan mandat.

Razgovarano je o dosadašnjoj vrlo uspješnoj saradnji između Grada Sarajeva i Ambasade NR Kine, čemu je značajan doprinos tokom svog mandata dala prethodna ambasadorica Chen Bo, te je izražena nada da će saradnja i u budućnosti biti intenzivirana, posebno u oblasti ekonomije, kulture, obrazovanja i sporta.

Spomenuta je dugogodišnja saradnja pobratimskih gradova, Sarajeva i Tianjina, pri čemu je ambasador Ping predložio da Sarajevo proširi veze i s drugim kineskim gradovima, među kojima je posebno istaknuo Šangaj.

Razgovarano je o organizaciji Festivala zimskih sportova studenata zemalja 16+1 koji je planiran krajem 2019. početkom 2020. godine.



Istaknuvši zadovoljstvo sve većim brojem kineskih turista u BiH, sagovornici su se složili da je potrebno jačanje turističke ponude u Sarajevu, kao i uspostavljanje direktne avio-linije Sarajevo-Peking, koja bi bila dodatni poticaj sve većem dolasku kineskih turista, naročito nakon uvođenja bezvизnog režima za građane NR Kine i BiH.

Također, bilo je govora o inicijativi da Sarajevo 2020. bude domaćin susreta gradonačelnika u sklopu inicijative 16 +1, koja promovira saradnju šire regije s Kinom.

#### ***Nastupna posjeta ambasadorice Republike Austrije Urlike Hartmann, Sarajevo, 27.02.2019.***

Gradonačelnik Sarajeva Abdulah Skaka primio je u Vijećnici 27.02.2019. u nastupnu posjetu ambasadoricu Republike Austrije u BiH Nj. E. Urlike Hartmann i poželio joj dobrodošlicu i uspješan mandat.

Sagovornici su istakli opredjeljnost BiH za ulazak u EU i NATO, što je ocijenjeno kao garant stabilnosti, sigurnosti i povećanja investicija u BiH.

Tokom sastanka razgovarano je o sljedećim temama: dosadašnjoj vrlo uspješnoj saradnji između BiH i Republike Austrije koje vežu duge historijske i prijateljske veze; mogućnostima unaprjeđenja saradnje s austrijskim gradovima Bečom, Innsbruckom, Bad Ischlom, u oblastima kulture, sporta, turizma; organizaciji trećeg po redu Austrijskog bala; posjeti gradonačelnika Sarajeva Gradu Beču 07.03.2019., kao i temama razgovora, među kojima je istaknut projekat obnove Bistričke stanice.

#### ***Prijem delegacije Ambasade Mađarske, Sarajevo, 05.03.2019.***

Zamjenik gradonačelnika Ivica Šarić održao je sastanak u Vijećnici 05.03.2019. sa delegacijom Ambasade Mađarske koju su činile Anita Diana Marton, treći sekretar Ambasade, i Agnes Angyal, zamjenica ambasadora.

Tema sastanka bio je koncert mađarskog državnog Filharmonijskog orkestra u Vijećnici 9. maja 2019., povodom Dana Evrope i Dana pobjede nad fašizmom, te je u skladu s tim razgovarano o tehničkim detaljima.

#### ***Prijem povodom Nacionalnog dana Bugarske, Delegacija EU, 06.03.2019.***

Na poziv Delegacije EU u BiH, prijemu povodom Nacionalnog dana Bugarske, održanom 06.03.2019., prisustvovali su gradonačelnik Sarajeva Abdulah Skaka, šefica Kabineta gradonačelnika Erna Čolić i šef Odjeljenja za kabinetske i protokolarne poslove Ensar Eminović.

#### ***Sastanak sa šefom ureda EBRD-a Ianom Brownom, Sarajevo, 11.03.2019.***

Povodom održavanja skupštine Europske banke za obnovu i razvoj (EBRD), 08. i 09.05.2019., na kojoj će investitorima i ekonomskoj eliti biti predstavljen niz projekata od značaja za grad i državu, gradonačelnik Sarajeva Abdulah Skaka, razgovarao je sa šefom ureda EBRD Ianom Brownom, o razvojnim projektima, te o organizaciji skupštine.

Također, bilo je govora o mogućnostima za saradnju između EBRD i Grada Sarajeva. Brown je izrazio zainteresiranost za učešće u investicijama koje priprema Grad Sarajevo, te je ponudio i tehničku pomoć.

Grad Sarajevo će iskoristiti priliku da gostima i potencijalnim investitorima tokom skupštine EBRD predstavi projekte koji su u pripremi i realizaciji, među kojima su izgradnja skijaške staze na Trebeviću, obnova Kasarne Jajce, te izgradnja restorana na Vidikovcu.

Grad želi upoznati strane investitore sa razvojnim projektima koje realizira, a kako bi se obostrano razmotrila mogućnost saradnje i partnerstva.

***Sastanak s ambasadorom Lars-Gunnar Wigemarkom, Šefom Delegacije EU u BiH, Sarajevo, 20.03.2019.***

Gradonačelnik Sarajeva Abdulah Skaka sa zamjenicima Milanom Trivićem i Ivicom Šarićem, sastao se sa Šefom Delegacije EU u BiH ambasadorom Larsom-Gunnarom Wigemarkom u Vijećnici 20.03.2019.

Wigemark je pohvalio uspješnu organizaciju EYOF-a 2019., a razgovarano je i o dosadašnjoj saradnji i zajedničkim projektima koji su u pripremi, kao i o što efikasnijem povlačenju europskih fondova, pri čemu je Grad Sarajevo 2018. ostvario značajan iskorak, a planirano je intenziviranje aktivnosti u tom pogledu.

Također, dogovorene su zajedničke aktivnosti u pogledu obilježavanja 9. maja, Dana Europe.

***Sastanak sa savjetnikom i zamjenikom Šefa Misije u Ambasadi Japana, Sarajevo, 05.03.2019.***

Prilikom nastupne posjete ambasadora Japana Hideyuki Sakamota, održane 24.05.2018., dogovoreno je da gradonačelnik Sarajeva posjeti gradove Tokio, Hirošimu i Jokohamu, u periodu cvjetanja japanskih trešanja.

S tim u vezi, dana 05.03.2019. održan je sastanak sa savjetnikom i zamjenikom Šefa Misije u Ambasadi Japana Akihitom Teruuchijem, s kojim je razgovarano o organizacionim i tehničkim detaljima posjete, te o nastavku saradnje sa JICA-om u vezi donacije minibuseva za padinske dijelove u starom dijelu grada.

Pored navedenog, razgovarano je o održavanju zajedničkog koncerta japanskih studenata s učenicima sarajevske Treće gimnazije u Vijećnici (27.03.), organizaciji ceremonije primopredaje Zvona mira (12.04.) i Prvog festivala japanske trešnje „Sakura Matsuri“ (13.04.).

***Sastanak s delegacijom Ambasade SAD u BiH, Sarajevo, 20.03.2019.***

Gradonačelnik Sarajeva Abdulah Skaka primio je delegaciju Ambasade SAD u BiH: šefa političkog Odjela Craiga Conway-a, vojnopolitičku savjetnicu Carrie Giardino, i savjetnika za vojno politička pitanja Amela Faku.

Gradonačelnik je zahvalio narodu, Vladi i Ambasadi SAD na značajnoj ulozi i snažnoj podršci BiH. Podsjetio je da je s generalom Gordonom Sullivanom potpisao u Washingtonu 24.10.2018., Memorandum o razumijevanju između Grada Sarajeva i američke organizacije „Marshall Legacy Institute“ (MLI) kojim će se omogućiti potpuno deminiranje glavnog grada BiH do 2020.

Craig Conway je kazao da je odobren budžet za realizaciju projekta „Sarajevo bez mina“ ali da se čeka notifikacija, dok je gradonačelnik izrazio želju da se birokratske procedure završe do 4. aprila - Međunarodnog dana borbe protiv mina, kada bi se organizirala press konferencija u Vijećnici.

U nastavku, sagovornici su razmijenili mišljenja o promjeni naziva ulica koje su imenovane po kontroveznim ličnostima, a u skladu s iskazanim interesovanjem, gradonačelnik je govorio o

ograničenim nadležnostima Grada Sarajeva, kao i s uspješnim projektima poput obnove Sarajevske žičare, Olimpijskog muzeja, organizacije EYOF-a 2019.

Također, gradonačelnik je upoznao goste s odlukom Gradskog vijeća Grada Sarajeva da se kongresmenu Chrisu Smithu dodijeli priznaje Počasni građanin Sarajeva, kao i da je isto usvojilo je inicijativu gradonačelnika da se jedan trg ili ulica u glavnom gradu BiH nazovu po nedavno preminulom američkom senatoru Johnu McCainu.

Na kraju, gradonačelnik je istakao značaj ulaska BiH u NATO - što je preduvjet za stabilnost i investicije, kao i važnost što skorije implementacije izbornih rezultata.

#### ***Sastanak sa zamjenicom šefa Misije u Ambasadi Mađarske Agnes Angyal, Sarajevo, 27.03.2019.***

U cilju upoznavanja s razvojnim projektima Grada Sarajeva, nadležnostima i problemima s kojima se Grad Sarajevo susreće u toku realizacije istih, zamjenica šefa Misije u Ambasadi Mađarske Agnes Angyal sastala se s Tarikom Hamzićem, šefom službe za ekonomsko-finansijske i IT poslove (JP Sarajevo d.o.o.), Selmom Bećiragić iz Odsjeka za urbano planiranje i stambenu izgradnju, i Tarikom Zečićem iz Odsjeka za komunalne djelatnosti.

Predstavnici Grada Sarajeva i JP "Sarajevo" d.o.o. prezentirali su aktuelne razvojne projekte Grada Sarajeva iz oblasti urbanizma, komunalnih djelatnosti, te smart city inicijative.

#### ***Nacionalni Dan Republike Grčke, Sarajevo, 28.03.2019.***

Prijemu povodom Nacionalnog praznika Republike Grčke prisustvovali su predstavnici političkog i javnog života, te međunarodnih organizacija i ambasada u BiH. U ime Grada Sarajeva prijemu su prisustvovali zamjenici gradonačelnika Sarajeva Ivica Šarić i Milan Trivić.

#### ***Press konferencija povodom početka realizacije projekta „Sarajevo bez mina 2020“, Sarajevo, 04.04.2019.***

Na press konferenciji koja je održana u Vijećnici 04.04.2019., ambasador SAD u BiH Eric Nelson i gradonačelnik Sarajeva Abdulah Skaka ozvaničili su početak realizacije projekta „Sarajevo bez mina 2020“, istakavši da će Grad Sarajevo i susjedne općine do 2020. biti očišćeni od mina.

Naime, SAD odobrile su sredstva za deminiranje Sarajeva i susjednih općina oba entiteta do kraja 2020. godine. Deminiranje će biti izvršeno na tzv. sumnjivim područjima pet općina u oba entiteta – Stari Grad, Istočni Stari Grad, Novi Grad, Istočna Ilidža i Vogošća.

Ambasador Nelson je istakao da su SAD glavni donator u projektu „Sarajevo bez mina“ što je najveća pojedinačna donacija te države u posljednjih 20 godina. Kazao je da ova inicijativa ima za cilj da Sarajevo i Istočno Sarajevo oslobodi ratne zaostavštine koja ometa pomirenje i razvoj.

Gradonačelnik Skaka je istaknuo zadovoljstvo što je samo šest mjeseci nakon potpisivanja Memoranduma o deminiranju između Grada Sarajeva i američke organizacije „Marshall Legacy Institute“ (MLI) došlo do početka realizacije ovoga projekta i to na 4. april – Međunarodni dan protiv mina.

Predstavnik kompanije MDDC koja će učestvovati u implementaciji projekta Nermin Hadžimujagić rekao je da će osam miliona kvadratnih metara površine koja se smatra sumnjivom i opasnom za

stanovništvo, nedostupnih za upotrebu i slobodno kretanje, biti oslobođeno od rizika. Naglasio je da će realizacija ovog projekta biti veliki iskorak u postizanju cilja predviđenog usvojenom Strategijom protuminskog djelovanja BiH, a to je BiH potpuno slobodna od mina do 2025. godine.

Uoči održavanja konferencije za novinare gradonačelnik Skaka i ambasador Nelson su se sreli s predstavnicima općina koje su uključene u projekt, te predstavnicima Komisije za deminiranje u BiH, Centra za uklanjanje mina u BiH i partnera uključenih u implementaciju projekta.

### ***Prijem ambasadora Republike Azerbejdžan Nj. E. Eldara Hasanova, Sarajevo, 16.05.2019.***

Gradonačelnik Sarajeva Abdulah Skaka primio je nerezidentnog ambasadora Republike Azerbejdžan za BiH Nj. E. Eldara Hasanova, koji je došao u pratnji savjetnika ambasadora Elnura Guliyeva.

Ambasador Hasanov je istakao zadovoljstvo tradicionalno prijateljskim odnosima između BiH i Republike Azerbejdžan, zatim saradnjom između Sarajeva i Bakua koji su uspostavili pobratimske odnose 1972., te nedavnim susretima gradonačelnika Sarajeva s gradonačelnikom Bakua Eldarom Azizovim u Bakuu 15.03.2019. i predsjednikom Azerbejdžana.

Ambasador je informirao je gradonačelnika o interesu azerbejdžanskih investitora za ulaganje u projekte na području BiH, te o statusu investicija u bh. gradovima, kao što su Mostar, Doboje, Kotor Varoš i Srebrenica.

Gradonačelnik je predložio da Grad Sarajevo pokloni Bakuu Sebilj kao simbol trajnog prijateljstva; da za vrijeme održavanja Sarajevo Film Festivala u Sarajevo dođu novinari i da naprave reportažu o Sarajevu; istakao je zainteresiranost domaće kompanije za preradu nafte za uspostavljanje saradnje s azerbejdžanskim partnerima.

### ***Večera u organizaciji Ambasade Japana, Sarajevo, 16.05.2019.***

U znak zahvalnosti na saradnji Grada Sarajeva sa Ambasadom Japana u organizaciji ceremonije primopredaje Zvona mira i Sakura festivala, Ambasada Japana je priredila večeru kojoj su prisustvovali zamjenici gradonačelnika Milan Trivić i Ivica Šarić, šefica Odsjeka za razvoj grada i međunarodnu saradnju Merima Hadžiabdić, stručna saradnica za kulturu Aida Koristović i saradnica na projektima Lejla Bešlagić.

### ***Sastanak s delegacijom Ambasade Indije - 5. Međunarodni dan joge, Sarajevo, 28.05.2019.***

Zamjenik gradonačelnika Milan Trivić primio je delegaciju Ambasade Indije za BiH, sa sjedištem u Budimpešti, i to direktoricu Kulturnog centra "Amrita Sher-Gil Cultural Centre" Tanuju Shankar i asistenticu za kulturu Annu Simon.

Tema razgovora bili su organizacioni detalji održavanja 5. Međunarodnog dana joge u Sarajevu (Skenderija) 15.06.2019.

Naime, na inicijativu indijskog premijera Narendre Modija, UN je 21. juni proglasio Međunarodnim danom joge. Generalna skupština UN usvojila je rezoluciju o tome, pozvavši zemlje članice da iskoriste taj dan kako bi što bolje upoznale dobrobiti vježbanja joge.

Tanuja Shankar je istakla da je cilj ovog događaja jačanje prijateljstva između Indije i BiH, te upoznavanje što većeg broja građana s dobrobitima joge. Uz napomenu da se 2019. obilježava i 150

godišnjica rođenja Mahatma Gandhija, Ambasada Indije je zamolila za veću podršku Grada Sarajeva, kako bi se Međunarodni dan joga što više medijski promovirao i približio građanima.

***Prijem povodom Nacionalnog dana Slovenije i Oružanih snaga Slovenije, Sarajevo, 20.06.2019.***

Zamjenici gradonačelnika Ivica Šarić i Milan Trivić prisustvovali su prijemu povodom Nacionalnog dana Slovenije i Oružanih snaga Slovenije, održanom 20.06.2019.

***Sastanak sa šeficom Političkog odjeljenja Ambasade NR Kine, Sarajevo, 21.06.2019.***

Stručni saradnik za sport u Službi za obrazovanje, kulturu, sport i mlade Nedžad Fazlija i šefica Odsjeka za razvoj grada i međunarodnu saradnju Zinaida Čengić, primili su delegaciju Ambasade NR Kine koju su činile šefica Političkog odjeljenja Dou Mengyue i Milena Likokur, stručni savjetnik za politička pitanja.

Povod sastanka je održavanje *Festivala zimskih sportova za univerzitetske studente zemalja srednje i istočne Europe 16+1*.

Naime, na konferenciji šefova vlada zemalja "16+1" održanoj u Sofiji početkom jula 2018., u skladu sa Smjernicama o saradnji između Kine i zemalja Srednje i Istočne Europe, odlučeno je da se zimski festival održi u Sarajevu 2019.

Tokom razgovora o organizacionim i tehničkim pitanjima, Fazlija je istakao da će Grad Sarajevo razmotriti mogućnost da se ovaj događaj organizira početkom 2020. s Gradom Istočnim Sarajevom kao su-domaćinom, te da će kontaktirati federacije zimskih sportova i kompanije koje upravljaju borilištima u vezi troškova organizacije takmičenja i prijedloga sportskih disciplina u kojima bi se učesnici takmičili.

Nakon sastanka, uspostavljen je kontakt sa Skijaškim savezom BiH sa kojim su razmijenjene informacije o mogućem terminu održavanja događaja, skijaškim disciplinama, tehničkoj organizaciji i troškovima, a informacije su dalje podijeljene sa Ambasadorom NR Kine.

***Oproštajna posjeta ambasadorice SR Njemačke Christiane Hohmann, Sarajevo, 15.07.2019.***

Gradonačelnik Sarajeva Abdulah Skaka primio je u oproštajnu posjetu ambasadoricu SR Njemačke Nj.E. Christianu Hohmann u Vijećnici 15.07.2019.

Prvi čovjek Grada zahvalio je Vladi i narodu Njemačke i ambasadorici lično za svu pomoć i podršku koju su do sada pružili Sarajevu i BiH.

Razgovarano je o uspostavljanju i razvijanju saradnje između glavnih gradova, Sarajeva i Berlina, s ciljem povezivanja preko projekata u oblasti smart city, javni transport, očuvanje kulturno-historijskog naslijeđa. Grad Sarajevo će uputiti dopis Gradu Berlinu sa konkretnim prijedlozima saradnje. Sagovornici su se složili da je mjesto Bosne i Hercegovine u EU integracijama i NATO-u.

Prijemu je prisustvovala i pomoćnica gradonačelnika za lokalnu samoupravu i razvoj grada Dragana Solaković.

***Svečani prijem: Godina do Olimpijade u Tokyju 2020, Sarajevo, 18.07.2019.***

Svečani prijem povodom obilježavanja godine dana do Olimpijskih i Paraolimpijskih Igara Tokyo 2020, u organizaciji Ambasade Japana u BiH, OK BiH i Paraolimpijskog komiteta BiH, održan je u prostorijama OK BiH 18.07.2019. Među brojnim zvanicama prisutni su bili i ambasadori

Francuske, Grčke i Brazila, predstavnici vlasti u BiH, olimpijci i vrhunski sportisti BiH, i predsjednici i generalni sekretari strukovnih sportskih saveza BiH.

Program obilježavanja 365 dana do Tokyo 2020 je otvoren kratkim videom koji je prikazao štafetno prenošenje Olimpijskog plamena, uz pozdravni govor predsjednika OK BiH Izeta Rađe. Događaj je pratio niz video prikaza, a prisutnima su se pored zamjenika gradonačelnika Ivica Šarića obratili i predsjednik Unije paraplegičara, Ambasador Japana i olimpijci Mesud Pezer i Larisa Cerić.

Ambasador Japana se zahvalio OK BiH, Paraolimpijskom komitetu BiH, predstavnicima vlasti i Toyoti koja je generalni sponzor OK BiH, i ujedno sponzor Olimpijskih i Paraolimpijskih Igara Tokyo 2020. Olimpijske Igre Tokyo 2020 će biti druge Olimpijske igre koje će se poslije 56 godina opet održati u ovom gradu. Ambasador je istakao da su dva olimpijska grada Sarajevo i Tokyo, historijski povezana, uz iskrene želje da će Olimpijske i Paraolimpijske Igre Tokyo 2020 doprinijeti ovoj povezanosti.

Završnica događaja je krunisana karate demonstracijom mladih sportista, čime je karate predstavljen kao jedan od pet novih sportova na Olimpijskim igrama Tokyo 2020.

#### ***Prijem ambasadora Republike Sjeverne Makedonije Ekrema Ebibija. Sarajevo, 07.08.2019.***

Gradonačelnik Sarajeva Abdulah Skaka primio je ambasadora Republike Sjeverne Makedonije Nj.E. Ekrema Ebibija u Vijećnici 07.08.2019.

Sarajevo i Skoplje povezuje dugogodišnje prijateljstvo i tradicionalne veze u svim oblastima, multikulturalni su gradovi i razmjenjuju velika iskustva.

Gradonačelnik je upoznao ambasadora s kapitalnim projektima koje ova gradska administracija planira realizirati u cilju poboljšanja kvalitete života svih građana. Usaglašeno je da na temelju pobratimskih odnosa između Sarajeva i Skoplja, postoji prostor za značajno unapređenje u svim sferama života. Za početak je predloženo pokretanje bilateralne kulturne saradnje u oblasti umjetnosti, u vidu multikulturalne izložbe grupe umjetnika koji bi svoja djela predstavili u nekoliko tehnika, slika i crteža, a prema mogućnostima galerije ili muzeja.

Konstatirano je i da dobre odnose Sarajeva i Skoplja treba nastaviti i zajednički unapređivati realizacijom konkretne privredne, ekonomske i turističke saradnje.

Ambasador Ebibi izrazio je spremnost za razmjenu iskustva s BiH u segment EU integracija te pozdravio organizaciju *Samita gradonačelnika glavnih gradova zemalja Jugoistočne Evrope* na kojem su učešće uzeli i predstavnici Skoplja predvođeni gradonačelnikom Petre Shilegovim.

#### ***Svečani prijem povodom 25. Sarajevo film festivala, Sarajevo, 18.08.2019.***

Svečanom prijemu povodom 25. godišnjice Sarajevo film festivala, koji je Ambasada Sjedinjenih Američkih Država organizirala u rezidenciji ambasadora Nelsona 18.08.2019, prisustvovali su gradonačelnik Sarajeva Abdulah Skaka i zamjenik gradonačelnika Ivica Šarić.

***Prijem novoimenovane ambasadorice BiH u Kraljevini Španiji Danke Savić, Sarajevo, 13.09.2019.***

Gradonačelnik Sarajeva Abdulah Skaka primio je novoimenovanu ambasadoricu BiH u Kraljevini Španiji Danku Savić kojoj je poželio uspješan mandat.

Razgovarano je o potrebi jačanja saradnje sa Barcelonom, te naročito sa Madridom sa kojim Grad Sarajevo ima uspostavljene pobratimske odnose od 2007. Ocijenjeno je da se na osnovu Sporazuma o bratimljenju Sarajeva sa Madridom konkretizuju i definiraju konkretni projekti koje bi Grad Sarajevo implementirao zajedno sa španskom prijestolnicom, s ciljem prezentacije kulturnih, turističkih i privrednih potencijala.

Savić je kazala kako će slijediti tradiciju dobrih odnosa i saradnje BiH i Kraljevine Španije, ali i ojačati međusobne veze između glavnih gradova. Kako bi se dva grada što bolje upoznala i zbližila predložena je saradnja u oblasti kulture. Gradonačelnik je predložio da u Madridu gostuje izložba Safeta Zeca "Egzodus" ili "Zagrljaji" i da bi najbolji termin bio 6. april 2020. kada se obilježava Dan grada Sarajeva.

Imajući uvidu pozitivna iskustva sa organizacijom tri izložbe u Češkoj Republici, ambasadorica je predložila da se i u Madridu naša država predstavi izložbom Stećaka umjetnika Adisa Fejzića.

Ambasadorica je prenijela zahtjev Udruženja Češka beseda da se u Sarajevu postavi bista Tomáša Garriguea Masaryka (gradonačelnik Skaka je održao sastanak sa predsjednicom tog Udruženja u Vijećnici 26.09.2019.).

S obzirom da je u Madridu sjedište World Trade Centra, Ensar Eminović, savjetnik za međunarodnu saradnju, zamolio je ambasadoricu da istraži mogućnosti da Grad Sarajevo bude partner u nekom njihovom projektu.

***Otvorenje izložbe „1989 - Baršunasta revolucija“, Sarajevo, 23.09.2019.***

U okviru obilježavanja 30. godišnjice „Baršunaste revolucije“, Ambasada Republike Češke u Sarajevu otvorila je 23.09.2019. u Vijećnici izložbu tematskih panela „1989-Baršunasta revolucija“, a izložbu je zvanično otvorio ambasador Republike Češke u BiH Jakub Skalnik. Specijalni gost, koji se također obratio publici, bio je ambasador Republike Slovačke Martin Kačo.

Ovaj događaj bio je upotpunjen muzičkim kompozicijama svjetski poznatih čeških klasičnih kompozitora Smetane i Dvořaka. Izložba je bila postavljena u Vijećnici do 03.10.2019.

***Prijem ambasadora IR Iran u BiH Mahmouda Heidarija, Sarajevo, 02.10.2019.***

Gradonačelnik Sarajeva Abdulah Skaka primio je Nj. E. Mahmouda Heidarija, ambasadora Islamske Republike Iran u BiH, koji je gradonačelniku uručio poziv na „Golden Global Award Teheran“ koji će se u organizaciji Grada Teherana održati u tom gradu 02.11.2019.

Gradonačelnik se zahvalio ambasadoru na pozivu koji je načelno i prihvatio. Naglasio je da Iran i BiH imaju posebne veze, te podsjetio na pomoć koju je Iran pružio BiH tokom rata. Napomenuo je da su Teheran i Sarajevo pobratimski gradovi i da je glavni cilj da se ova dva grada povežu na svim poljima. Također je pozvao novoizabranog gradonačelnika Teherana da u skorijoj budućnosti posjeti glavni grad BiH.

Gradonačelnik je upoznao ambasadora sa projektima planiranim u 2020. među kojima je i otvaranje Olimpijskog muzeja, te obnova fasada.

Ambasador Heidari je istakao da je bitno da sve islamske države, bez obzira na različitosti, pruže punu podršku BiH bez mješanja u suverenitet i integritet države te da pruže punu podršku mirnom suživotu svih naroda u BiH. Ukazao je na značaj očuvanja identiteta, zaštite teritorije i integriteta.

#### *Nastupna posjeta ambasadorice SR Njemačke Margret Uebber, Sarajevo, 09.10.2019.*

Gradonačelnik Abdulah Skaka primio je 09.10.2019. u nastupnu posjetu ambasadoricu Savezne Republike Njemačke u BiH Margret Nj. E. Marie Uebber, te joj zaželio dobrodošlicu u glavni grad BiH i uspjeh u obavljanju nove dužnosti.

Naglasio je da je Njemačka svoje prijateljstvo prema našem narodu i zemlji pokazala svojom svesrdnom pomoći tokom agresije na BiH, a i danas je pokazuje podržavajući je na putu prema Evropskoj uniji.

Istakao je značaj koji međunarodna saradnja ima za Grad Sarajevo, te u okviru toga dugogodišnje veoma bliske i prijateljske veze sa tri njemačka pobratimska grada: Friedrichshafenom, Magdeburgom i Wolfsburgom. Također je izrazio želju da glavni grad države BiH uspostavi saradnju sa glavnim gradom Njemačke – Berlinom, te da ti odnosi dodatno doprinesu daljem unapređenju inače odličnih odnosa između naših naroda i zemalja, kroz realizaciju projekata na svim poljima od interesa za naše građane.

Ambasadorica je dodala kako će slijediti tradiciju dobrih odnosa i saradnje između Njemačke i BiH kao i između pobratimskih gradova, te sa svoje strane pružiti punu podršku saradnji dva glavna grada. Istaknula je da je Njemačka prijatelj BiH i da je oduvijek bila među zemljama koje zagovaraju njen put u EU i NATO, što bi doprinijelo sigurnosti, političkoj stabilnosti i većem investiranju i ekonomskom razvoju.

#### *Sastanak sa članicama Organizacionog odbora „Diplomatskog zimskog bazara (DWB)“, Sarajevo, 09.10.2019.*

Gradonačelnik Sarajeva Abdulah Skaka sastao se 09.10.2019. sa članicama Organizacionog odbora „Diplomatskog zimskog bazara (DWB)“: suprugom italijanskog ambasadora Annaritom Lippiello, suprugom britanskog ambasadora Martinom Field Klisović, suprugom zamjenika šefa Delegacije EU Zsofiom Kuszendom, suprugom slovačkog ambasadora Darinom Kolembusovom i sekretarom Udruženja Natašom Musom, sa kojima je razgovarao o organizaciji Diplomatskog zimskog bazara (DWB) u decembru 2019. godine.

Gradonačelnik je kazao da će Grad Sarajevo podržati i DWB 2019., istakavši zadovoljstvo što je ova gradska administracija uspostavila odličnu saradnju i stabilno finansiranje Bazara, te što se tradicija Sarajeva uspjela prezentirati i integrisati u ovaj događaj.

Gošće su zahvalile gradonačelniku i njegovoj supruzi na već tradicionalnom učešću u ovom humanitarnom projektu.

(Predstavnicima 20 nevladinih organizacija u BiH koje pomažu djeci i mladima, 2018. godine su uručeni čekovi u ukupnom iznosu od 212.000,00 KM, koji je prikupljen tokom Bazara).



***Nastupna posjeta ambasadora IR Pakistan Muhammada Khalida Raa, Sarajevo, 15.10.2019.***

Gradonačelnik Sarajeva Abdulah Skaka poželio je novoimenovanom ambasadoru Islamske Republike Pakistan u BiH, Nj.E. Muhammadu Khalidu Rao uspješan mandat u BiH i nastavak dobre saradnje između Bosne i Hercegovine i Pakistana.

Tokom susreta istaknuto je kako su se dvije prijateljske zemlje, BiH i Pakistan, međusobno mnogo pomagale, posebno u teškim prilikama, te da postoje velike mogućnosti i potencijali za unapređenje kako kulturne tako i trgovinske i privredne saradnje, pogotovo u oblasti halal industrije, koja posljednjih godina bilježi trend rasta kako kod nas, tako i u okruženju i svijetu.

Razgovarano je o razmjeni posjeta čelnika Sarajeva i Islamabada, u cilju približavanja dviju prijestolnica i definiranja konkretnih vidova buduće saradnje u oblasti kulture, obrazovanja, sporta, turizma, "pametni gradovi". Posjeta delegacije Grada Sarajeva Islamabadu mogla bi se realizirati u februaru ili martu 2020. godine.

***Sastanak sa novoimenovanim ambasadorom Republike Hrvatske, Ivanom Sabolićem, Sarajevo, 16.10.2019.***

Zamjenik gradonačelnika Ivica Šarić primio je novoimenovanog ambasadora Republike Hrvatske Ivana Sabolića 16.10.2019. Tema sastanka bila je organizacija koncerta i izložbe u Vijećnici povodom predsjedavanja Republike Hrvatske Vijećem Evrope 2020. godine.

S tim u vezi, Meliha Redžić, rukovodilac Gradske vijećnice i Zinaida Čengić, šef Odjeljenja za međunarodnu saradnju i protokol, održale su sastanak sa Jasminkom Keser, trećim sekretarom u Ambasadi Republike Hrvatske, u Vijećnici 23.10.2019. godine.

Na sastanku je razgovarano o tehničkim detaljima koncerta, koji će se u izvedbi sopranistice Vedrane Šimić održati u Vijećnici 12.03.2020., te izložbe pokretne nematerijalne baštine Republike Hrvatske, koja će istovremeno biti postavljena na galeriji iznad aule Vijećnice u trajanju od petnaest dana.

***Sastanak s ambasadorom Saudijske Arabije, Hani Abdullah Mominahom, Sarajevo, 18.10.2019.***

Gradonačelnik Sarajeva Abdulah Skaka razgovarao je u Vijećnici 18.10.2019. sa ambasadorom Kraljevine Saudijske Arabije Hanijem bin Abdullah Mominahom, o bilateralnim odnosima između Grada Sarajeva i Ambasade Kraljevine Saudijske Arabije, u oblasti turizma, sporta i razvoja.

Jedna od aktivnosti koja je tom prilikom dogovorena je da će umjetnici i kulturni djelatnici iz BiH i Sarajeva imati priliku 2020. godine da se predstave u Saudijskoj Arabiji gdje će Grad Sarajevo zajedno sa domaćinima organizirati Dane kulture. U okviru ovog događaja planirano je da se grad Sarajevo u Rijadu predstavi izložbom nekog od naših najboljih svjetskih umjetnika. Prethodno će već u proljeće 2020. u Sarajevu biti održani Dani kulture ove prijateljske zemlje.

***Nastupna posjeta ambasadorice Švedske Johanne Strömquist, Sarajevo, 18.10.2019.***

Gradonačelnik Sarajeva Abdulah Skaka primio je u Vijećnici 18.10.2019. u nastupnu posjetu ambasadoricu Kraljevine Švedske u BiH Johannu Strömquist, kojoj je poželio dobrodošlicu i uspješan mandat u BiH.

Tokom razgovora izraženo je obostrano zadovoljstvo dobrim bilateralnim odnosima između BiH i Kraljevine Švedske, čija dva glavna grada, Sarajevo i Štokholm, imaju uspostavljene pobratimske odnose od 1997. Gradonačelnik je istakao da je Švedska jedan od najvažnijih partnera BiH i zahvalio se na njenoj podršci, naglasivši da postoji prostor za dodatno unapređenje istih.

Razgovarano je o zvaničnoj posjeti visoke delegacije Kraljevine Švedske BiH, na čelu sa Princezom Victoriom i princom Danielom, u periodu od 05. do 07.11.2019. Pored jačanja postojećih dobrih odnosa između dvije zemlje, fokus ove posjete bit će na Strategiji zaštite životne sredine BiH, u čijoj izradi učestvuje Kraljevina Švedska, te zaštiti okoliša, održivom razvoju, inovacijama, poduzetništvu i mladim.

Sa predstavnicima Ambasade Švedske, održan je radni sastanak 25.10.2019., na kojem su utvrđeni detalji posjete koja bi se sastojala od sadnje drveta u parku kod Druge gimnazije, obilaska grada u pratnji gradonačelnika Sarajeva, posjete Trebeviću i susreta sa gradonačelnicima Sarajeva Istočnog Sarajeva.

#### ***Prijem u oproštajnu posjetu ambasadora Republike Grčke Georgiosa Iliopoulasa, Sarajevo, 23.10.2019.***

Gradonačelnik Abdulah Skaka primio je u Vijećnici 23.10.2019., u oproštajnu posjetu ambasadora Republike Grčke Georgiosa Iliopoulasa, kojem se zahvalio na dosadašnjoj saradnji, te poželio uspješan naredni mandat. Gradonačelnik se zahvalio i na pomoći koju je Grčka pružila za obnovu Vijećnice, te pomoći koju pruža BiH na putu u Evropsku uniju.

Sagovornici su se složili da je neophodno otvaranje direktnih letova između Grčke i BiH, te da je prometna povezanost preduslov za saradnju i investicije.

Gradonačelnik je naglasio da je Grad Sarajevo zainteresiran za razvijanje odnosa sa Atinom, a ambasador je obećao pomoć na to planu.

#### ***Ceremonija prijema ordena počasne pripadnice najizvršnijeg Reda Britanskog Carstva, Sarajevo, 23.10.2019.***

Na poziv Ambasade Velike Britanije, gradonačelnik Sarajeva Abdulah Skaka prisustvovao je uručanju ordena počasne pripadnice najizvršnijeg Reda Britanskog Carstva, uposlenici britanske ambasade Edibi Bakiri Trbonji-Kapić.

U ime kraljice Elizabete II, orden je dobitnici uručio ambasador Velike Britanije u BiH Matthew Field na ceremoniji održanoj u rezidenciji britanske ambasade u Sarajevu 23.10.2019. Ambasador je nakon uručjenja izjavio da orden odlazi uposlenici britanske ambasade u BiH, zbog njenog dugogodišnjeg i predanog rada u Ambasadi, kao i nesebičnog zalaganja u interesu građana dviju zemalja, BiH i Velike Britanije.

#### ***Sastanak u vezi projekta "Sarajevo bez mina 2020", Sarajevo, 17.10.2019.***

Gradonačelnik Sarajeva Abdulah Skaka održao je sastanak sa predstavnicima State Departmenta, Ambasade SAD i implementatorima projekta "Sarajevo bez mina 2020", u Vijećnici 17.10.2019.

Na sastanku je konstatirano da sve aktivnosti na provođenju programa deminiranja koji će do septembra 2020. Sarajevo učiniti gradom slobodnim od mina teku prema predviđenom planu i vrlo intenzivnoj dinamici.

Gradonačelnik Skaka je tokom razgovora sa Ethanom Rinksom, program menadžerom odjela State Departmenta odgovornim za projekat "Sarajevo bez mina 2020" koji se realizira u saradnji sa "Marshall Legacy Institutom", još jednom zahvalio američkom narodu i vladi. Posebno je istaknuta uloga američkog ambasadora Erica Nelsona u ovom historijskom projektu.

Skaka je izrazio uvjerenje da će otklanjanje mina zaostalih iz rata biti dodatni impuls i za ekonomski razvoj i investicije, posebno u oblasti turizma. Zahvalio je i svim partnerima koji su uključeni, kao i općinama u kojima se vrši deminiranje neovisno u kojem se dijelu BiH nalazile.

Projektom „Sarajevo bez mina 2020“ koji je najveći pojedinačni projekt deminiranja finansiran od strane SAD u posljednjih 10 godina u BiH, obuhvaćeno je pet općina u sarajevskoj regiji u kojima je preostalo minske sumnjivo područje, a to su Stari Grad, Istočni Stari Grad, Vogošća, Istočna Ilidža i Novi Grad.

Rinks je istaknuo da se radi o aktivnostima koje donose direktnu dobrobit stanovništvu, ističući liderstvo Grada Sarajeva i gradonačelnika u cijelom projektu. Naglasio je da će uspješna realizacija biti podstrek za nastavak deminiranja u cijeloj državi.

Sastanku su prisustvovali Saša Obradović direktor BHMACH, predstavnici Ambasade SAD u Sarajevu Salman Khan i Amel Fako, Gregor Sančanin program menadžer za BiH "ITF Enhancing Human Security" te Nermin Hadžimujagić i Marija Trlin iz firme MDDC.

***Sastanak sa ambasadorom za kulturu Republike Slovenije Mihom Pogačnikom, Sarajevo, 04.11.2019.***

Zamjenik gradonačelnika Ivica Šarić primio je Miha Pogačnika, ambasadora za kulturu Republike Slovenije, u čijoj pratnji su bili Zorica Bukinac, ambasadorica Republike Slovenije u BiH i Gabi Matković, opunomoćena ministrica u Ambasadi Republike Slovenije.

Gosp. Pogačnik je prezentirao svoj projekat čija jedinstvena umjetnost omogućava povezivanje ljudi kroz više oblasti od biznisa i ekonomije do politike, kulture i obrazovanja. Planirano je da se u Vijećnici 10.07.2020. održi cjelodnevni događaj koji bi se sastojao od raznih prezentacija, izložbe, koncerta i kateringa, te je s tim u vezi potrebno planirati prostor Vijećnice, svečanu salu i aulu.

Imajući uvidu teme projekta, na preporuku zamjenika gradonačelnika Šarića, gđin. Pogačnik će ostvariti kontakt sa Kantonom Sarajevo, odnosno ministarstvima za privredu, kulturu i obrazovanje.

U cilju daljnje realizacije gosp. Pogačnik će dostaviti detaljan program događaja.

***Sastanak sa ambasadorom Republike Italije Nicolom Minasijem, Sarajevo, 05.11.2019.***

Gradonačelnik Sarajeva Abdulah Skaka sa zamjenikom Ivicom Šarićem primio je ambasadora Republike Italije u BiH Nicolu Minasija sa kojim je razgovarao o jačanju saradnje, posebno u oblasti kulture i o novim projektima za 2020. godinu.

Tema sastanka bio je i projekat izgradnje zgrade JU "Muzeja savremene umjetnosti ARS Aevi Sarajevo" koji je dizajnirao je italijanski arhitekta Renzo Piano. Italija je prijateljska zemlja čija je politička i razvojna podrška izuzetno važna ne samo za Sarajevo nego i za BiH.

Sastanku je prisustvovala i Senka Ibrišimbegović, direktorica JU "Muzej savremene umjetnosti ARS Aevi Sarajevo"

***Sastanak sa ambasadorom Republike Francuske Guillaume Jean Roussonom, Sarajevo, 07.11.2019.***

Gradonačelnik Sarajeva Abdulah Skaka sa zamjenikom Milanom Trivićem održao je sastanak sa ambasadorom Republike Francuske Guillaume Jean Roussonom i savjetnikom za kulturu i saradnju pri Ambasadi Republike Francuske Jean-Christophe Thiabaudom.

Razgovarano je o uspostavljanju saradnje između dva glavna grada, Sarajeva i Pariza, posebno u oblasti kulture, o održavanju koncerta Pariške filharmonije 9. maja 2020. i finansijskom učešću Grada Sarajeva, Ambasade Francuske i ostalih francuskih institucija u realizaciji projekta.

Predstavnici ambasade su istakli da je ostvaren kontakt sa Pariškom filharmonijom koja broji 86 članova, da prema njihovoj procjeni troškovi leta, transporta instrumenata i smještaja iznose 200.000,00 eura, ali da će javiti konačnu odluku. Gradonačelnik je ponudio da Grad Sarajevo obezbijedi čarter let FlyBosniom, hotelski smještaj i lokalni transfer za period od 08. do 10.05.2020.

(Dopisom od 02.12.2019. savjetnik za kulturu i saradnju pri Ambasadi Republike Francuske g. Thiabaud, obavijestio je Grad Sarajevo o odluci Pariške filharmonije da zbog izuzetno visokih troškova koji premašuju njihov budžet, odustaju od gostovanja u maju 2020., ali da je Pariški kamerni orkestar spreman održati koncert 9. maja 2021.).

U nastavku, ambasador Rousson je odao priznanje gradovima Sarajevo i Istočno Sarajevo za uspješnu organizaciju EYOF-a 2019, te kazao da neformalna grupa ambasadora tim povodom namjerava organizirati prijem u rezidenciji Ambasade Francuske u čast gradonačelnika ta dva grada.

Gradonačelnik je istakao da su gradovi Sarajevo i Istočno Sarajevo zbog uspješne organizacije EYOF-a 2019, nominirani za nagradu „Diplomatska akcija godine“ (dodijeljena u okviru Međunarodnog foruma "Mir i sport" u Monaku 12.12.2019.).

***Prijem u oproštajnu posjetu Hasana Atlija, atašea za vjerska pitanja u ambasadi Republike Turske, Sarajevo, 07.11.2019.***

Gradonačelnik Sarajeva Abdulah Skaka primio je u oproštajnu posjetu Hasana Atlia, atašea za vjerska pitanja u ambasadi Republike Turske u Sarajevu.

Gradonačelnik Sarajeva se zahvalio Hasanu Atliju na uspješnoj saradnji tokom njegovog boravka u BiH te istakao da su tokom njegovog mandata dodatno ojačani odnosi dvije prijateljske zemlje.

Čestitao mu je na uspješnom djelovanju te naglasio da su otvorena komunikacija i brojni zajednički projekti Turske i BiH, posebno u oblasti vjerskih zajednica, ali i kulture bili u korist i u interesu obje zemlje.

Prijemu je prisustvovala i pomoćnica gradonačelnika za obrazovanje, kulturu, sport i mlade Amina Deljković.

### ***Ceremonija obilježavanja Dana primirja 11. novembra 1918., Sarajevo, 11.11.2019.***

Na poziv Ambasade Republike Francuske, zamjenici gradonačelnika Ivica Šarić i Milan Trivić, prisustvovali su ceremoniji obilježavanja Dana primirja 11. novembra 1918., te položili vijenac na Spomenik poginulim francuskim vojnicima koji se nalazi preko puta Ambasade Republike Francuske.

### ***Nastupna posjeta ambasadora Delegacije EU Johanna Sattlera, Sarajevo, 04.12.2019.***

Gradonačelnik Sarajeva Abdulah Skaka primio je u nastupnu posjetu šefa Delegacije Evropske unije u BiH Johanna Sattlera u Vijećnici 04.12.2019.

Upoznao je ambasadora Sattlera sa aktuelnim gradskim infrastrukturnim projektima, budućim razvojnim planovima, kao i aktivnostima koje se vode u smjeru pozicioniranja Sarajeva kao lidera u državi, ali i u regiji. Istakao je da Grad Sarajevo učestvuje u velikom broju EU projekata, što je novi trend i iskorak aktualne gradske administracije. Plan je intenzivirati te aktivnosti, a sve u cilju poboljšanja kvaliteta života građana našeg glavnog grada.

Ambasador Sattler je iskazao spremnost za nastavak saradnje i podršku BiH ka evropskom putu, dok je gradonačelnik ambasadoru poželio uspješan mandat u BiH i nastavak dobrih odnosa Sarajeva sa EU.

### ***Oproštajna posjeta ambasadora Češke Republike Jakuba Skalníka, Sarajevo, 16.12.2019.***

Gradonačelnik Sarajeva Abdulah Skaka primio je u oproštajnu posjetu ambasadora Češke Republike Nj. E. Jakuba Skalníka, koji je pohvalio rad gradonačelnika te istakao da se u glavnom gradu BiH vidi značajan napredak i razvoj što potvrđuje i broj turista koji se kontinuirano povećava iz godine u godinu.

Na pitanje gradonačelnika Skake, da li je za vrijeme svog mandata uvidio neke probleme sa kojima se grad suočava, ambasador je istakao nekoliko trenutnih problema vezano za tehničku infrastrukturu grada.

Redukcija vode, zagađenje zraka, modernizacija javnog gradskog prevoza, velike gužve u saobraćaju su neki od problema za koje on smatra da je potrebno naći efikasno rješenje. Ambasador je mišljenja da bi se zagađenje zraka trebalo riješiti subvencijom plina koja bi u velikoj mjeri smanjila problem zagađenja.

Ambasador Skalnik je istakao da Češka Republika podržava put BiH ka NATO savezu i EU te da bi ulazak BiH u NATO otvorio vrata ka mnogim investicijama.

Gradonačelnik Skaka je čestitao ambasadoru na uspješnoj misiji, te naglasio važnost podrške koju Češka Republika pruža BiH na putu ka članstvu NATO savezu i EU.

### ***Nastupna posjeta Ambasadora Crne Gore u BiH Obrada Miše Stanišića, Sarajevo, 17.12.2019.***

Novi ambasador Crne Gore u BiH Nj. E. Obrad Stanišić posjetio je gradonačelnika Sarajeva Abdulaha Skaku. Gradonačelnik Skaka je poželio crnogorskom diplomati uspješnu misiju u BiH.

Tokom sastanka naglašeni su dobri odnosi koje posljednjih godina glavni grad BiH gaji sa Podgoricom, glavnim gradom Crne Gore.

Razgovarano je o nastavku puta BiH ka članstvu u NATO, pri čemu je Stanišić kao bivši šef Delegacije Crne Gore pri Parlamentarnoj skupštini NATO-a izrazio punu podršku BiH te je zajednički istaknuta važnost tog procesa.

Također, razgovarano je o održavanju koncerta Crnogorske filharmonije u Vijećnici 9. maja 2020. povodom Dana pobjede and fašizmom, te postavljanju Spomen obilježja Bošku i Admiri koji su stradali u ratu 1992. - 1995. i spremnosti Ambasade Crne Gore da finansijski učestvuje kao čin doprinosa države Crne Gore multietničkom Sarajevu

Sastanku u Vijećnici prisustvovao je Asim Sarajlić, delegat u Domu naroda BiH te član Parlamentarne skupštine NATO-a.

***Prijem za gradonačelnike Sarajeva i Istočnog Sarajeva povodom odavanja priznanja organizacije EYOF-a 2019., 17.12.2019.***

Guillaume Rousson, ambasador Francuske u BiH, zajedno sa ambasadorima frankofonskih zemalja, priredio je 17.12.2019. prijem u svojoj rezidenciji u čast organizatorima Evropskog olimpijskog festivala za mlade (EYOF) čiji je uspjeh prepoznat na međunarodnoj sceni.

U prisustvu gradonačelnika Sarajeva Abdulaha Skake i Istočnog Sarajeva Nenada Vukovića, generalnog sekretara Olimpijskog komiteta BiH Saida Fazlagića, te zvanica diplomatskog kora, Grad Sarajevo je dobio još jednu potvrdu za odlično obavljen posao.

Prijemu su prisustvovali ambasadorica Švicarske Andrea Rauber Saxer te šef Diplomatskog kabineta Belgije William Gilbert J. Asselborn.

## **V. OSTALE AKTIVNOSTI NA PLANU MEĐUNARODNE SARADNJE**

### ***Izložba „Exodus“ maestra Safeta Zeca, Rim (Republika Italija), 19.-21.02.2019.***

U italijanskoj prijestolnici 20.02.2019. postavljena je izložba „Exodus“ maestra Safeta Zeca, jednog od najvećih umjetnika BiH. Gradonačelnik Sarajeva Abdulah Skaka je imao čast da u uz maestra Zeca, predsjednika Fondacije Migrantes Guerino di Tora, rektora crkve Massimo Nevola, Giandomenico Romanellija, kustosa, otvori ovu monumentalnu izložbu u crkvi San Francesco Saverio del Caravita u Rimu. Organizatorica izložbe bila je Patricia De Micheli, a događaju je prisustvovao i zamjenik gradonačelnika Ivica Šarić.

Slikarsku manifestaciju “Exodusa“ čini 17 posebno spremljenih velikih papira na platnima, od kojih pet čine veliki poliptih “Jedne tužne barke” posvećene izbjeglicama, nesretnim ljudima koji “preplivavaju” Mediteran kako bi se spasili.

Izložbu je tokom nekoliko mjeseci u Veneciji pogledalo više desetina hiljada ljudi, a postavka u Rimu je dodatno priznanje velikom bh. umjetniku. Doprinos maestra Zeca, čija djela predstavljaju nacionalno bogatstvo i u svojoj specifičnoj misiji pronose dobar glas o Sarajevu i BiH u cjelini.

### ***Prijem novoimenovanog direktora Goethe Instituta u BiH, Sarajevo, 13.03.2019.***

Gradonačelnik Sarajeva Abdulah Skaka primio je Martina Schumachera, novoimenovanog direktora Goethe Instituta u Sarajevu. Goethe Institut je kulturna ustanova SR Njemačke koja djeluje širom svijeta. Osnovni joj je cilj promocija poznavanja njemačkog jezika u inostranstvu, te njegovanje međunarodne saradnje u oblasti kulture.

Schumacher je ponudio svoju podršku u ostvarenju konkretne saradnje između Bonna i Sarajeva, kao i u saradnji s pobratimskim gradovima Friedrichshafenom i Wolfsburgom, u različitim oblastima (upravljanje otpadom, energija, ekologija), te razmjeni između uposlenika Gradskih uprava. Kazao je da je njegov cilj raditi na dugotrajnim projektima koji će se realizirati duži niz godina, naročito ističući temu digitalizacije, koja je sve prisutnija.

Gradonačelnik je zahvalio njemačkoj Vladi i narodu, te nedavno preminulom političaru i ministru vanjskih poslova Njemačke za vrijeme rata u BiH Klausu Kinkelu, na pomoći BiH, kao i na dosadašnjoj saradnji između Grada Sarajeva i Goetheovog Instituta, te iskazao uvjerenje da će se ista uspješno nastaviti i u budućnosti.

Imajući u vidu da je Prva akademija za menadžment u kulturi održana u partnerstvu Grada Sarajeva i Goethe Instituta BiH, u Sarajevu 10.05.2018. sagovornici su izrazili želju za nastavkom saradnje i u toj oblasti.

Gradonačelnik je predložio da, u cilju razvijanja kulturne saradnje, njemačka filharmonija nastupi u Vijećnici 9. maja 2020., kada se obilježava 75. godišnjica Dana pobjede nad fašizmom i Dan Europe. Zamjenik gradonačelnika Trivić je pozdravio tu ideju, istakavši značaj tog datuma u europskim razmjerama. Također je istakao značaj kulturne saradnje između Grada Sarajeva i Goethe Instituta BiH.

Schumacher je kazao da će pokušati dovesti u Sarajevo Beethovenov orkestar iz Bonna, na čelu s dirigentom Dirkom Kaftanom, te da je 2020. idealan termin obzirom da se te godine obilježava 250 godina od rođenja čuvenog kompozitora Ludwiga van Beethovena.

Schumacher je zamolio za asistenciju Grada Sarajeva u nalaženju prostora za administraciju Goetheovog Instituta, s obzirom da višegodišnje sjedište u Starom Gradu nije dovoljno.

### ***Predstavljanje Projekta “Muzejske priče”, Sarajevo, 21.03.2019.***

Projekat “Muzejske priče” koji se realizuje u okviru Instrumenta za pretpristupnu pomoć (IPA II) - Programa prekogranične saradnje Srbija - BiH 2014.-2020. predstavljen je 21.03.2019. u Vijećnici u prisustvu gradskih administracija i kulturnih djelatnika – učesnika projekta.

Cilj projekta je jačanje kulturnog identiteta BiH i Srbije kroz podršku rada muzeja prekograničnog područja kao čuvara historijskog i kulturnog naslijeđa i tradicije.

„Muzejske priče“ realizuju Grad Sarajevo u partnerstvu s Historijskim muzejom BiH, Centrom za kulturu „Vuk Karadžić“ iz Loznice i Zavodom za zaštitu spomenika kulture iz Kraljeva u periodu od 18 mjeseci.

Ukupna vrijednost projekta „Muzejske priče“ je 459.981,23 EUR od čega EU sufinansira 390.110,08 EUR (84,81%), a preostalih 69.871,18 EUR (15,19%) obezbeđuju partneri na projektu.

Gradonačelnik Skaka u svom pozdravnom obraćanju je istaknuo da Grad Sarajevo postaje poželjan partner u apliciranju i implementaciji projekata finansiranih iz međunarodnih fondova. Istakao je da je ovaj projekat pokazatelj novog trenda ove gradske administracije koji se ogleda u pojačanim i uspješnim aktivnostima na polju apliciranja ideja i projekata, a samim time i povećanjem finansijskih sredstava koja povlačimo iz međunarodnih finansijskih linija i fondova. Dodao je da je Grad Sarajevo kroz povlačenje sredstava iz navedenih fondova, u 2018. učestvovao u odobrenim projektima ukupne vrijednosti više od tri miliona KM.

Aktivnosti projekta će doprinijeti jačanju kapaciteta 10 muzeja prekograničnog područja: 5 u BiH (Historijski muzej BiH, Olimpijski muzej BiH, Zemaljski muzej BiH, Muzej književnosti i pozorišne umjetnosti BiH, Muzej Vijećnica) i 5 muzeja/institucija u Srbiji (Centar za kulturu „Vuk Karadžić“ Loznica, Zavod za zaštitu spomenika kulture Kraljevo, Narodni muzej Užice, Zavičajni muzej Priboj, Muzej Prijepolje).

Učesnici projekta su nakon održane zvanične prezentacije, uspostavili neformalnu Mrežu muzeja u prekograničnom području, čija će zadaća u narednih 18 mjeseci biti: nabavka specijalističke opreme za muzeje, restauracija i prezervacija izložbenih eksponata, digitalizacija muzejskih zbirki kroz izradu mobilnih aplikacija za posjetioce muzeja, priprema zajedničkih izložbi i izrada promo videa i kataloga muzeja, te tematske izložbe za manifestaciju „Noć muzeja“ i jačanje kapaciteta muzejskih radnika u oblasti digitalizacije.

### ***Puštanje u rad postrojenja za grijanje u Osnovnoj školi “Saburina”, Sarajevo, 28.03.2019.***

Zamjenik gradonačelnika Sarajeva Milan Trivić prisustvovao je 28.03.2019. puštanju u rad modernog postrojenja za grijanje u Osnovnoj školi “Saburina” u Općini Stari Grad Sarajevo. Grad Sarajevo je, zajedno s partnerima sufinansirao projekt, vrijedan više od 180.000 maraka, a u okviru kojeg je instaliran najmoderniji sistem grijanja.



U projektu su, osim Grada, učestvovali i organizacija Slovak Aid, Općina Stari Grad i Ministarstvo za obrazovanje, nauku i mlade Kantona Sarajevo.

Instaliran je sistem grijanja s ekološki prihvatljivom tehnologijom "ECO Packet Infra" koji će imati pozitivan utjecaj na okolinu i rezultirati značajnom uštedom u usporedbi s prethodnim načinom grijanja škole. Projekt je podržala Višegradska grupa i Ambasada Japana.

#### ***Uručenje Sarajevo Business Forum priznanja, Sarajevo, 17.04.2019.***

Sarajevo Business Forum (SBF) već cijelu deceniju u Sarajevo dovodi državnike, političke lidere i poslovne ljude iz regije, Europe i svijeta. Glavni grad BiH izuzetno cijeni doprinos ove manifestacije u stvaranju boljeg poslovnog ambijenta i ekonomskog progresa, zbog čega je i partner već godinama.

Na 10. jubilarnom SBF-u gradonačelnika Abdulah Skaka je zajedno s Nijazom Hastorom i Stjepanom Mesićem bio u žiriju za dodjelu Sarajevo Business Bridge Awardsa, renomiranog priznanja koje dodjeljuje Sarajevo Business Forum.

Tim povodom, u Vijećnici je 17.04.2019. upriličena prigodna svečanost, a prisutnim učesnicima i gostima obratili su se gradonačelnik Sarajeva Abdulah Skaka, predsjednik Uprave BBI banke Amer Bukvić, te generalni direktor Ziraat Bank Yusuf Dilaver.

Prijem je bio prilika da Amer Bukvić uruči i jubilarna priznanja za pojedince i kompanije koje su kroz deset godina održavanja značajno doprinijeli rastu i razvoju Sarajevo Business Forum.

#### ***Svečano otvorenje nove zgrade Francuskog instituta u BiH, Sarajevo, 18.04.2019.***

Zamjenik gradonačelnika Milan Trivić prisustvovao je svečanom otvorenju nove prostorije Francuskog instituta u ulici Tina Ujevića, gdje su na prigodnom druženju predstavnici političkog i javnog života izrazili zadovoljstvo što im Institut u glavnom gradu BiH pruža ostvarivanje komunikacije na francuskom jeziku.

Direktorica za kulturu i razvoj u Ministarstvu vanjskih poslova Francuske Laurence Auer istakla da su u cilju širenja francuskog jezika i kulture osmišljeni razni programi koji će se u 2019. realizirati u Institutu.

Prisutne goste pozdravili su i zamjenik gradonačelnika Milan Trivić, te pomoćnik ministra za multilateralne odnose Almir Šahović, uvjereni da će se realizacijom aktivnosti u novoj zgradi još više ojačati veza između Francuske i Bosne i Hercegovine.

U prostorijama Instituta fotograf Milomir Kovačević Strašni priredio je izložbu.

#### ***Dodjela priznanja Počasni građanin Grada Sarajeva Stjepanu Mesiću, Sarajevo, 18.04.2019.***

Stjepanu Mesiću, bivšem predsjedniku Republike Hrvatske, uručeno je priznanje Počasni građanin Grada Sarajeva, u sarajevskoj Vijećnici 18.04.2019.

Stjepan Mesić u svojim istupima uvijek jasno, otvoreno i prijateljski govori o BiH i daje izuzetan doprinos razvoju i jačanju tradicionalnih i historijskih veza, kako između Republike Hrvatske i BiH, tako i između glavnih gradova Zagreba i Sarajeva.

***Otvorenje monografske izložbe Mersada Berbera u Galeriji Klovićevi dvori, Zagreb, 18.04.2019.***

Otvorenju monografske izložbe Mersada Berbera u zagrebačkoj Galeriji Klovićevi dvori, održanom 18.04.2019., prisustvovali su zamjenik gradonačelnika Ivica Šarić, zamjenica predsjedavajućeg Gradskog vijeća Edina Gabela, i gradski vijećnici Miro Lazović i Nuko Grebović.

***Prijem Šeika Ahmeda bin Saeed Al Maktouma, predsjednika aviokompanije "Emirates Airline", Sarajevo, 19.04.2019.***

Šeik Ahmed bin Saeed Al Maktoum, član vladajuće porodice Ujedinjenih Arapskih Emirata i predsjednik jedne od najvećih svjetskih aviokompanija "Emirates Airline" posjetio je gradonačelnika Sarajeva Abdulaha Skaku u Vijećnici, gdje su imali vrlo sadržajne razgovore o mogućnostima realizacije investicija i razvoju glavnog grada Bosne i Hercegovine.

Al Maktoum koji je i 2019. godine bio jedan od učesnika Sarajevo Bussines Foruma, izrazio je spremnost za saradnju i veliki interes za razvojne projekte koje Grad Sarajevo planira.

***Potpisan Protokol o saradnji u Ministarstvu spoljne trgovine i ekonomskih odnosa BiH, Sarajevo, 24.04.2019.***

U vezi godišnje investicione konferencije Europske banke za obnovu i razvoj (EBRD), gradonačelnik Sarajeva Abdulah Skaka potpisao je 24.04.2019. *Protokol o saradnji* u Ministarstvu spoljne trgovine i ekonomskih odnosa BiH, ističući da će ovakav događaj otvoriti put za nove investicije.

Konferencija na temu "Povezivanjem ekonomija do snažnijeg rasta", koja je održana u Sarajevu od 07. do 09.05.2019., predstavlja platformu za kvalitetnu debatu o ključnim pitanjima koja su značajna za region u kojem EBRD posluje.

Fokus je bio na oblastima koje se tiču Zapadnog Balkana s osvrtom na prilike za investiranje, odliv stanovništva, turizam, kao i digitalizaciju malih i srednjih preduzeća.

***Sastanak s delegacijom Međunarodnog rezidualnog mehanizma za krivične sudove u Hagu (MRMKS), Sarajevo, 21.06.2019.***

Gradonačelnik Sarajeva Abdulah Skaka primio je delegaciju predvođenu predsjednikom Međunarodnog rezidualnog mehanizma za krivične sudove u Hagu (MRMKS) Carmelom Agiusom.

Delegacija je boravila u Sarajevu kako bi prisustvovala Međunarodnoj konferenciji na temu „Stop negiranju genocida i holokausta“ koja je u organizaciji Udruženja žrtava i svjedoka genocida i Pokreta Majke enklave Srebrenica i Žepa održana 21. i 22.06.2019.

Tokom razgovora konstatovano je da je negiranje genocida, utvrđenog presudama Haškog tribunala i Međunarodnog rezidualnog mehanizma, apsolutno neprihvatljivo, te da treba biti krivično sankcionirano. Istaknuto je da Grad Sarajevo podržava borbu za očuvanjem istine koja jedina može biti temelj za napredak i pomirenje. Razgovarano je o funkcioniranju Informativnog centra o MKSJ koji je otvoren u Vijećnici te o projektima i saradnji u budućnosti.

***Prijem direktora predstavništva Fondacije Konrad Adenauer u BiH Svena Petkea, Sarajevo, 30.06.2019.***

Zamjenik gradonačelnika Ivica Šarić primio je novoimenovanog direktora predstavništva Fondacije Konrad Adenauer u BiH Svena Petkea u Vijećnici 30.06.2019. Šarić je upoznao Petkea s pravnim statusom glavnog grada, njegovim nadležnostima, kao i uspješnim projektima koje implementira aktuelna gradska administracija.

Poseban fokus razgovora bio je posvećen partnerstvu između Grada Sarajeva i Fondacije u vezi sa Informativnim centrom Međunarodnog krivičnog suda za bivšu Jugoslaviju Sarajevo. Tom prilikom je zaključeno da je od obostranog interesa saradnja na razvoju mandata Centra koja snažno doprinosi savladavanju prošlosti.

Direktor Petke je obišao prostorije Centra u Vijećnici, u sklopu kojih se nalazi i originalna sudnica Tribunala i stalna izložbena postavka „Opsada Sarajeva kroz presude Haškog tribunala“.

Na radnom dijelu sastanka, pomoćnica gradonačelnika Mila Eminović-Rizvanović, predstavila je ciljeve osnivanja, organizaciju, plan rada, kao i buduće projekte Centra, te je s tim u vezi, razgovarano o konkretnim modalitetima saradnje na provedbi tih projekata. Poseban fokus radnog dijela sastanka bio je posvećen razgovorima o realizaciji nove izložbene postavke Centra-Prikaz rada Tribunala kroz sve njegove osuđujuće presude po regijama i gradovima bivše Jugoslavije.

Direktor Petke je istaknuo kako je razvoj ove izložbene komponente Centra od naročitog značaja, te da će Fondacija pružiti snažnu podršku njenom razvoju koji treba da bude u službi prikaza najznačajnijih dostignuća Tribunala i njegovog doprinosa u postizanju pravde, borbi protiv negiranja, sprečavanju revizionizma, te jačanju vladavine prava uopće.

Po završetku prijema, direktor Petke je u pratnji domaćina sastanka obišao i objekat sarajevske Vijećnice, te istakao pozitivne impresije o ovom najraskošnijem zdanju izgrađenom u Sarajevu i svojevrsnom simbolu grada i njegovog otpora, kao i svjetskom simbolu susreta civilizacija.

***Sastanak s predstavnicima Udruženja Partnerships In Health, Sarajevo, 27.08.2019.***

Gradonačelnik Sarajeva Abdulah Skaka i pomoćnica gradonačelnika za lokalnu samoupravu i razvoj grada Dragana Solaković, primili su predstavnike Udruženja Partnerships In Health, Aidu Kurtović i Damira Laličića, koji su predstavili projekat priključenja Grada Sarajeva *Pariškoj deklaraciji* i pristupanja mreži gradova koje provode inicijativu „Fast-Track Cities“ o okončanju epidemije AIDS-a.

Pariškom deklaracijom ozvaničeno je globalno partnerstvo između Grada Pariza, Međunarodnog udruženja pružatelja zdravstvene zaštite (IAPAC), Zajedničkog programa UN za HIV/AIDS (UNAIDS) i Programa UN za ljudska naselja (UN-Habitat), u saradnji s lokalnim, nacionalnim, regionalnim i međunarodnim partnerima i donatorima.

Aida Kurtović je pojasnila koje bi bile obaveze i očekivanja od Grada Sarajeva te naglasila da bi Grad Sarajevo bio prvi grad u regionu Zapadnog Balkana koji bi pristupio ovom inovativnom i po zdravlje građana važnom projektu.

Vežano za inicijativu „Fast-Track Cities“ i potpisivanje Pariške deklaracije, zaključeno je da će Grad Sarajevo ubrzati izradu materijala za septembarsku sjednicu Gradskog vijeća i da je potrebna

saglasnost Gradskog vijeća Grada Sarajeva gradonačelniku za potpisivanje navedene deklaracije. Potpisivanju Deklaracije bili bi pristupi šefovi UN agencija (UNAIDS je globalni pokretač inicijative). Navedeni su i naredni koraci koji slijede nakon potpisivanja Deklaracije, kao što su formiranje radnih grupa i interesorno djelovanje.

***Prijem predstavnika Državnog inspektorata za lokalnu samoupravu pri Vladi Republike Sjeverne Makedonije, Sarajevo, 13.09.2019.***

Pomoćnica gradonačelnika za lokalnu samoupravu i razvoj grada Dragana Solaković primila je delegaciju Državnog inspektorata za lokalnu samoupravu pri Vladi Republike Sjeverne Makedonije, Seada Sadikoskog i Jasmina Redžepija.

Sead Sadikoski, direktor Državnog inspektorata za lokalnu samoupravu je predstavio ulogu ove institucije čiji cilj je koordinacija općina i nadgledanje odluka koju donose ove jedinice lokalne samouprave.

U skladu s iskazanim interesovanjem, Solaković je upoznala delegaciju sa pravnim statusom glavnog grada i njegovim nadležnostima, sa funkcijom Saveza općina i gradova FBiH čija je uloga unapređenje i zaštita zajedničkih interesa lokalnih samouprava, nadležnostima OHR-a i načinom na koji Gradsko vijeće Grada Sarajeva donosi odluke koje predlaže gradonačelnik.

***Sastanak s predsjednicom Udruženja Česka beseda, Sarajevo, 26.09.2019.***

Gradonačelnik Sarajeva Abdulah Skaka, na molbu novoimenovane Ambasadorice BiH u Kraljevini Španiji Danke Savić, primio je Jovanku Manžilović Šalaka, predsjednicu Udruženja Česka beseda iz Sarajeva, u Vijećnici 26.09.2019.

Manžilović Šalaka istakla je zainteresiranost Udruženja za postavljanje biste češkog humaniste i državnika Tomáša Garriguea Masaryka na javnoj površini u gradu, te predložila da to bude u Parku nacionalnih manjina (Općina Novo Sarajevo) ili ispred Akademije likovnih umjetnosti Sarajeva. Također iznijela je prijedog da se jedna ulica Sarajevu imenuje po Masaryku.

Gradonačelnik je kazao da je u toku javna rasprava o Nacrtu Odluke o spomenicima od značaja za Grad Sarajevo i o Nacrtu Programa podizanja spomenika od značaja za Grad Sarajevo za 2020. godinu. Predložio je da se Udruženje Česke besede zvanično obrati Gradu Sarajevu kako bi se u okviru odgovarajuće procedure udovoljilo njihovom zahtjevu.

***Sastanak sa podsekretarom UN-a i specijalnim izvjestiocem za pitanja genocida Adamom Diengom, Sarajevo, 07.10.2019.***

Gradonačelnik Sarajeva Abdulah Skaka sastao se sa Adamom Diengom, podsekretarom UN-a i specijalnim savjetnikom generalnog sekretara UN-a za prevenciju genocida, u Vijećnici 07.10.2019.

Gradonačelnik je visokog zvaničnika Ujedinjenih nacija upoznao sa radom, mandatom i projektima Informativnog centra o Međunarodnom krivičnom sudu za bivšu Jugoslaviju (MKSJ), te sa nedavnim transferom ovjerenih presuda iz Haga u Informativni centar u Vijećnici.

Dieng je pokazao interesiranje i podršku za projekte Grada Sarajeva koji doprinose pomirenju i čuvanju istine o BiH. Posebno je tokom razgovora naglasio lidersku ulogu gradonačelnika Skake, ističući da njegov angažman u organizaciji Evropskog olimpijskog festivala za mlade (EYOF) i u brojnim drugim pothvatima predstavlja primjer i model djelovanja mladog i energičnog političara.

Adam Dieng je tokom prijema u zgradi UN-a u Sarajevu 10.10.2019. gradonačelnicima Sarajeva i Istočnog Sarajeva, Abdulahu Skaki i Nenadu Vukoviću, uručio posebna priznanja za doprinos saradnji, miru i dijalogu kroz uspješnu organizaciju Evropskog olimpijskog festivala za mlade.

***Sastanak sa voditeljem konsultantskog tima Švicarske Agencije za razvoj i saradnju (SDC), Sarajevo, 24.10.2019.***

Pomoćnica gradonačelnika za lokalnu samoupravu Dragana Solaković i stručni savjetnik za lokalnu samoupravu Nermina Suljević, održale su sastanak sa voditeljem konsultantskog tima Švicarske Agencije za razvoj i saradnju (SDC) Matthiasom Bossom 24.10.2019.

Tema sastanka bilo je mapiranje pristupa u sektoru javne uprave u dosadašnjim projektima sa fokusom na lokalnu samoupravu i definisanje pravaca i potencijalne aktivnosti za narednu Strategiju Švicarske Agencije za razvoj i saradnju za BiH.

***Prijem glavnog tužioca Mehanizma za međunarodne krivične sudove, Serge Brammertz, Sarajevo, 30.10.2019.***

Glavni tužilac Rezidualnog mehanizma za krivične sudove u Hagu, Serge Brammertz sastao se sa zamjenicima gradonačelnika Ivicom Šarićem i Milanom Trivićem, u Vijećnici 30.10.2019., uoči podnošenja izvještaja o našoj zemlji Vijeću sigurnosti UN-a u decembru. Brammertz je posjetio Informativni centar o MKSJ, te obišao sudnicu Haškog tribunala.

Potom je u organizaciji Informativnog centra o MKSJ održao historijski čas za sarajevske srednjoškolce. Brammertz je sarajevskim gimnazijalcima pričao o trenutnim izazovima kada je riječ o međunarodnoj pravdi, te naglasio da je neophodno njegovati kulturu sjećanja i kontinuirano učiti od svjedoka vremena.

Brammertzu su zamjenici gradonačelnika Šarić i Trivić uručili zahvalnicu Grada Sarajeva za njegov dosadašnji doprinos, te sarajevski zlatnik.

***Grad Sarajevo uvršten je na UNESCO-ovu listu kreativnih gradova, 30.10.2019.***

Povodom Svjetskog dana gradova, koji se obilježava 31. oktobra u Parizu, objavljeno je da je Sarajevo dobilo status grada filma UNESCO-a. Status grada filma UNESCO-a dodjeljuje se gradovima koji imaju bogatu historiju filma, prepoznatljive filmske festivale, značajne filmske lokacije i produkcijsku infrastrukturu, i posvećeni su razvoju i promociji filmskog stvaralaštva.

Ovaj uspješan projekat pripremao je tim gradonačelnika Sarajeva Abdulaha Skake, direktora SFF-a Mire Purivatre, te dio filmskih radnika i autora.

Na međunarodnom planu Sarajevu se otvaraju ogromne mogućnosti da ostvari nova partnerstva i razmjenjuje dobre prakse sa drugim gradovima unutar Mreže kreativnih gradova UNESCO-a. Mreža kreativnih gradova UNESCO-a okuplja ukupno 18 gradova filma. Pored Sarajeva, status grada filma UNESCO-a ove godine dobili su njemački grad Potsdam, poznat po slavnom filmskom studiju i filmskom zabavnom parku Babelsberg, indijski grad Mumbai, centar Bolivuda, španski grad Valjadolid i novozelandski grad Velington.

### ***Potpisan ugovor između Grada Sarajeva i UNDP-a, Sarajevo, 18.11.2019.***

Saradnja Grada Sarajeva i UNDP-a BiH u okviru "Smart Sarajevo" inicijative krunisana je potpisivanjem ugovora sa timovima koji će realizovati svoje projekte u sklopu ove inicijative.

Ovim će započeti realizacija odabranih 13 najboljih projekata, koje će u narednih pet mjeseci implementirati kompanije privatnog sektora i organizacije civilnog društva, sa ciljem da svojim inovativnim i tehnološkim idejama doprinesu u poboljšanju kvalitete života građana, pogotovo kad je riječ o problemu zagađenja zraka i javnog prevoza.

Prilikom potpisivanja ugovora u Vijećnici 18.11.2019. gradonačelnik Skaka je istakao da je aktivirano 1,8 miliona KM u 13 projekata. Od toga su Grad i UNDP obezbijedili nešto više od milion KM, a ostatak su obezbijedili odabrani partneri. Kazao je da je aktuelna gradska administracija od početka mandata, postavila kao prioritet razvijanje pametnog grada, primjenu novih tehnologija.

Prema riječima rezidentne predstavnice UNDP-a Steliane Nedera, ovo je korak naprijed u promovisanju interesa, partnerstva između javnog i privatnog sektora, kao i poticanju inovativnog razmišljanja u gradu. Digitalizacija i tehnološko unapređenje mogli bi biti moćan alat koji će učiniti gradove otpornijim i boljim.

Projekti su se podnosili online, a cijeli proces je bio transparentan i otvoren. Odabrani su: Enova d.o.o., Udruženje - Centar za edukaciju i podizanje svijesti o potrebi povećanja energetske efikasnosti, Services and Solutions, AXIS Solutions Group d.o.o., Energoinvest d.d., Supermarket d.o.o., STEP foundation, Normal Arhitektura, Deloitte d.o.o. (2 projekta), Ericsson Nicola Tesla d.d., CET Energy d.o.o. (2 projekta).

Inicijativu "Smart Sarajevo" pokrenuli su zajednički Grad Sarajevo i UNDP, a implementira se u saradnji sa Općinom Stari Grad uz podršku nadležnih ministarstava Kantona Sarajevo. Grad Sarajevo i UNDP BiH zajedno sa privatnim i javnim sektorom i organizacijama civilnog društva udružuju napore u stvaranju pametnijeg, zdravijeg i ugodnijeg „pametnog Sarajeva“.

### ***Izložba umjetničkih djela njemačkog umjetnika Rudolfa zur Lippea, Sarajevo, 13.12.2019.***

Građani, turisti i gosti grada od 13.12.2019. u Vijećnici mogu da pogledaju izložbu umjetničkih djela preminulog njemačkog slikara i filozofa prof. dr. Rudolfa Princea zur Lippea.

Posljednja želja ovog poznatog umjetnika i prijatelja našeg grada je bila da svih 26 slika iz njegovog opusa "Ponovo rođena - Vijećnica Renata", pokloni Gradu Sarajevu. Ovom izuzetnom gestom Rudolf zur Lippe vratio se u Sarajevo, u kojem je 2008. ove slike posvećene Vijećnici izložio na njenoj fasadi, prije početka obnove ovog simbola našeg glavnog grada.

Tim povodom, zamjenik gradonačelnika Milan Trivić je u Vijećnici ugostio umjetnikovog prijatelja i opunomoćenika Pascuala Hasso Jordana, uz čiji angažman su prenijeta djela u Sarajevo.

Inače, ovaj opus djela Rudolfa zur Lippea prikazuje mali pečat pepela iz spaljenih knjiga Vijećnice, koja predstavlja simbol stradanja, ali i uzdizanja i neuništivosti grada Sarajeva.

***Potpisan Sporazum o saradnji između Grada Sarajeva i Konrad Adenauer Fondacije, Sarajevo, 30.12.2019.***

Gradonačelnik Sarajeva Abdulah Skaka sastao se u Vijećnici 30.12.2019. sa Svenom Petkeom, direktorom Konrad Adenauer Fondacije (KAS) - Ured u BiH, povodom Projekta „*Kreiranje, izrada i postavka izložbe - predstavljanje rada i doprinosa Međunarodnog krivičnog suda za bivšu Jugoslaviju (MKSJ)*“ sa kojim je Grad Sarajevo aplicirao prema ovoj Fondaciji kao donatoru.

Naime, Konrad Adenauer Fondacija je u novembru 2019. u cijelosti odobrila Projekat, predloženi način implementacije Projekta i potrebna finansijska sredstva (budžet) za implementaciju Projekta u iznosu od 12.000,00 EUR.

S tim u vezi, gradonačelnik Abdulah Skaka i direktor Konrad Adenauer Fondacije Sven Petke, potpisali su *Sporazum o saradnji* u implementaciji odobrenog Projekta „*Kreiranje, izrada i postavka izložbe - predstavljanje rada i doprinosa Međunarodnog krivičnog suda za bivšu Jugoslaviju (MKSJ)*“ koji će se realizirati u dvije faze.

Sagovornici su izrazili zadovoljstvo dosadašnjom uspješnom saradnjom između Grada Sarajeva i Konrad Adenauer Fondacije na projektima Informativnog centra o Međunarodnom krivičnom sudu za bivšu Jugoslaviju (MKSJ) i izrazili nadu da će se ista nastaviti i u budućnosti.

Gradonačelnik je upoznao Petkea sa aktivnostima koje Grad Sarajevo i poljski Grad Oswiecim namjeravaju realizirati povezujući Informativni centar o MKSJ i Memorijalni centar u Oswiecimu/Aušvicu.

Sastanku je prisustvovala i Mila Eminović-Rizvanović, pomoćnica gradonačelnika za evropske integracije i EU fondove.

## **VI. AKTIVNOSTI GRADA SARAJEVA U OKVIRU MEĐUNARODNIH ASOCIJACIJA**

Na osnovu člana 26. stav 1. tačka 2. i člana 87. Statuta Grada Sarajeva ("Službene novine Kantona Sarajevo", broj 34/08 - Prečišćeni tekst) Grad Sarajevo može pristupiti međunarodnim udruženjima lokalnih zajednica i sarađivati s odgovarajućim lokalnim jedinicama drugih država, u skladu sa zakonom.

Odluku o pristupanju udruženjima, odnosno ostvarivanju saradnje iz navedenog stava donosi Gradsko vijeće.

Grad Sarajevo je član dvanaest međunarodnih asocijacija, od čega obavezu plaćanja članarina ima prema osam asocijacija, u iznosu od cca. 30.000,00 KM godišnje:

1. Unija glavnih gradova Centralne i Jugoistočne Europe (UCSEEC). Godina pristupanja: 2001. Asocijacija nije aktivna.
2. Mreža zdravih gradova Svjetske zdravstvene organizacije (WHO). Godina pristupanja: 2001. Godišnja članarina: 3.500,00 \$.
3. Mreža balkanskih gradova (Balcinet). Godina pristupanja: 2002. Mreža nije aktivna.
4. Europska koalicija gradova protiv rasizma (ECCAR). Godina pristupanja: 2004.
5. Mreža „Gradonačelnici za mir“ (Mayors for Peace). Godina pristupanja: 2004. Godišnja članarina: 4.500,00 ¥.
6. Međunarodna asocijacija gradovi glasnici mira (IAPMC). Godina pristupanja: 2005. Godišnja članarina: 500,00 €.
7. Mreža europskih gradova „Eurocities“. Godina pristupanja: 2005. Godišnja članarina: 4.390,00 €.
8. Svjetska unija olimpijskih gradova (UMVO). Godina pristupanja: 2009. Godišnja članarina: 5.000,00 €.
9. Liga historijskih gradova (LHC). Godina pristupanja: 2009. Godišnja članarina: 100,00 \$.
10. Europski gradovi i regije za kulturu LIKE. Godina pristupanja: 2012. Godišnja članarina: 1.380,00 €.
11. Open & Agile Smart Cities. Godina pristupanja: 2015.
12. Mreža mediteranskih gradova „MedCities“. Godina pristupanja: 2016. Godišnja članarina: 1.000,00 €.

Grad Sarajevo je od 2009. član Strazburškog kluba koji ima za cilj oživjeti evropske vrijednosti demokratije, dijaloga između kultura i poštivanja ljudskih prava u lokalnim javnim politikama.

Aktivnosti koje su tokom 2019. realizirane u okviru međunarodnih asocijacija čiji je Grad Sarajevo član su sljedeće:

### ***30. Generalna skupština Međunarodne asocijacije „Gradovi glasnici mira“ (IAPMC), Sarajevo, 25.-29.09.2019.***

30. Generalna skupština Međunarodne asocijacije "Gradovi glasnici mira" (IAPMC), pod nazivom „Promocija kulture mira u 21. stoljeću i provođenje ljudskog prava na mir“ održana je u Sarajevu od 26. do 29.09.2019.



Događaju su prisustvovala delegacije sljedećih gradova/općina: Abidan (Obala Slonovače), Berane (Crna Gora), Brighton and Hove (Velika Britanija), Coventry (Velika Britanija), Kotor (Crna Gora), Kragujevac (Srbija), Kumanovo (Makedonija), Kyrenia (Kipar), Lefkoniko (Kipar), Maputo (Mozambik), Morphou (Kipar), Oświęcim (Poljska), Plonsk (Poljska), Prilep (Makedonija), Rostock (Njemačka), Slovenj Gradec (Slovenija), Sremski Karlovci (Srbija), Toruń (Poljska), Volgograd (Ruska Federacija), Yokohama (Japan), Zagreb (Hrvatska) i Zurrieq (Malta).

Delegacije koje su predvodile gradonačelnici bile su delegacije: Slovenj Gradeca, Prilepa, Oświęcima, Morphoua, Lefkonika, Plonska, Kumanova, Zurrieqa, Kotora, Berana. Delegacije koje su predvodili zamjenici gradonačelnika bile su delegacije: Volgograda, Toruńa, Kyrenie, Zagreba.

Riječ je o jednom od najznačajnijih susreta gradonačelnika i drugih predstavnika lokalnih vlasti evropskih i svjetskih gradova nositelja poruke mira, članova ove UN-ove asocijacije.

Generalna skupština otvorena je pozdravnim obraćanjima gradonačelnika Sarajeva Abdulaha Skake, gradonačelnika Plonska i bivšeg predsjednika IAPMC Andrzeja Pietrasika, gradonačelnika Slovenj Gradeca i Generalnog sekretara IAPMC Tilena Kluglera, te predstavnika Ministarstva vanjskih poslova BiH Ahmeta Halilovića.

Ministrica za ljudska prava i izbjeglice BiH Semiha Borovac, otvorila je prvu temu „Migrantska kriza - tolerancija u kontekstu različitosti“, Dušan Stojanović, zamjenik sekretara IAPMC dao je uvod u drugu temu „UN ciljevi održivog razvoja“, prof. dr. Damir Kapidžić s Fakulteta političkih nauka u Sarajevu imao je uvodni govor o trećoj temi „Promocija kulture mira u 21. stoljeću naspram kulture rata u 20. stoljeću“, dok su predstavnici iz brojnih gradova prezentirali svoje iskustvo i izvještaje o provođenju prethodno spomenutih tema.

Skupština je, osim što je izradila Sarajevsku deklaraciju 2019. u kojoj je istaknuta neophodnost povećanja svijesti o utjecaju na okoliš, ukazala i na važnost slijeđenja UN-ovih ciljeva održivog razvoja, ponudila je i mogućnost delegatima za predstavljanje izvještaja iz svojih gradova, te prezentiranje svojih dobrih praksi u promociji kulture mira, tolerancije, saradnje i razumijevanja.

IAPMC je prihvatio dva nova grada-člana: Prilep (Sjeverna Makedonija) i Sremski Karlovci (Srbija).

Nakon što je okončao svoj trogodišnji mandat, IAPMC je usvajanjem izabrao novi Izvršni odbor i izvršne dužnosnike. Novi izvršni dužnosnici su:

- Predsjednik: Grad Sarajevo kojeg zastupa gradonačelnik Abdulah Skaka (predsjedavajući u prvoj godini).
- Potpredsjednici: Volgograd (Ruska Federacija) kojeg zastupa gradonačelnik Vitaliy Likhachev (predsjedavajući u drugoj godini); Morphou (Kipar) kojeg zastupa gradonačelnik Victor Hadjiavraam (predsedavajući u trećoj godini); Abidan (Obala Slonovače) koji zastupa viceguverner Vincent Kouaoh N'Cho.
- Generalni sekretar: Slovenj Gradec (Slovenija) kojeg zastupa gradonačelnik Tilen Klugler.
- Zamjenik generalnog sekretara: Dušan Stojanović (Slovenj Gradec, Slovenija)

Gradovi koji predstavljaju Izvršni odbor IAPMC su sljedeći: Abidan (Obala Slonovače); Coventry (Velika Britanija); Kragujevac (Srbija); Kumanovo (Sjeverna Makedonija); Morphou (Kipar); Plonsk (Poljska); Sarajevo (BiH); Slovenj Gradec (Slovenija); Volgograd (Rusija); Zurrieq (Malta).

Za dugogodišnje aktivno učešće, IAPMC je dodijelio priznanja Vincentu Kouaoh N'Cho, viceguverneru distrikta Abiđan, Victorasu Hadjiavraamu, gradonačelniku Morphoua; Andrzeju Pietrasiku, gradonačelniku Plonska, i Dušanu Stojanoviču, zamjeniku generalnog sekretara IAPMC. Posebno priznanje uručeno je Gradu Slovenj Gradecu za 30. godišnjicu primanja titule Glasnika mira, a nagradu je prihvatio gradonačelnik Slovenj Gradeca Tilen Klugler.

U okviru ovog događaja, u organizaciji Spomen parka „Kragujevački oktobar“ u Historijskom muzeju BiH otvorena je izložba 19. Međunarodnog salona antiratne karikature „Kragujevac“. Ovo izdanje Salona karakteristično je po velikom broju prispjelih radova - 414 autora iz 61 države dostavilo je 986 radova, što jasno govori o snazi misije koju Salon promovira. Glavnu nagradu dodjeljuje IAPMC, a laureat 19. Salona antiratne karikature je Izabela Kovalski, umjetnica iz Poljske.

Inače, IAPMC danas broji 115 članova. Grad Sarajevo je na poziv Slovenj Gradeca primljen u članstvo 2005. godine, a 2009. godine bio je organizator 22. Generalne skupštine IAPMC.

### ***Godišnji sastanak Svjetske unije olimpijskih gradova (UMVO) - Smart Cities & Sport Summit 2019, Tokio (Japan), 11.-15.11.2019.***

Na poziv gradonačelnika Lozane i predsjednika Svjetske unije olimpijskih gradova Gregoira Junoda, gradonačelnik Sarajeva Abdulah Skaka prisustvovao je Godišnjem sastanku Svjetske unije olimpijskih gradova (UMVO) koji je održan u Tokiju od 11.-15.11.2019.

Samit je bio izuzetna prilika za razmjenu ideja i promociju najboljih praksi između gradova; susret sa gradonačelnicima olimpijskih gradova i Guvernerkom Tokija; upoznavanje sa praksama gradova na temu Smart Cities.

Na Ceremoniji otvaranja Samita, između ostalih, obratili su se Yuriko Koike, guvernerka Tokija, Gregoire Junod, gradonačelnik Lozane i Craig Randall, gradonačelnik Lake Placida.

Na marginama Samita, gradonačelnik Abdulah Skaka se susreo sa guvernerkom Tokija Yuriko Koike, kojoj je uručio pismo namjere za saradnju naša dva grada.

Gradonačelnik Skaka imao je i sastanak sa zamjenikom guvernerke Tokija sa kojim je razgovarao o mogućoj saradnji gradova Tokija i Sarajeva, a tom sastanku je prisustvovao i predstavnik Ambasade BiH u Japanu Mensur Jusić. Gradonačelnik Skaka imao je susret sa ambasadorom BiH u Japanu Sinišom Berjanom sa kojim je razgovarao o saradnji Tokija i Sarajeva, te eventualnoj podršci Ambasade.

Gradonačelnik Skaka je zatražio je od Svjetske unije Olimpijskih gradova aktivno članstvo Grada Sarajeva u Izvršnom Odboru Unije, te predložio da Grad Sarajevo bude domaćin godišnjeg Sastanka Svjetske unije Olimpijskih gradova 2021. godine.

U pratnji gradonačelnika bio je i Denis Kovačević, viši referent za međunarodne odnose i saradnju s građanima.

### ***Godišnja konferencija Eurocities 2019, Prag (Češka Republika), 20.-22.11.2019.***

Zamjenik gradonačelnika Milan Trivić učestvovao je u radu godišnje konferencije Mreže europskih gradova „Eurocities“, koja je na temu “Gradovi na raskršću. Transformacija i obnova u gradovima”, održana u Pragu 20. do 22.11.2019.

Glavne teme konferencije bile su: Održivi gradovi - kako napraviti gradove udobnim mjestom za život, rad i igru - na održiv način; Društvo koje se mijenja - upravljanje promjenljivim političkim okruženjem i osnaživanje građana; Naša digitalna budućnost - kombinirajući moć podataka i snagu ljudi istovremeno štiteći prava građana; Turisti posvuda - između dobrobiti koje turizam donosi i problema koje stvara.

Na margini konferencije Trivić je imao susrete sa zamjenikom gradonačelnika Berlina sa kojim je razgovarao o povezivanju i saradnji podijeljenih gradova, članova Eurocities mreže: Berlina, Sarajeva i Nikozije; direktorom za komunikacije Eurocitiesa u Briselu; direktorom Friends of Europe, koji je izrazio interes za saradnju; članom Gradskog vijeća Grada Beograda, koji je izrazio spremnost za saradnju i prenošenje iskustva u vezi organizacije Foruma inicijative 17+1 u Beogradu 2018.; zamjenikom gradonačelnika Coventryja, koji je također izrazio želju za saradnju sa Sarajevom, te uputio poziv gradonačelniku da posjeti taj pobratimski grad.

Naredna Eurocities konferencija održat će se u Leipzigu (SR Njemačka) 2020. godine.

## ***VII. OCJENA STANJA***

Fokusirajući se na razvojnu komponentu, Grad Sarajevo je značajno doprinio afirmaciji glavnog grada Bosne i Hercegovine kao političkog, privrednog, kulturnog, sportskog i turističkog centra regije i Europe uopće.

U izvještajnom periodu međunarodna saradnja Grada Sarajeva bila je značajno intenzivirana i usmjerena ka održavanju i unaprjeđenju postojeće saradnje s gradovima, asocijacijama ili institucijama, te uspostavljanju saradnje s novim inostranim partnerima u oblasti primjene smart city rješenja, kulture, obrazovanja, sporta, zaštite i očuvanja kulturno-historijskog naslijeđa, turizma i privrede, energetske efikasnosti i urbanog transporta, te ostalim područjima djelovanja u okviru nadležnosti gradskih uprava.

Kao rezultat provođenja ciljeva međunarodne saradnje, u izvještajnom periodu ostvareni su, pored promocije Sarajeva, i konkretni benefiti ili je u toku realizacija konkretnih aktivnosti.

## ***VIII. PROGRAMSKA ORIJENTACIJA***

Programska orijentacija u oblasti međunarodne saradnje zasnovana je na intenziviranju i konkretizaciji veza s prijateljskim gradovima, posebno glavnim gradovima regiona, kroz zajedničke projekte u oblasti unapređenja lokalne uprave, edukacije kadrova, kulture, energetike i turizma. Poticanje novih i daljnje unapređenje i obnavljanje već uspostavljenih kontakata s pobratimskim, prijateljskim i partnerskim gradovima s ciljem razmjene informacija i iskustava na područjima djelovanja u okviru nadležnosti gradskih uprava, kao što su lokalna samouprava, kultura, obrazovanje, sport, turizam, pitanja mladih, zdravstvo i socijalna politika, gradske javne službe, zaštita i očuvanje kulturno-historijskog naslijeđa, zaštita okoline, strategija razvoja malih i srednjih preduzeća, međunarodni odnosi i druga područja od međusobnog interesa, te saradnja na nivou gradskih vijeća.

## ***IX. ZAKLJUČNA RAZMATRANJA***

Kao rezultat provođenja ciljeva međunarodne saradnje, pored promocije Sarajeva, u izvještajnom periodu ostvareni su i konkretni benefiti ili je u toku realizacija konkretnih aktivnosti, te su višetruko veći od sredstava koja su realizirana u provođenju aktivnosti međunarodne saradnje grada Sarajeva za 2019. godinu.

Ocjenjujući međunarodnu saradnju Grada Sarajeva tokom 2019. godine uspješnom u smislu unapređenja postojećih veza i uspostavljanja novih partnerskih odnosa, te konkretnih realiziranih projekata, ovoj oblasti treba i dalje pristupati s posebnom pažnjom.

Evropski trend regionalizacije i decentralizacije nameće ozbiljan pristup i posebno uvažavanje značaja diplomacije gradova, kao svojevrsne efikasne forme međunarodnih odnosa čiji je nosilac grad. Gradovi putem svojih višestrukih odnosa koji često nadilaze institucionalne forme saradnje, doprinose rješavanju zajedničkih problema, stvarajući tako trajne strukture, odnosno internacionalni dijalog, ne samo u okviru regije, nego i šire.